

ସୁଗାଳିନୀ

ବନ୍ଧିମଚନ୍ଦ୍ର ଚଟ୍ଟୋପାଧ୍ୟାୟ



ଆଦିତ୍ୟ ପ୍ରକାଶନସ୍ତ

୨, ପ୍ୟାରାଜେଟ୍‌ସ୍‌ ଲେ ପ୍ଲଟ୍, କଲିକତା-୭୦୦୦୧୭



বিতরণ প্রকাশ :
এপ্রিল, ১৯৫৯

প্রকাশক :
শ্রীহরিপদ বিশ্ব.,
আদিত্য প্রকাশালয়
২, শ্যামাচরণ দে স্ট্রীট
কলিকাতা-৭০০ ০৭০

মুদ্রাকর :
শ্রীঅজিতকুমার মামা
পারুল প্রিন্টিং ওয়ার্কস্
১৫/১, দ্বৈবর মিল লেন
কলিকাতা-৭০০ ০০৬

প্রথম খণ্ড

প্রথম পরিচ্ছেদ : আচার্য্য

একদিন প্রয়াগতীর্থে, গঙ্গায়মুনা-সঙ্গমে, অপূর্ব প্রাবৃট্টদিনাস্তশোভা প্রকটিত হইতেছিল। প্রাবৃট্টকাল, কিন্তু মেঘ নাই, অথবা যে মেঘ আছে, তাহা স্বর্ণময় তরঙ্গমালাবৎ পশ্চিম গগনে বিরাজ করিতেছিল। সূর্য্যদেব অস্তে গমন করিয়াছিলেন। বর্ষার জলসঞ্চারে গঙ্গা-যমুনা উভয়েই সম্পূর্ণশরীরী, যৌবনের পরিপূর্ণতায় উন্মাদিনী, যেন ছই ভগিনী ক্রীড়াচ্ছলে পরস্পরে আলিঙ্গন করিতেছিল। চঞ্চল বসনাগ্রভাগবৎ তরঙ্গমালা পবনতাড়িত হইয়া কূলে প্রতিঘাত করিতেছিল।

একখানি ক্ষুদ্র তরণীতে ছই জন মাত্র নাবিক। তরণী অসঙ্গত সাহসে সেই দুর্দমনীয় যমুনার শ্রোতোবেগে আরোহণ করিয়া, প্রয়াগের ঘাটে আসিয়া লাগিল। একজন নৌকায় রহিল, একজন তাঁরে নামিল। যে নামিল, তাহার নবীন যৌবন, উন্নত বলিষ্ঠ দেহ, যোদ্ধবেশ। মস্তকে উষ্ণীয়, অঙ্গে কবচ, করে ধনুর্বাণ, পৃষ্ঠে তুণীর, চরণে অন্নুপদীনা। এই বীরাকার পুরুষ পরম সুন্দর। ঘাটের উপরে, সংসারবিরাগী পুণ্যপ্রয়াসী-দিগের কতকগুলি আশ্রম আছে। তন্মধ্যে একটি ক্ষুদ্র কুটারে এই যুবা প্রবেশ করিলেন।

কুটারমধ্যে এক ব্রাহ্মণ কুশাসনে উপবেশন করিয়া জপে নিযুক্ত ছিলেন; ব্রাহ্মণ অতি দীর্ঘাকার পুরুষ; শরীর শুষ্ক; আয়ত মুখমণ্ডলে শ্বেতশ্মাঞ্চ বিরাজিত; ললাট ও বিরলকেশ তালুদেশে অল্পমাত্র বিভূতি-শোভা। ব্রাহ্মণের কাস্তি গম্ভীর এবং কটাক্ষ কঠিন; দেখিলে তাঁহাকে নির্দয় বা অভক্তিবাজন বলিয়া বোধ হওয়ার সম্ভাবনা ছিল না, অথচ শঙ্কা হইত। আগন্তুককে দেখিবামাত্র তাঁহার সে পরুষভাব যেন দূর হইল, মুখের গাম্ভীর্যমধ্যে প্রসাদের সঞ্চার হইল। আগন্তুক ব্রাহ্মণকে

প্রণাম করিয়া সম্মুখে দণ্ডায়মান হইলেন। ব্রাহ্মণ আশীর্ব্বাদ করিয়া কহিলেন, “বৎস হেমচন্দ্র, আমি অনেক দিবসাবধি তোমার প্রতীক্ষা করিতেছি।”

হেমচন্দ্র বিনীতভাবে কহিলেন, “অপরাধ গ্রহণ করিবেন না, দিল্লীতে কার্য্য সিদ্ধ হয় নাই। পরন্তু যখন আমার পশ্চাদগামী হইয়াছিল; এই জন্ত কিছু সতর্ক হইয়া আসিতে হইয়াছিল। তদ্ব্যতীত বিলম্ব হইয়াছে।”

ব্রাহ্মণ কহিলেন, “দিল্লীর সংবাদ আমি সকল শুনিয়াছি। বখ্তিয়ার খিলিজিকে হাতীতে মারিত, ভালই হইত, দেবতার শত্রু পশু-হস্তে নিপাত হইত। তুমি কেন তার প্রাণ বাঁচাইতে গেলে!”

হেমচন্দ্র। তাহাকে স্বহস্তে যুদ্ধে মারিব বলিয়া। সে আমার পিতৃশত্রু, আমার পিতার রাজ্যচোর। আমারই সে বধ্য।

ব্রাহ্মণ। তবে তাহার উপর যে হাতী রাগিয়া আক্রমণ করিয়াছিল, তুমি বখ্তিয়ারকে না মারিয়া সে হাতীকে মারিলে কেন?

হেমচন্দ্র। আমি কি চোরের মত বিনা যুদ্ধে শত্রু মারিব? আমি মগধবিজেতাকে যুদ্ধে জয় করিয়া পিতার রাজ্য উদ্ধার করিব। নহিলে আমার মগধ-রাজপুত্র নামে কলঙ্ক।

ব্রাহ্মণ কিঞ্চিৎ পরুষভাবে কহিলেন, “এ সকল ঘটনা ত অনেক দিন হইয়া গিয়াছে, ইহার পূর্বে তোমার এখানে আসার সম্ভাবনা ছিল। তুমি কেন বিলম্ব করিলে? তুমি মথুরায় গিয়াছিলে?”

হেমচন্দ্র অধোবদন হইলেন। ব্রাহ্মণ কহিলেন, “বুঝিলাম তুমি মথুরায় গিয়াছিলে, আমার নিষেধ গ্রাহ্য কর নাই। যাহাকে দেখিতে মথুরায় গিয়াছিলে, তাহার কি সাক্ষাৎ পাইয়াছ?”

এবার হেমচন্দ্র রুদ্ধভাবে কহিলেন, “সাক্ষাৎ যে পাইলাম না, সে আপনারই দয়া। যুগালিনীকে আপনি কোথায় পাঠাইয়াছেন?”

মাধবাচার্য্য কহিলেন, “আমি যে কোথায় পাঠাইয়াছি, তাহা তুমি কি প্রকারে সিদ্ধান্ত করিলে?”

হে। মাধবাচার্য্য ভিন্ন এ মন্ত্রণা কাহার? আমি যুগালিনীর ধাত্রীর মুখে শুনিলাম যে, যুগালিনী আমার আঙটি দেখিয়া কোথায় গিয়াছে,

আর তাহার উদ্দেশ্য নাই। আমার আঙটি আপনি পাথের জন্ত চাহিয়া লইয়াছেন। আঙটির পরিবর্তে অণু রত্ন দিতে চাহিয়াছিলাম ; কিন্তু আপনি লন নাই। তখনই আমি সন্দ্বিহান হইয়াছিলাম, কিন্তু আপনাকে অদেয় আমার কিছুই নাই, এই জন্তই বিনা বিবাদে আঙটি দিয়াছিলাম। কিন্তু আমার সে অসতর্কতার আপনিই সমুচিত প্রতিফল দিয়াছেন।

মাধবাচার্য্য কহিলেন, “যদি তাহাই হয়, আমার উপর রাগ করিও না। তুমি দেবকার্য্য না সাধিলে কে সাধিবে ? তুমি যবনকে না তাড়াইলে কে তাড়াইবে ? যবননিপাত তোমার একমাত্র ধ্যানস্বরূপ হওয়া উচিত। এখন মৃগালিনী তোমার মন অধিকার করিবে কেন ? একবার তুমি মৃগালিনীর আশায় মথুরায় বসিয়া ছিলে বলিয়া তোমার বাপের রাজ্য হারাইয়াছ ; যবনাগমনকালে হেমচন্দ্র যদি মথুরায় না থাকিয়া মগধে থাকিত, তবে মগধজয় কেন হইবে ? আবার কি সেই মৃগালিনী-পাশে বদ্ধ হইয়া নিশ্চেষ্ট হইয়া থাকিবে ? মাধবাচার্য্যের জীবন থাকিতে তাহা হইবে না। সুতরাং যেখানে থাকিলে তুমি মৃগালিনীকে পাইবে না, আমি তাহাকে সেইখানে রাখিয়াছি।”

হে। আপনার দেবকার্য্য উদ্ধার করুন ; আমি এই পর্য্যন্ত।

মা। তোমার দুর্ব্বুদ্ধি ঘটয়াছে। এই কি তোমার দেবভক্তি ? ভাল, তাহাই না হউক ; দেবতার আত্মকর্ম্ম সাধন জন্ত তোমার শ্রায় মনুষ্যের সাহায্যের অপেক্ষা করেন না। কিন্তু তুমি কাপুরুষ যদি না হও, তবে তুমি কি প্রকারে শত্রুশাসন হইতে অবসর পাইতে চাও ? এই কি তোমার বীরগর্ব্ব ? এই কি তোমার শিক্ষা ? রাজবংশে জন্মিয়া কি প্রকারে আপনার রাজ্যোদ্ধারে বিমুখ হইতে চাহিতেছ ?

হে। রাজ্য—শিক্ষা—গর্ব্ব অতল জলে ডুবিয়া যাউক।

মা। নরোধম ! তোমার জননী কেন তোমায় দশ মাস দশ দিন গর্ভে ধারণ করিয়া যজ্ঞণা ভোগ করিয়াছিল ? কেনই বা দ্বাদশ বর্ষ দেবারাধনা ত্যাগ করিয়া এ পাষণ্ডকে সকল বিত্তা শিখাইলাম ?

মাধবাচার্য্য অনেকক্ষণ নীরবে করলগ্নকপোল হইয়া রহিলেন। ক্রমে হেমচন্দ্রের অনিন্দ্য গৌর মুখকান্তি মধ্যাহ্ন-মরীচি-বিশোবিত স্থলপদ্মবৎ

আরক্তবর্ণ হইয়া আসিতেছিল। কিন্তু গর্ভাগ্নিগিরি-শিখর-তুল্য তিনি স্থির ভাবে দাঁড়াইয়া রহিলেন। পরিশেষে মাধবাচার্য্য কহিলেন, “হেমচন্দ্র, ধৈর্য্যাবলম্বন কর। মৃণালিনী কোথায়, তাহা বলি— মৃণালিনীর সহিত তোমার বিবাহ দেওয়াইব। কিন্তু এক্ষণে আমার পরামর্শের অনুবর্ত্তী হও, আগে আপনার কাজ সাধন কর।”

হেমচন্দ্র কহিলেন, “মৃণালিনী কোথায় না বলিলে আমি যবনবধের জন্ত অস্ত্র স্পর্শ করিব না।”

মাধবাচার্য্য কহিলেন, “আর যদি মৃণালিনী মরিয়া থাকে ?”

হেমচন্দ্রের চক্ষু হইতে অগ্নিস্ফুলিঙ্গ নির্গত হইল। তিনি কহিলেন, “তবে সে আপনারই কাজ।” মাধবাচার্য্য কহিলেন, “আমি স্বীকার করিতেছি, আমিই দেবকার্য্যের কণ্টককে বিনষ্ট করিয়াছি।”

হেমচন্দ্রের মুখকান্তি বর্ষণোন্মুখ মেঘবৎ হইল। ত্রস্তহস্তে ধনুকে শরসংযোগ করিয়া কহিলেন, “যে মৃণালিনীর বধকর্ত্তা, সে আমার বধ্য। এই শরে গুরুহত্যা ব্রহ্মহত্যা উভয় হুঞ্জিয়া সাধন করিব।”

মাধবাচার্য্য হাস্য করিলেন, কহিলেন, “গুরুহত্যায় ব্রহ্মহত্যায় তোমার যত আমোদ, স্ত্রী-হত্যায় আমার তত নহে। এক্ষণে তোমাকে পাতকের ভাগী হইতে হইবে না। মৃণালিনী জীবিত আছে। পার, তাহার সন্ধান করিয়া সাক্ষাৎ কর। এক্ষণে আমার আশ্রম হইতে স্থানান্তরে যাও। আশ্রম কলুষিত করিও না; অপাত্রে আমি কোন ভার দিই না।” এই বলিয়া মাধবাচার্য্য পূর্ববৎ জপে নিযুক্ত হইলেন।

হেমচন্দ্র আশ্রম হইতে নির্গত হইলেন। ঘাটে আসিয়া ক্ষুদ্র তরগী আরোহণ করিলেন। যে দ্বিতীয় ব্যক্তি নোকায় ছিল, তাহাকে বলিলেন, “দিগ্বিজয়! নোকা ছাড়িয়া দাও।”

দিগ্বিজয় বলিল, “কোথায় যাইব ?” হেমচন্দ্র বলিলেন, “যেখানে ইচ্ছা—যমালয়।”

দিগ্বিজয় প্রভুর স্বভাব বুঝিত। অক্ষুটস্বরে কহিল, “সেটা অল্প পথ।” এই বলিয়া সে তরগী ছাড়িয়া দিয়া স্রোতের প্রতিকূলে বাহিতে লাগিল।

হেমচন্দ্র অনেকক্ষণ নীরবে থাকিয়া শেষে কহিলেন, “দূর হউক !
ফিরিয়া চল ।”

দ্বিবিজয় নৌকা ফিরাইয়া পুনরপি প্রয়াগের ঘাটে উপনীত হইল ।
হেমচন্দ্র লক্ষ্যে তীরে অবতরণ করিয়া পুনর্ব্বার মাধবাচার্য্যের আশ্রমে
গেলেন ।

তাহাকে দেখিয়া মাধবাচার্য্য কহিলেন, “পুনর্ব্বার কেন আসিয়াছ ?”
হেমচন্দ্র কহিলেন, “আপনি যাহা বলিবেন, তাহাই স্বীকার করিব ।
মৃগালিনী কোথায় আছে আজ্ঞা করুন ।”

মা । তুমি সত্যবাদী—আমার আজ্ঞাপালন করিতে স্বীকার করিলে,
ইহাতেই আমি সন্তুষ্ট হইলাম । গোড়নগরে এক শিয়ের বাটীতে
মৃগালিনীকে রাখিয়াছি । তোমাকেও সেই প্রদেশে যাইতে হইবে ।
কিন্তু তুমি তাহার সাক্ষাৎ পাইবে না । শিয়ের প্রতি আমার বিশেষ
আজ্ঞা আছে যে, যত দিন মৃগালিনী তাঁহার গৃহে থাকিবে, তত দিন সে
পুরুষান্তরের সাক্ষাৎ না পায় ।

হে । সাক্ষাৎ না পাই, যাহা বলিলেন, ইহাতেই আমি চরিতার্থ
হইলাম । এক্ষণে কী কার্য্য করিতে হইবে অনুমতি করুন ।

মা । তুমি দিল্লী গিয়া যবনের মন্ত্রণা কি জানিয়া আসিয়াছ ?

হে । যবনেরা বঙ্গবিজয়ের উত্থোগ করিতেছে । অতি স্বরায়
বখ্‌তিয়ার খিলিজি সেনা লইয়া, গোড়ে যাত্রা করিবে ।

মাধবাচার্য্যের মুখ হর্ষপ্রকুল হইল । তিনি কহিলেন, “এত দিনে
বিধাতা বুদ্ধি এ দেশের প্রতি সদয় হইলেন ।”

হেমচন্দ্র একতানমনে মাধবাচার্য্যের প্রতি চাহিয়া তাঁহার কথার
প্রতীক্ষা করিতে লাগিলেন । মাধবাচার্য্য বলিতে লাগিলেন, “কয় মাস
পর্য্যন্ত আমি কেবল গণনায় নিযুক্ত আছি, গণনায় যাহা ভবিষ্যৎ বলিয়া
প্রতিপন্ন হইয়াছে, তাহা ফলিবার উপক্রম হইয়াছে ।”

হে । কি প্রকার ?

মা । গণিয়া দেখিলাম যে, যবনসাম্রাজ্য-ধ্বংস বঙ্গরাজ্য হইতে
আরম্ভ হইবে ।

হে। তাহা হইতে পারে। কিন্তু কতকালেই বা তাহা হইবে ?
আর কাহা কর্তৃক ?

মা। তাহাও গণিয়া স্থির করিয়াছি। যখন পশ্চিমদেশীয় বণিক
বঙ্গরাজ্যে অস্ত্রধারণ করিবে, তখন যবনরাজ্য উৎসন্ন হইবেক।

হে। তবে আমার জয়লাভের কোথায় সম্ভাবনা ? আমি ত
বণিক নহি।

মা। তুমিই বণিক। মথুরায় যখন তুমি মৃগালিনীর প্রয়াসে
দীর্ঘকাল বাস করিয়াছিলে, তখন তুমি কি ছলনা করিয়া তথায় বাস
করিতে ?

হে। আমি তখন বণিক বলিয়া মথুরায় পরিচিত ছিলাম বটে।

মা। স্মৃতরাং তুমিই পশ্চিমদেশীয় বণিক। গৌড়রাজ্যে গিয়া তুমি
অস্ত্রধারণ করিলেই যবনিপাত হইবে। তুমি আমার নিকট প্রতিশ্রুত হও
যে, কাল প্রাতেই গৌড়ে যাত্রা করিবে। যে পর্য্যন্ত সেখানে না যবনের
সহিত যুদ্ধ কর, সে পর্য্যন্ত মৃগালিনীর সহিত সাক্ষাৎ করিবে না।

হেমচন্দ্র দীর্ঘনিশ্বাস ত্যাগ করিয়া কহিলেন, “তাহাই স্বীকার
করিলাম। কিন্তু একা যুদ্ধ করিয়া কি করিব ?”

মা। গৌড়েশ্বরের সেনা আছে।

হে। থাকিতে পারে—সে বিষয়েও কতক সন্দেহ ; কিন্তু যদি
থাকে, তবে তাহার আমার অধীন হইবে কেন ?

মা। তুমি আগে যাও। নবদ্বীপে আমার সহিত সাক্ষাৎ হইবে।
সেইখানেই গিয়া ইহার বিহিত উত্তোগ করা যাইবে। গৌড়েশ্বরের
নিকট আমি পরিচিত আছি।

“যে আন্তা” বলিয়া হেমচন্দ্র প্রণাম করিয়া বিদায় হইলেন। যতক্ষণ
তাঁহার বীরমূর্ত্তি নয়নগোচর হইতে লাগিল, আচার্য্য ততক্ষণ তৎপ্রতি
অনিমেষলোচনে চাহিয়া রহিলেন। আর যখন হেমচন্দ্র অদৃশ্য হইলেন,
মাধবাচার্য্য মনে মনে বলিতে লাগিলেন, “যাও, বৎস ! প্রতি পদে
বিজয় লাভ কর। যদি ব্রাহ্মণবংশে আমার জন্ম হয়, তবে তোমার পদে
কুশাঙ্গুরও বিঁধিবে না। মৃগালিনী ! মৃগালিনী পাখী আমি তোমারই

জন্মে পিঞ্জরে বাঁধিয়া রাখিয়াছি । কিন্তু কি জানি, পাছে তুমি তাহার কলধ্বনিতে মুগ্ধ হইয়া বড় কাজ ভুলিয়া যাও, এইজন্ত তোমার পরম-মঙ্গলাকাজক্ষী ব্রাহ্মণ তোমাকে কিছু দিনের জন্ত মনঃপীড়া দিতেছে ।”

দ্বিতীয় পরিচ্ছেদ : পিঞ্জরের বিহঙ্গী

লক্ষণাবতী-নিবাসী হৃষীকেশ সম্পন্ন বা দরিদ্র ব্রাহ্মণ নহেন । তাঁহার বাসগৃহের বিলক্ষণ সৌষ্ঠব ছিল । তাঁহার অন্তঃপুরমধ্যে যথায় দুইটি তরুণী কক্ষপ্রাচীরে আলেক্ষ্য লিখিতেছিলেন, তথায় পাঠক মহাশয়কে দাঁড়াইতে হইবে । উভয় রমণীই আত্মকর্মে সবিশেষ মনোভিনিবেশ করিয়াছিলেন, কিন্তু তল্লিবন্ধন পরস্পরের সহিত কথোপকথনে কোন বিদ্ব জন্মিতেছিল না । সেই কথোপকথনের মধ্যভাগ হইতে পাঠক মহাশয়কে শুনাইতে আরম্ভ করিব ।

এক যুবতী অপরকে কহিলেন, “কেন, মৃগালিনী, কথার উত্তর দিস্ না কেন ? আমি সেই রাজপুত্রটির কথা শুনিতে ভালবাসি ।”

“সই মণিমালিনি ! তোমার সুখের কথা বল, আমি আনন্দে শুনিব ।”

মণিমালিনী কহিল, “আমার সুখের কথা শুনিতে শুনিতে আমিই জ্বালাতন হইয়াছি, তোমাকে কি শুনাইব ?”

মৃ । তুমি শোন কার কাছে—তোমার স্বামীর কাছে ?

মণি । নহিলে আর কারও কাছে বড় শুনিতে পাই না । এই পদ্মটি কেমন আঁকিলাম দেখ দেখি ?

মৃ । ভাল হইয়াও হয় নাই । জল হইতে পদ্ম অনেক উর্দ্ধে আছে, কিন্তু সরোবরে সেরূপ থাকে না । পদ্মের বাঁটা জলে লাগিয়া থাকে, চিত্রেও সেইরূপ হইবে । আর কয়েকটি পদ্মপত্র আঁক ; নহিলে পদ্মের শোভা স্পষ্ট হয় না । আরও, পার যদি, উহার নিকট একটি রাজহাঁস আঁকিয়া দাও ।

মণি । হাঁস এখানে কি করিবে ?

মৃ। তোমার স্বামীর মত পদ্মের কাছে স্নুখের কথা কহিবে।

মণি। (হাসিয়া) ছুই জনেই স্নুকর্প বটে। কিন্তু আমি হাঁস
আঁকিব না। আমি স্নুখের কথা শুনিয়া শুনিয়া জ্বালাতন হইয়াছি।

মৃ। তবে একটি খঞ্জন আঁক।

মণি। খঞ্জন আঁকিব না। খঞ্জন পাখা বাহির করিয়া উড়িয়া
যাইবে। এত মৃগালিনী নহে যে, স্নেহ-শিকলে বাঁধিয়া রাখিব।

মৃ। খঞ্জন যদি এমনই ছুঁষ্ট হয়, তবে মৃগালিনীকে যেমন পিঞ্জরে
পুরিয়াছ, খঞ্জনকেও সেইরূপ করিও।

ম। আমরা মৃগালিনীকে পিঞ্জরে পুরি নাই—সে আপনি আসিয়া
পিঞ্জরে ঢুকিয়াছে।

মৃ। সে মাধবাচার্য্যের গুণ।

ম। সখি, তুমি কতবার বলিয়াছ যে, মাধবাচার্য্যের সেই নির্ভুর
কাজের কথা সবিশেষ বলিবে। কিন্তু কই, আজও বলিলে না। কেন
তুমি মাধবাচার্য্যের কথায় পিতৃগৃহ ত্যাগ করিয়া আসিলে ?

মৃ। মাধবাচার্য্যের কথায় আসি নাই। মাধবাচার্য্যকে আমি
চিনতাম না। আমি ইচ্ছাপূর্ব্বকও এখানে আসি নাই। একদিন
সন্ধ্যার পর, আমার দাসী আমাকে এই আঙটি দিল ; এবং বলিল যে,
যিনি এই আঙটি দিয়াছেন, তিনি ফুলবাগানে অপেক্ষা করিতেছেন।
আমি দেখিলাম যে, উহা হেমচন্দ্রের সঙ্কেতের আঙটি। তাঁহার সাক্ষাতের
অভিলাষ থাকিলে তিনি এই আঙটি পাঠাইয়া দিতেন। আমরাদিগের
বাটীর পিছনেই বাগান ছিল। যমুনা হইতে শীতল বাতাস সেই বাগানে
নাচিয়া বেড়াইত। তথায় তাঁহার সহিত সাক্ষাৎ হইত।

মণিমালিনী কহিলেন, “এ কথাটি মনে পড়িলেও আমার বড় অসুখ
হয়। তুমি কুমারী হইয়া কি প্রকারে পুরুষের সহিত গোপনে প্রণয়
করিতে ?”

মৃ। অসুখ কেন সখি—তিনি আমার স্বামী। তিনি ভিন্ন অঙ্ক
কেহ কখন আমার স্বামী হবে না।

ম। কিন্তু এ পর্যন্ত ত তিনি স্বামী হয়েন নাই। রাগ করিও না

সখি ! তোমাকে ভগিনীর স্থায় ভালবাসি ; এই জন্ত বলিতেছি ।

মৃগালিনী অধোবদনে রহিলেন । ক্রমেক পরে চক্ষুর জল মুছিলেন । কহিলেন, “মণিমালিনি ! এ বিদেশে আমার আত্মীয় কেহ নাই । আমাকে ভাল কথা বলে, এমন কেহ নাই । যাহারা আমাকে ভালবাসিত, তাহাদিগের সহিত যে, আর কখনও সাক্ষাৎ হইবে, সে ভরসাও করি না । কেবলমাত্র তুমি আমার সখী—তুমি আমাকে ভাল না বাসিলে কে আর ভালবাসিবে ?”

ম । আমি তোমাকে ভালবাসিব, বাসিয়াও থাকি, কিন্তু যখন ঐ কথাটি মনে পড়ে, তখন মনে করি—

মৃগালিনী পুনশ্চ নীরবে রোদন করিলেন । কহিলেন, “সখি, তোমার মুখে এ কথা আমার সহ্য হয় না । যদি তুমি আমার নিকটে শপথ কর যে, যাহা বলিব, তাহা এ সংসারে কাহারও নিকটে ব্যক্ত করিবে না, তবে তোমার নিকট সকল কথা প্রকাশ করিয়া বলিতে পারি । তাহা হইলে তুমি আমাকে ভালোবাসিবে ।”

ম । আমি শপথ করিতেছি ।

মৃ । তোমার চুলে দেবতার ফুল আছে । তাহা ছুঁয়ে শপথ কর ।

মণিমালিনী তাই করিলেন

তখন মৃগালিনী মণিমালিনীর কানে যাহা কহিলেন, তাহার এক্ষণে বিস্তারিত ব্যাখ্যার প্রয়োজন নাই । শ্রবণে মণিমালিনী পরম শ্রীতি প্রকাশ করিলেন । গোপন কথা সমাপ্ত হইল ।

মণিমালিনী কহিলেন, “তাহার পর, মাধবাচার্য্যের সঙ্গে তুমি কি প্রকারে আসিলে ? সে বৃত্তান্ত বলিতেছিলে—বল ।”

মৃগালিনী কহিলেন, “আমি হেমচন্দ্রের আঙটি দেখিয়া তাঁকে দেখিবার ভরসায় বাগানে আসিলে দূতী কহিল যে, রাজপুত্র নৌকায় আছেন, নৌকা তীরে লাগিয়া রহিয়াছে । আমি অনেক দিন রাজপুত্রকে দেখি নাই । বড় ব্যগ্র হইয়াছিলাম, তাই বিবেচনাশূন্য হইলাম । তীরে আসিয়া দেখিলাম যে, যথার্থই একখানি নৌকা লাগিয়া রহিয়াছে । তাহার বাহিরে এক জন পুরুষ দাঁড়াইয়া রহিয়াছে, মনে করিলাম যে,

রাজপুত্র দাঁড়াইয়া রহিয়াছেন। আমি নৌকার নিকটে আসিলাম। নৌকার উপর যিনি দাঁড়াইয়া ছিলেন, তিনি আমার হাত ধরিয়া নৌকায় উঠাইলেন। অমনি নাবিকেরা নৌকা খুলিয়া দিল। কিন্তু আমি স্পর্শে ই বুঝিলাম যে, এ ব্যক্তি হেমচন্দ্র নহে।”

মণি। আর অমনি তুমি চীৎকার করিলে ?

মু। চীৎকার করি নাই। একবার ইচ্ছা করিয়াছিল বটে, কিন্তু চীৎকার আসিল না।

মণি। আমি হইলে জলে ঝাঁপ দিতাম।

মু। হেমচন্দ্রকে না দেখিয়া কেন মরিব ?

মণি। তারপর কি হইল ?

মু। প্রথমেই সে ব্যক্তি আমাকে “মা” বলিয়া বলিল, “আমি তোমাকে মাতৃ-সম্বোধন করিতেছি—আমি তোমার পুত্র, কোন আশঙ্কা করিও না। আমার নাম মাধবাচার্য্য, আমি হেমচন্দ্রের গুরু। কেবল হেমচন্দ্রের গুরু, এমত নহি; ভারতবর্ষের রাজগণের মধ্যে অনেকের সহিত আমার সেই সম্বন্ধ। আমি এখন কোন দৈবকার্য্যে নিযুক্ত আছি, তাহাতে হেমচন্দ্র আমার প্রধান সহায়; তুমি তাহার প্রধান বিদ্বান।”

আমি বলিলাম, “আমি বিদ্বান ?” মাধবাচার্য্য কহিলেন, “তুমিই বিদ্বান। যবনদিগের জয় করা, হিন্দুরাজ্যের পুনরুদ্ধার করা, সুসাধ্য কর্ম্ম নহে; হেমচন্দ্র ব্যতীত কাহারও সাধ্য নহে; হেমচন্দ্রও অনন্যমনা না হইলে তাঁহার দ্বারাও এ কাজ সিদ্ধ হইবে না। যত দিন তোমার সাক্ষাৎলাভ শুলভ থাকিবে, তত দিন হেমচন্দ্রের তুমি ভিন্ন অস্ত্র ব্রত নাই—সুতরাং যবন মারে কে ?” আমি কহিলাম, “বুঝিলাম, প্রথমে আমাকে না মারিলে যবন মারা হইবে না। আপনার শিষ্য কি আপনার দ্বারা আঙুটি পাঠাইয়া দিয়া আমাকে মারিতে আজ্ঞা করিয়াছেন ?”

মণি। এত কথা বুড়াকে বলিলে কি প্রকারে ?

মু। আমার বড় রাগ হইয়াছিল, বুড়ার কথায় আমার হাড় জলিয়া গিয়াছিল, আর বিপৎকালে লজ্জা কি ? মাধবাচার্য্য আমাকে মুখরাঃ

মনে করিলেন, মুখ হাসিলেন, কহিলেন, “আমি যে তোমাকে এইরূপে হস্তগত করিব, তাহা হেমচন্দ্র জানেন না।”

আমি মনে মনে কহিলাম, “তবে ঝাঁহার জন্য এ জীবন রাখিয়াছি, তাঁহার অনুমতি ব্যতীত সে জীবন ত্যাগ করিব না।” মাধবাচার্য্য বলিতে লাগিলেন, “তোমাকে প্রাণত্যাগ করিতে হইবে না—কেবল আপাততঃ হেমচন্দ্রকে ত্যাগ করিতে হইবে। ইহাতে তাঁহার পরম মঙ্গল। যাহাতে তিনি রাজ্যেশ্বর হইয়া তোমাকে রাজমহিষী করিতে পারেন, তাহা কি তোমার কৰ্ত্তব্য নহে? তোমার প্রণয়মস্ত্রে তিনি কাপুরুষ হইয়া রহিয়াছেন, তাঁহার সে ভাব দূর করা কি উচিত নহে?” আমি কহিলাম, “আমার সহিত সাক্ষাৎ যদি তাঁহার অনুচিত হয়, তবে তিনি কদাচ আমার সহিত আর সাক্ষাৎ করিবেন না।” মাধবাচার্য্য বলিলেন, “বালকে ভাবিয়া থাকে, বালক ও বৃদ্ধা উভয়ের বিবেচনা শক্তি তুল্য; কিন্তু তাহা নহে। হেমচন্দ্রের অপেক্ষা আমাদিগের পরিণামदर्শিতা যে বেশী, তাহাতে সন্দেহ করিও না। আর তুমি সম্মত হও বা না হও, যাহা সঙ্কল্প করিয়াছি, তাহা করিব। আমি তোমাকে দেশান্তরে লইয়া যাইব। গৌড় দেশে অতি শান্তস্বভাব এক ব্রাহ্মণের বাটীতে তোমাকে রাখিয়া আসিব। তিনি তোমাকে আপন কন্যার স্থায় যত্ন করিবেন। এক বৎসর পরে আমি তোমার পিতার নিকট তোমাকে আনিয়া দিব। আর সে সময়ে হেমচন্দ্র যে অবস্থায় থাকুন, তোমার সঙ্গে তাঁহার বিবাহ দেওয়াইব, ইহা সত্য করিলাম।” এই কথাতেই হউক, আর অগত্যাই হউক, আমি নিস্তব্ধ হইলাম। তাহার পর এইখানে আসিয়াছি। ও কি ও সই?

তৃতীয় পরিচ্ছেদ : ভিখারিণী

সখীদ্বয় এই সকল কথাবার্তা কহিতেছিলেন, এমন সময়ে কোমলকণ্ঠ-নিঃসৃত মধুর সঙ্গীত তাঁহাদিগের কর্ণরঞ্জে প্রবেশ করিল।

“মধুরাবাসিনি মধুরহাসিনি,
শ্যামবিলাসিনি—রে।”

মৃগালিনী কহিলেন, “সই, কোথায় গান করিতেছে ?”
মণিমালিনী কহিলেন, “বাহির বাড়িতে গায়িতেছে।”
গায়ক গায়িতে লাগিল—

“কহ লো নাগরি, গেহ পরিহরি,
কাহে বিবাসিনী—রে।”

মৃ! সখি! কে গায়িতেছে জান ?
মণি। কোন ভিখারিণী হইবে।
আবার গীত—

“বৃন্দাবনধন, গোপিনীমোহন,
কাহে তু তেয়াগী,—রে ;
দেশ দেশ পর, সো ঞ্চামসুন্দর,
ফিরে তুয়া লাগি—রে।”

মৃগালিনী বেগের সহিত কহিলেন, “সই! সই! উহাকে বাটীর
ভিতর ডাকিয়া আন।”

মণিমালিনী গায়িকাকে ডাকিতে গেলেন। ততক্ষণে সে গায়িতে
লাগিল—

“বিকচ নলিনে, যমুনা-পুলিনে,
বহুত পিয়াসা—রে।
চন্দ্রমাশালিনী, যা মধুযামিনী,
না মিটল আশা—রে।
সা নিশা—সমরি—”

এমন সময়ে মণিমালিনী উহাকে ডাকিয়া বাটীর ভিতর আনিলেন।
সে অস্ত্রপুরে আসিয়া পূর্ববৎ গায়িতে লাগিল—

“সা নিশা সমরি, কহ লো সুন্দরি,
কাহা মিলে দেখা—রে।
শুন যাওরে চলি, বাজয়ি মুরলী,
বনে বনে একা—রে।”

মৃগালিনী তাহাকে কহিলেন, “তোমার দিব্য গলা, তুমি গীতটি আবার গাও ।”

গায়িকার বয়স ষোল বৎসর । ষোড়শী, খর্বাকৃতা এবং কৃষ্ণাঙ্গা । সে প্রকৃত কৃষ্ণবর্ণা । তাই বলিয়া তাহার গায়ে ভ্রমর বসিলে যে দেখা যাইত না, অথবা কালি মাখিলে জল মাখিয়াছে বোধ হইত, কিংবা জল মাখিলে কালি বোধ হইত, এমত নহে । যেরূপ কৃষ্ণবর্ণ আপনার ঘরে থাকিলে শ্যামবর্ণ বলি, পরের ঘরে হইলে পাতুরে কালো বলি, ইহার সেইরূপ কৃষ্ণবর্ণ । কিন্তু বর্ণ যেমন হউক না কেন, ভিখারিণী কুরূপা নহে । তাহার অঙ্গ পরিষ্কার, সুমার্জিত, চাক্চিক্যবিশিষ্ট ; মুখখানি প্রফুল্ল, চক্ষু ছ’টি বড়, চঞ্চল, হাস্যময় ; লোচনতারা নিবিড়কৃষ্ণ, একটি তারার পার্শ্বে একটি তিল । গুষ্ঠাধর ক্ষুদ্র, রক্তপ্রভ, তদন্তরে অতি পরিষ্কার অমলশ্বেত, কন্দকলিকাসন্নিভ ছই শ্রেণী দন্ত । কেশগুলি সূক্ষ্ম, গ্রীবার উপরে মোহিনী কবরী, তাহাতে যুথিকার মালা বেষ্টিত । যৌবন-সম্বন্ধে শরীরের গঠন সুন্দর হইয়াছিল, যেন কৃষ্ণপ্রস্তরে কোন শিল্পকার পুস্তল খোদিত করিয়াছিল । পরিচ্ছদ অতি সামান্য, কিন্তু পরিষ্কার—খুলিকর্দমপরিপূর্ণ নহে । অঙ্গ একেবারে নিরাভরণ নহে, অথচ অলঙ্কার-গুলি ভিখারীর যোগ্য বটে । প্রকোষ্ঠে পিত্তলের বলয়, *গলায় কাষ্ঠের মালা, নাসিকায় ক্ষুদ্র একটি তিলক, ভ্রমধ্যে ক্ষুদ্র একটি চন্দনের টিপ । সে আঞ্জামত পূর্ববৎ গায়িতে লাগিল—

“মথুরাবাসিনি, মধুরহাসিনি, শ্যামবিলাসিনি—রে ।*
 কহ লো নাগরি, গেহ পরিহরি, কাহে বিবাসিনী—রে ॥
 বৃন্দাবনধন, গোপিনীমোহন, কাহে তু তেয়াগী—রে ।
 দেশ দেশ পর, সো শ্যামসুন্দর, ফিরে তুয়া লাগি—রে ॥
 বিকচ নলিনে, যমুনাপুলিনে, বহুত পিয়াসা—রে ।
 চন্দ্রমাশালিনী, যা মধুযামিনী, না মিটল আশা—রে ॥
 সা নিশা সমরি, কহ লো সুন্দরী, কাঁহা মিলে দেখা—রে ।
 শুনি, যাওয়ে চলি, বাজয়ি মুরলী, বনে বনে একা—রে ॥”

* এই গীত ডিমে তেতাল্লা ভাল যোগে জরজরন্তী রাগিণীতে গেল ।

গীত সমাপ্ত হইলে মুণালিনী কহিলেন, “তুমি স্মন্দর গাও । সেই মণিমালিনি, ইহাকে কিছু দিলে ভাল হয় । একে কিছু দাও না ?”

মণিমালিনী পুরস্কার আনিতে গেলেন, ইত্যবসরে মুণালিনী বালিকাকে নিকটে ডাকিয়া জিজ্ঞাসা করিলেন, “শুন, ভিখারিণি ! তোমার নাম কি ?”

ভিখা । আমার নাম গিরিজায়া ।

মুণা । তোমার বাড়ী কোথায় ?

গি । এই নগরেই থাকি ।

মু । তুমি কি গীত গাইয়া দিনপাত কর ?

গি । আর কিছুই ত জানি না ।

মু । তুমি গীত সকল কোথায় পাও ?

গি । যেখানে যা পাই তাই শিখি ।

মু । এ গীতটি কোথায় শিখিলে ?

গি । একটি বেণে আমাকে শিখাইয়াছে ।

মু । সে বেণে কোথায় থাকে ?

গি । এই নগরেই আছে ।

মুণালিনীর মুখ হর্ষোৎফুল্ল হইল—প্রাতঃসূর্য্যকরম্পর্শে যেন পদ্ম ফুটিয়া উঠিল । কহিলেন, “বেণেতে বাণিজ্য করে—সে বণিক্ কিসের বাণিজ্য করে ?”

গি । সবার যে ব্যবসা, তারও সেই ব্যবসা ।

মু । সে কিসের ব্যবসা ?

গি । কথার ব্যবসা ।

মু । এ নূতন ব্যবসা বটে । তাহাতে লাভালাভ কিরূপ ?

গি । ইহাতে লাভের অংশ ভালবাসা, অলাভ কান্দল ।

মু । তুমিও ব্যবসায়ী বটে । ইহার মহাজন কে ?

গি । যে মহাজন ।

মু । তুমি ইহার কি ?

গি । নগদা মুটে ।

মু। ভাল তোমার বোঝা নামাও। সামগ্রী কি আছে দেখি।

গি। এ সামগ্রী দেখে না ; শুনে।

মু। ভাল—শুনি।

গিরিজায়া গাইতে লাগিল—

“যমুনার জলে মোর, কি নিধি মিলিল।

ঝাঁপ দিয়া পশি জলে, যতনে তুলিয়া গলে,

পরেছিলু কুতূহলে, যে রতনে।

নিজ্রার আবেশে মোর, গৃহেতে পশিল চোর,

কণ্ঠের কাটিল ডোর মণি হরে নিল।”

মৃগালিনী, বাষ্পপীড়িতলোচনে, গদগদস্বরে, অথচ হাসিয়া কহিলেন,
“এ কোন্ চোরের কথা ?”

গি। বেণে বলেছেন, চুরির ধন লইয়াই তাঁহার ব্যাপার।

মু। তাঁহাকে বলিও যে, চোরা ব্যাপারে সাধু লোকের শ্রাণ বাঁচে না।

গি। বুঝি ব্যাপারিরও নয়।

মু। কেন, ব্যাপারির কি ?

গিরিজায়া গায়িল—

“ঘাট বাট তট মাঠ ফিরি ফিরি বহু দেশ।

কাঁহা মেরে কাস্ত বরণ, কাঁহা রাজবেশ ॥

হিয়া পর রোপণু পঙ্কজ, কৈলু যতন ভারি।

সোহি পঙ্কজ কাঁহা মোর, কাঁহা মৃগাল হামারি ॥”

মৃগালিনী স্নেহে কোমল স্বরে কহিলেন, “মৃগাল কোথায় ? আমি
সন্ধান বলিয়া দিতে পারি, তাহা মনে রাখিতে পারিবে ?”

গি। পারিব—কোথায় বল।

মৃগালিনী বলিলেন,

“কন্টকে গঠিল বিধি, মৃগাল অথমে।

জলে তারে ডুবাইল পীড়িয়া মরমে ॥

রাজহংস দেখি এক নয়নরঞ্জন।

চরণ বেড়িয়া তারে, করিল বন্ধন ॥

বলে, হুসরাজ কোথা করিবে গমন ।
 হৃদয়কমলে মোর, তোমার আসন ॥
 আসিয়া বসিল হুস হৃদয়কমলে ।
 কাঁপিল কণ্টক সহ মৃগালিনী জলে ॥
 হেনকালে কাল মেঘ উঠিল আকাশে ।
 উড়িল মরালরাজ, মানস বিলাসে ॥
 ভঙ্গিল হৃদয়পদ্ম তার বেগভরে ।
 ডুবিল অতল জলে, মৃগালিনী মরে ॥

কেমন গিরিজায়া, গীত শিখিতে পারিবে ?”

গিরি। তা পারিব। চক্ষের জলটুকু শুদ্ধ কি শিখিব ?

মৃ। না। এ ব্যবসায়ের আমার লাভের মধ্যে ঐটুকু।

মৃগালিনী গিরিজায়াকে এই কবিতাগুলি অভ্যাস করাইতেছিলেন,
 এমন সময়ে মণিমালিনীর পদধ্বনি শুনিতে পাইলেন। মণিমালিনী
 তাঁহার স্নেহশালিনী সখী—সকলই জানিয়াছিলেন। তথাপি মণিমালিনী
 পিতৃপ্রতিজ্ঞাভঙ্গের সহায়তা করিবে, এরূপ তাঁহার বিশ্বাস জন্মিল না।
 অতএব তিনি এ সকল কথা সখীর নিকট গোপনে যত্নবতী হইয়া
 গিরিজায়াকে কহিলেন, “আজি আর কাজ নাই; বেণের সঙ্গে সাক্ষাৎ
 করিও। তোমার বোঝা কাল আবার আনিও। যদি কিনিবার কোন
 সামগ্রী থাকে, তবে তাহা আমি কিনিব।”

গিরিজায়া বিদায় হইল। মৃগালিনী যে তাহাকে পারিতোষিক
 দিবার অভিপ্রায় করিয়াছিলেন, তাহা ভুলিয়া গিয়াছিলেন।

গিরিজায়া কতিপয় পদ গমন করিলে মণিমালিনী কিছু চাউল,
 একছড়া কলা, একখানি পুরাতন বস্ত্র, আর কিছু কড়ি আনিয়া
 গিরিজায়াকে দিলেন। আর মৃগালিনীও একখানি পুরাতন বস্ত্র দিতে
 গেলেন। দিবার সময়ে উহার কাণে কাণে কহিলেন, “আমার ধৈর্য্য
 রহিতেছে না, কালি পর্য্যন্ত অপেক্ষা করিতে পারিব না; তুমি আজ রাত্রে
 প্রহরেকের সময় আসিয়া এই গৃহের উত্তর দিকে প্রাচীরমূলে অবস্থিত।

করিও ; তথায় আমার সাক্ষাৎ পাইবে । তোমার বণিক্ যদি আসেন
সঙ্গে আনিও ।”

গিরিজায়া কহিল, “বুঝিয়াছি, আমি নিশ্চিত আসিব ।”

মৃগালিনী মণিমালিনীর নিকট প্রত্যাগতা হইলে মণিমালিনী কহিলেন,
“সই, ভিখারিণীকে কাণে কাণে কি বলিতেছিলে ?”

মৃগালিনী কহিলেন,

“কি বলিব সই—

সই মনের কথা সই, সই মনের কথা সই—

কাণে কাণে কি কথাটি ব’লে দিলি ওই ॥

সই ফিরে ক’না সই, সই ফিরে ক’না সই ।

সই কথা কোসু কথা কব, নইলে কারো নই ।”

মণিমালিনী হাসিয়া কহিলেন, “হ’লি কি লো সই ?”

মৃগালিনী কহিলেন, “তোমারই সই ।”

চতুর্থ পরিচ্ছেদ : দূতী

লক্ষণাবতী নগরীর প্রদেশান্তরে সর্ব্বধন বণিকের বাটীতে হেমচন্দ্র
অবস্থিতি করিতেছিলেন । বণিকের গৃহদ্বারে এক অশোকবৃক্ষ বিরাজ
করিতেছিল । অপরাহ্নে তাহার তলে উপবেশন করিয়া একটি কুমুমিত
অশোকশাখা নিম্প্রয়োজনে হেমচন্দ্র ছুরিকা দ্বারা খণ্ড খণ্ড করিতেছিলেন,
এবং মুহুমুহুঃ পথপ্রতি দৃষ্টি করিতেছিলেন, যেন কাহারও প্রতীক্ষা
করিতেছেন । যাহার প্রতীক্ষা করিতেছিলেন, সে আসিল না । ভৃত্য
দিগ্বিজয় আসিল, হেমচন্দ্র দিগ্বিজয়কে কহিলেন, “দিগ্বিজয়, ভিখারিণী
আজি এখনও আসিল না । আমি বড় ব্যস্ত হইয়াছি । তুমি একবার
তাহার সন্ধানে যাও ।”

“যে আজ্ঞে” বলিয়া দিগ্বিজয় গিরিজায়ার সন্ধানে চলিল । নগরীর
রাজপথে গিরিজায়ার সহিত সাক্ষাৎ হইল ।

গিরিজায়া বলিল, “কে ও দিগ্বিজয় ?” দিগ্বিজয় রাগ করিয়া কহিল,
“আমার নাম দিগ্বিজয় ।”

গি। ভাল দিগ্বিজয়—আজি কোন্ দিক্ জয় করিতে চলিয়াছ ?

দি। তোমার দিক্।

গি। আমি কি একটা দিক্ ? তোমার দিগ্বিদিগ্জ্ঞান নাই।

দি। কেমন করিয়া থাকিবে—তুমি যে অন্ধকার। এখন চল,
প্রভু তোমাকে ডাকিয়াছেন।

গি। কেন ?

দি। তোমার সঙ্গে বুঝি আমার বিবাহ দিবেন।

গি। কেন তোমার কি মুখ-অগ্নি করিবার আর লোক জুটিল না ?

দি। না। সে কাজ তোমাকেই করিতে হইবে। এখন চল।

গি। পরের জগ্গেই মলেম। তবে চল।

এই বলিয়া গিরিজয়া দিগ্বিজয়ের সঙ্গে চলিলেন। দিগ্বিজয় অশোক-
তলস্থ হেমচন্দ্রকে দেখাইয়া দিয়া অগ্ৰত্ৰ গমন করিল। হেমচন্দ্র অগ্ৰমনে
মুহু মুহু গাইতেছিলেন,

“বিকচ নলিনে, যমুনা-পুলিনে, বহুত পিয়াসা রে—”

গিরিজয়া পশ্চাৎ হইতে গায়িল—

“চন্দ্রমাশালিনী, যা মধুযামিনী, না মিটল আশা রে।”

গিরিজয়াকে দেখিয়া হেমচন্দ্রের মুখ প্রফুল্ল হইল। কহিলেন, “কে
গিরিজয়া! আশা কি মিটল?”

গি। কার আশা ? আপনার না আমার ?

হে। আমার আশা। তাহা হইলেই তোমার মিটিবে।

গি। আপনার আশা কি প্রকারে মিটিবে ? লোকে বলে রাজা
রাজ্‌ড়ার আশা কিছুতেই মিটে না।

হে। আমার অতি সামান্য আশা।

গি। যদি কখন যুগালিনীর সাক্ষাৎ পাই, তবে এ কথা তাঁহার
নিকট বলিব।

হেমচন্দ্র বিষণ্ণ হইলেন। কহিলেন, “তবে কি আজিও যুগালিনীর
সন্ধান পাও নাই ? আজি কোন্ পাড়ায় গীত গাইতে গিয়াছিলে ?”

গি। অনেক পাড়ায়—সে পরিচয় আপনার নিকট নিত্য নিত্য কি

দিব ? অল্প কথা বলুন ।

হেমচন্দ্র নিঃশ্বাস ত্যাগ করিয়া কহিলেন, “বুঝিলাম বিধাতা বিষুখ ।
ভাল, পুনর্ব্বার কালি সন্ধানে যাইবে ।”

গিরিজায়া তখন প্রণাম করিয়া কপট বিদায়ের উত্তোগ করিল । গমনকালে
হেমচন্দ্র তাহাকে কহিলেন, “গিরিজায়া, তুমি হাসিতেছ না, কিন্তু তোমার
চক্ষু হাসিতেছে । আজ কি তোমার গান শুনিয়া কেহ কিছু বালয়াছে ।”

গি । কে কি বালবে ? এক মাগী তাড়া করিয়া মারিতে আসিয়াছিল
—বলে, মথুরাবাসিনীর স্ত্রী শ্যামসুন্দরের ত মাথাব্যথা পড়িয়াছে ।

হেমচন্দ্র দাঃখ্যাস ত্যাগ করিয়া অক্ষুটস্বরে, যেন আপনা আপনি
কহিতে লাগিলেন, “এত যত্নেও যদি সন্ধান না পাইলাম, তবে আর বৃথা
আশা—কেন মিছা কালক্ষেপ করিয়া আত্মকর্ম্ম নষ্ট করি ;—গিরিজায়ে,
কালি তোমাদিগের নগর হহতে বিদায় হইব ।”

“তথাস্তু” বলিয়া গিরিজায়া মৃদু মৃদু গান করিতে লাগিল,—

“শুনি যাওয়ে চলি, বাজয়ি মুরলী, বনে বনে একা রে ।”
হেমচন্দ্র কহিলেন, “ও গান এই পর্য্যন্ত । অন্য গীত গাও ।”
গিরিজায়া গায়িল,

“যে ফুল ফুটিত সখি, গৃহতরুশাখে,
কেন রে পবনা, উড়ালি তাকে ।”

হেমচন্দ্র কহিলেন, “পবনে যে ফুল উড়ে, তাহার জন্য হুঃখ কি ? ভাল
গীত গাও ।”

গিরিজায়া গায়িল,

“কণ্টকে গঠিল বিধি, মৃগাল অধমে ।

জলে তারে ডুবাইল পীড়িয়া মরমে ॥”

হেম । কি, কি ? মৃগাল কি ?

গি । কণ্টকে গঠিল বিধি, মৃগাল অধমে ।

জলে তারে ডুবাইল পীড়িয়া মরমে ॥

রাজহংস দেখি এক নয়নরঞ্জন ।

চরণ বেড়িয়া তারে করিল বন্ধন ॥

না—অন্ত গান গাই ।

হে । না—না—না—এই গান—এই গান গাও । তুমি রাক্ষসী
গি । বলে, হংসরাজ কোথা করিবে গমন ।

হৃদয়কমলে দিব তোমার আসন ॥

আসিয়া বসিল হংস হৃদয়কমলে ।

কাঁপিল কণ্টকসহ মুণালিনী জলে ॥

হে । গিরিজায়া ! গিরি—এ গীত তোমাকে কে শিখাইল ?

গি । (সহাস্তে)

হেন কালে কালমেঘ উঠিল আকাশে ।

উড়িল মরালরাজ মানস বিলাসে ॥

ভাঙ্গিল হৃদয়পদ্ম তার বেগভরে ।

ভুবিয়া অতল জলে মুণালিনী মরে ॥

হেমচন্দ্র বাস্পাকুললোচনে গদগদস্বরে গিরিজায়াকে কহিলেন, “এ
আমারই মুণালিনী । তুমি তাহাকে কোথায় দেখিলে ?”

গি । দেখিলাম সরোবরে, কাঁপিছে পবনভরে,
মুণাল উপরে মুণালিনী ।

হে । এখন রূপক রাখ, আমার কথার উত্তর দাও—কোথা
মুণালিনী ?

গি । এই নগরে ।

হেমচন্দ্র রুগ্নভাবে কহিলেন, “তা ত আমি অনেক দিন জানি ।
নগরে কোন্ স্থানে ?”

গি । হৃষীকেশ শর্ম্মার বাড়ী ।

হে । কি পাপ ! সে কথা আমিই তোমাকে বলিয়া দিয়াছিলাম
এত দিন ত অহংস করিতে পার নাই, এখন কি সন্ধান করিয়াছ ?

গি । সন্ধান করিয়াছি ?

হেমচন্দ্র দুই বিন্দু—দুই বিন্দু মাত্র অশ্রুমোচন করিলেন । পুনরপি
কহিলেন, “সে এখান হইতে কতদূর ?”

গি । অনেক দূর ।

হে । এখন হইতে কোন্ দিকে যাইতে হয় ?

গি । এখন হইতে দক্ষিণ, তার পর পূর্ব, তার পর উত্তর, তার পর পশ্চিম—

হেমচন্দ্র হস্ত মুষ্টিবদ্ধ করিলেন । কহিলেন, “এ সময়ে তামাসা রাখ—নহিলে মাথা ভাঙ্গিয়া ফেলিব ।”

গি । শাস্ত হউন । পথ বলিয়া দিলে কি আপনি চিনিতে পারিবেন ? যদি তা না পারিবেন, তবে জিজ্ঞাসার প্রয়োজন ? আজ্ঞা করিলে আমি সঙ্গে করিয়া লইয়া যাইব ।

মেঘমুক্ত সূর্যোর ন্যায় হেমচন্দ্রের মুখ প্রফুল্ল হইল । তিনি কহিলেন, “তোমার সর্বকামনা সিদ্ধ হউক—মৃগালিনী কি বলিল ?”

গি । তা ত বলিয়াছি ।—

“ডুবিয়া অতল জলে মৃগালিনী মরে ।”

হে । মৃগালিনী কেমন আছে ?

গি । দেখিলাম শরীরে কোন পীড়া নাই ।

হে । সুখে আছে কি ক্রেশে আছে—কি বুঝিলে ?

গি । শরীরে গহনা, পরণে ভাল কাপড়—হৃষীকেশ ব্রাহ্মণের হুয়ার সহ ।

হে । তুমি অধঃপাতে যাও ; মনের কথা কিছু বুঝিলে ?

গি । বর্ষাকালের পদ্মের মত ; মুখখানি কেবল জলে ভাসিতেছে ।

হে । পরগৃহে কি ভাবে আছে ?

গি । এই অশোক ফুলের স্তবকের মত । আপনার গৌরবে মাপনি নম্র ।

হে । গিরিজায়া ! তুমি বয়সে বালিকা মাত্র । তোমার ছায়ালিকা আর দেখি নাই ।

গি । মাথা ভাঙ্গিবার উপযুক্ত পাত্রও এমন আর দেখেন নাই ।

হে । সে অপরাধ লইও না, মৃগালিনী আর কি বলিল ?

গি । যো দিন জানকী—

হে । আবার ?

গি । যো দিন জ্ঞানকী, রঘুবীর নিরখি—

হেমচন্দ্র গিরিজায়ার কেশাকর্ষণ করিলেন । তখন সে কহিল, “ছাড় ! ছাড় ! বলি ! বলি !”

“বল” বলিয়া হেমচন্দ্র কেশ ত্যাগ করিলেন ।

তখন গিরিজায়া আত্মোপাস্ত মুণালিনীর সহিত কথোপকথন বিবৃত করিল । পরে কহিল, “মহাশয়, আপনি যদি মুণালিনীকে দেখিতে চান, তবে আমার সঙ্গে এক প্রহর রাত্রে যাত্রা করিবেন ।”

গিরিজায়ার কথা সমাপ্ত হইলে, হেমচন্দ্র অনেকক্ষণ নিশেধে অশোকতলে পাদচারণ করিতে লাগিলেন । বহুক্ষণ পরে কিছুমাত্র না বলিয়া গৃহমধ্যে প্রবেশ করিলেন এবং তথা হইতে একখানি পত্র আনিয়া গিরিজায়ার হস্তে দিলেন, এবং কহিলেন, “মুণালিনীর সহিত সাক্ষাতে আমার এক্ষণে অধিকার নাই । তুমি রাত্রে কথামত তাঁহার সহিত সাক্ষাৎ করিবে এবং এই পত্র তাঁহাকে দিবে । কহিবে, দেবতা প্রসন্ন হইলে অবশ্য শীঘ্র বৎসরের মধ্যে সাক্ষাৎ হইবে । মুণালিনী কি বলেন, আজ রাত্রেই আমাকে বলিয়া যাইও ।”

গিরিজায়া বিদায় হইলে, হেমচন্দ্র অনেকক্ষণ চিন্তিতাস্তঃকরণে অশোকবৃক্ষতলে তৃণশয্যায় শয়ন করিয়া রহিলেন । ভূজোপরি মস্তক রক্ষা করিয়া, পৃথিবীর দিকে মুখ রাখিয়া, শয়ান রহিলেন । কিয়ৎকাল পরে, সহসা তাঁহার পৃষ্ঠদেশে কঠিন করম্পর্শ হইল । মুখ ফিরাইয়া দেখিলেন, সম্মুখে মাধবাচার্য্য ।

মাধবাচার্য্য কহিলেন, “বৎস ! গাত্ৰোখান কর । আমি তোমার প্রতি অসম্বৃত্ত হইয়াছি—সম্বৃত্ত হইয়াছি । তুমি আমাকে দেখিয়া বিস্মিতের ন্যায় কেন চাহিয়া রহিয়াছ ?”

হেমচন্দ্র কহিলেন, “আপনি এখানে কোথা হইতে আসিলেন ?”

মাধবাচার্য্য এ কথায় কোন উত্তর না দিয়া কহিতে লাগিলেন, “তুমি এ পর্য্যন্ত নবদ্বীপে না গিয়া পথে বিলম্ব করিতেছ—ইহাতে তোমার প্রতি অসম্বৃত্ত হইয়াছি । আর তুমি যে মুণালিনীর সন্ধান পাইয়াও আত্মসত্য প্রতিপালনের জন্ত তাঁহার সাক্ষাতের সুযোগ উপেক্ষা করিলে,

এজন্য তোমার প্রতি সম্বন্ধ হইয়াছি। তোমাকে কোন ভিন্নকার করিব না। কিন্তু এখানে তোমার আর বিলম্ব করা হইবে না। মুণালিনীর প্রত্যাশার প্রতীক্ষা করা হইবে না। বেগবান হৃদয়কে বিশ্বাস নাই। আমি আজি নবদ্বীপে যাত্রা করিব। তোমাকে আমার সঙ্গে যাইতে হইবে—নৌকা প্রস্তুত আছে। অস্ত্রশস্ত্রাদি গৃহমধ্য হইতে লইয়া আইস। আমার সঙ্গে চল।”

হেমচন্দ্র নিঃশ্বাস ত্যাগ করিয়া কহিলেন, “হানি নাই—আমি আশা ভরসা বিসর্জন করিয়াছি। চলুন। কিন্তু আপনি—কামচর না অন্তর্ধামী ?”

এই বলিয়া হেমচন্দ্র গৃহমধ্যে পুনঃপ্রবেশপূর্বক বণিকের নিকট বিদায় গ্রহণ করিলেন ; এবং আপনার সম্পত্তি এক জন বাহকের স্কন্ধে দিয়া আচার্য্যের অনুবর্তী হইলেন।

পঞ্চম পরিচ্ছেদ : লুন্ধ

মুণালিনী বা গিরিজায়া এতন্মধ্যে কেহই আত্মপ্রতিশ্রুতি বিস্মৃত হইলেন না। উভয়ে প্রহরেক রাত্রিতে হৃদয়কেশের গৃহপার্শ্বে সংমিলিত হইলেন। মুণালিনী গিরিজায়াকে দেখিবামাত্র কহিলেন, “কই, হেমচন্দ্র কোথায় ?”

গিরিজায়া কহিল, “তিনি আইসেন নাই।”

“আইসেন নাই !” এই কথাটি মুণালিনীর অন্তস্তল হইতে ধ্বনিত হইল। ক্ষণেক উভয়ে নীরব। তৎপরে মুণালিনী জিজ্ঞাসা করিলেন, “কেন আসিলেন না ?”

গি। তাহা আমি জানি না। এই পত্র দিয়াছেন।

এই বলিয়া গিরিজায়া তাঁহার হস্তে পত্র দিল। মুণালিনী কহিলেন, “কি প্রকারেই বা পড়ি। গৃহে গিয়া প্রদীপ জালিয়া পড়িলে মণিমালিনী উঠিবে।”

গিরিজায়া কহিল, “অধীরা হইও না। আমি প্রদীপ, তেল, চক্‌মকি,

সোলা সকলই আনিয়া রাখিয়াছি। এখনই আলো করিতেছি।”

গিরিজায়া শীঘ্রহস্তে অগ্নি উৎপাদন করিয়া প্রদীপ জ্বালিত করিল। অগ্নুৎপাদনশক একজন গৃহবাসীর কর্ণে প্রবেশ করিল। দীপালোকে সে দেখিতে পাইল।

গিরিজায়া দীপ জ্বালিত করিলে মুণালিনী নিম্নলিখিতমত মনে মনে পাঠ করিলেন—

“মুণালিনি ! কি বলিয়া আমি তোমাকে পত্র লিখিব ? তুমি আমার জন্ম দেশত্যাগিনী হইয়া পবগৃহে কষ্টে কালাতিপাত করিতেছ। যদি দৈবানুগ্রহে তোমাব সন্ধান পাওয়াই, তথাপি তোমার সহিত সাক্ষাৎ করিলাম না। তুমি ইহাতে আমাকে অপ্রণয়ী মনে করিবে— অথবা অত্যা হইলে মনে করিত—তুমি করিবে না। আমি কোন বিশেষ ব্রতে নিযুক্ত আছি—যদি তৎপ্রতি অবহেলা করি, তবে আমি কুলাঙ্গার। তৎসাধন জন্ম আমি গুরুত্ব নিকট প্রতিজ্ঞাবদ্ধ হইয়াছি যে, তোমার সহিত এ স্থানে সাক্ষাৎ করিব না। আমি নিশ্চিত জানি যে, আমি যে তোমার জন্ম সত্যভঙ্গ করিব, তোমারও এমন সাধ নহে। অতএব এক বৎসর কোনক্রমে দিন যাপন কর। পরে ঈশ্বর প্রসন্ন হয়েন, তবে অচিরে তোমাকে রাজপুরবধু করিয়া আশ্বাসুখ সম্পূর্ণ করিব। এই অল্পবয়স্কা প্রগল্ভবুদ্ধি বালিকাহস্তে উত্তর প্রেরণ করিও।”

মুণালিনী পত্র পড়িয়া গিরিজায়াকে কহিলেন, “গিরিজায়া ! আমার পাতা, লেখনী কিছুই নাই যে উত্তর লিখি। তুমি মুখে আমার প্রত্যাশার লইয়া যাও। তুমি বিশ্বাসী, পুরস্কার স্বরূপ আমার অঙ্গের অলঙ্কার দিতেছি।”

গিরিজায়া কহিল, “উত্তর কাহার নিকট লইয়া যাইব ? তিনি আমাকে পত্র দিয়া বিদায় করিবার সময় বলিয়া দিয়াছিলেন যে, ‘আজ রাত্রেই আমাকে প্রত্যাশার আনিয়া দিও।’ আমিও স্বীকার করিয়াছিলাম। আসিবার সময় মনে করিলাম, হয়ত তোমার নিকট লিখিবার সামগ্রী কিছুই নাই ; এজন্য সে সকল ঘোটপাট করিয়া আনিবার জন্ম তাঁহার উদ্দেশে গেলাম। তাঁহার সাক্ষাৎ পাইলাম না। শুনিলাম তিনি

সন্ধ্যাকালে নবদ্বীপ যাত্রা করিয়াছেন।”

মৃ। নবদ্বীপ ?

গি। নবদ্বীপ।

মৃ। সন্ধ্যাকালেই ?

গি। সন্ধ্যাকালেই। শুনিলাম তাঁহার গুরু আসিয়া তাঁহাকে সঙ্গে করিয়া লইয়া গিয়াছেন।

মৃ। মাধবাচার্য্য। মাধবাচার্য্যই আমার কাল।

পরে অনেকক্ষণ চিন্তা করিয়া মৃণালিনী কহিলেন, “গিরিজায়া, তুমি বিদায় হও। আর আমি ঘরের বাহিরে থাকিব না।”

গিরিজায়া কহিল, “আমি চলিলাম।” এই বলিয়া গিরিজায়া বিদায় হইল। তাহার মৃহু মৃহু গীতধ্বনি শুনিতে শুনিতে মৃণালিনী গৃহমধ্যে পুনঃপ্রবেশ করিলেন।

মৃণালিনী বাটীর মধ্যে প্রবেশ করিয়া যেমন দ্বার রুদ্ধ করিবার উদ্যোগ করিতেছিলেন, অমনি পশ্চাৎ হইতে কে আসিয়া তাঁহার হাত ধরিল। মৃণালিনী চমকিয়া উঠিলেন। হস্তরোধকারী কহিল, “তবে সাধিব! এইবার জ্বালে পড়িয়াছ। অল্পগৃহীত ব্যক্তিটা কে শুনিতে পাই না?”

মৃণালিনী তখন ক্রোধে কম্পিতা হইয়া কহিলেন, “ব্যোমকেশ! ব্রাহ্মণকূলে পাষণ্ড! হাত ছাড়।”

ব্যোমকেশ হ্রস্বীকেশের পুত্র। এ ব্যক্তি ঘোর মূর্খ এবং দুঃশরিত্র। সে মৃণালিনীর প্রতি বিশেষ অনুরক্ত হইয়াছিল এবং স্বাভিলাষ পূরণের অণু কোন সম্ভাবনা নাই জানিয়া বলপ্রকাশে কৃতসঙ্কল্প হইয়াছিল। কিন্তু মৃণালিনী মণিমালিনীর সঙ্গ প্রায় ত্যাগ করিতেন না, এ জন্ম ব্যোমকেশ এ পর্য্যন্ত অবসর প্রাপ্ত হয় নাই।

মৃণালিনীর ভৎসনায় ব্যোমকেশ কহিল, “কেন হাত ছাড়িব? হাতছাড়া কি করতে আছে? ছাড়াছাড়িতে কাজ কি, ভাই? একটা মনের দুঃখ বলি, আমি কি মনুষ্য নই? যদি একের মনোরঞ্জন করিয়াছ, তবে অপরের পার না?”

মু। কুলান্দার! যদি না ছাড়িবে, তবে এখনই ডাকিয়া গৃহস্থ-সকলকে উঠাইব।

ব্যো। উঠাও। আমি কহিব, অভিসারিকাকে ধরিয়াছি।

মু। তবে অধঃপাতে যাও। এই বলিয়া মৃগালিনী সবলে হস্তমোচন জ্ঞপ্তি চেষ্টা করিলেন, কিন্তু কৃতকাৰ্য্য হইতে পারিলেন না। ব্যোমকেশ কহিল, “অধীর হইও না। আমার মনোরথ পূর্ণ হইলেই আমি তোমায় ত্যাগ করিব। এখন তোমার সেই ভগিনী মণিমালিনী কোথায়?”

মু। আমিই তোমার ভগিনী।

ব্যোম। তুমি আমার সম্বন্ধীর ভগিনী—আমার ব্রাহ্মণীর ভায়ের ভগিনী—আমার প্রাণাধিকা রাধিকা! সর্বার্থসাধিকা!

এই বলিয়া ব্যোমকেশ মৃগালিনীকে হস্তদ্বারা আকর্ষণ করিয়া লইয়া চলিল। যখন মাধবাচার্য্য তাঁহাকে হরণ করিয়াছিল, তখন মৃগালিনী স্ত্রীস্বভাবশুলভ চীৎকারে রতি দেখান নাই, এখনও শব্দ করিলেন না।

কিন্তু মৃগালিনী আর সছ করিতে পারিলেন না। মনে মনে লক্ষ ব্রাহ্মণকে প্রণাম করিয়া সবলে ব্যোমকেশকে পদাঘাত করিলেন। ব্যোমকেশ লাথি খাইয়া বলিল, “ভাল ভাল, ধন্য হইলাম! ও চরণস্পর্শে মোক্ষপদ পাইব। সুন্দরি! তুমি আমার দ্রৌপদী—আমি তোমার জয়দ্রথ।”

পশ্চাৎ হইতে কে বলিল, “আর আমি তোমার অর্জুন।”

অকস্মাৎ ব্যোমকেশ কাতরস্বরে বিকট চীৎকার করিয়া উঠিল, “রাক্ষসি! তোর দস্তে কি বিষ আছে?” এই বলিয়া ব্যোমকেশ মৃগালিনীর হস্ত ত্যাগ করিয়া আপন পৃষ্ঠে হস্তমার্জ্জন করিতে লাগিল। স্পর্শানুভাবে জানিল যে পৃষ্ঠ দিয়া দরদরিত রুধির পড়িতেছে।

মৃগালিনী মুক্তহস্তা হইয়াও পলাইলেন না। তিনিও প্রথমে ব্যোমকেশের গ্নায় বিস্মিতা হইয়াছিলেন, কেন না তিনি ত ব্যোমকেশকে দংশন করেন নাই। ভুল্লকোচিত কার্য্য তাঁহার করণীয় নহে। কিন্তু তখনই নক্ষত্রালোকে খর্ব্বাকৃতি বালিকামূর্ত্তি সম্মুখ হইতে অপসৃত্য।

হইতেছে দেখিতে পাইলেন। গিরিজায়া তাঁহার বসনাকর্ষণ করিয়া মুহূষ্মরে, “পলাইয়া আইস” বলিয়া স্বয়ং পলায়ন করিল।

পলায়ন মুণালিনীর স্বভাবসঙ্গত নহে। তিনি পলায়ন করিলেন না। ব্যোমকেশ প্রাক্গণে দাঁড়াইয়া আর্তনাদ করিতেছে এবং কাতরোক্তি করিতেছে দেখিয়া, তিনি গজেন্দ্রগমনে নিজ শয়নাগার অভিমুখে চলিলেন। কিন্তু তৎকালে ব্যোমকেশের আর্তনাদে গৃহস্থ সকলেই জাগরিত হইয়াছিল। সম্মুখে হ্রষীকেশ। হ্রষীকেশ পুত্রকে শশব্যস্ত দেখিয়া জিজ্ঞাসা করিলেন, “কি হইয়াছে? কেন ষাঁড়ের মত চীৎকার করিতেছ?”

ব্যোমকেশ কহিল, “মুণালিনী অভিসারে গমন করিয়াছিল, আমি তাহাকে ধৃত করিয়াছি বলিয়া সে আমার পৃষ্ঠে দংশন করিয়াছে।”

হ্রষীকেশ পুত্রের কুরীতি কিছুই জানিতেন না। মুণালিনীকে প্রাক্গণ হইতে উঠিতে দেখিয়া এ কথায় তাঁহার বিশ্বাস হইল। তৎকালে তিনি মুণালিনীকে কিছুই বলিলেন না। নিঃশব্দে গজগামিনীর পশ্চাৎ তাঁহার শয়নাগার আসিলেন।

ষষ্ঠ পরিচ্ছেদ : হ্রষীকেশ

মুণালিনীর সঙ্গে সঙ্গে তাঁহার শয়নাগারে আসিয়া হ্রষীকেশ কহিলেন, “মুণালিনি! তোমার এ কি চরিত্র?”

মু। “আমার কি চরিত্র?”

হ্র। তুমি কার মেয়ে, কি চরিত্র কিছুই জানি না, গুরুর অহুরোধে আমি তোমাকে গৃহে স্থান দিয়াছি। তুমি আমার মেয়ে মণিমালিনীর সঙ্গে এক বিছানায় শোও—তোমার কুলটাবৃত্তি কেন?

মু। আমার কুলটাবৃত্তি যে বলে সে মিথ্যাবাদী।

হ্রষীকেশের ক্রোধে অধর কম্পিত হইল। কহিলেন, “কি পাপীয়সী! আমার অঙ্গে উদর পুরাবি, আর আমাকে ছুর্বাক্য বলিবি? তুই আমার গৃহ হইতে দূর হ। না হয় মাধবাচার্য্য রাগ করিবেন, তা বলিয়া এমন কালসাপ ঘরে রাখিতে পারিব না।”

মু। যে আজ্ঞা—কালি প্রাতে আর আমাকে দেখিতে পাইবেন না।
 হৃষীকেশের বোধ ছিল যে, যে কালে তাঁহার গৃহবহিষ্কৃত হইলেই
 মৃগালিনী আশ্রয়হীনা হয়, সেকালে এমন উত্তর তাহার পক্ষে সম্ভব নহে।
 কিন্তু মৃগালিনী নিরাশ্রয়ের আশঙ্কায় কিছুমাত্র ভীত নহেন দেখিয়া মনে
 করিলেন যে, তিনি জারগৃহে স্থান পাইবার ভরসাতেই এরূপ উত্তর
 করিলেন। ইহাতে হৃষীকেশের কোপ আরও বৃদ্ধি হইল। তিনি
 অধিকতর বেগে কহিলেন, “কালি প্রাতে ! আজই দূর হও।”

মু। যে আজ্ঞা। আমি সখী মণিমালিনীর নিকট বিদায় হইয়া
 আজই দূর হইতেছি।

এই বলিয়া মৃগালিনী গাত্রোত্থান করিলেন।

হৃষীকেশ কহিলেন, “মৃগালিনীর সহিত কুলটার আলাপ কি ?”

এবার মৃগালিনীর চক্ষে জল আসিল। কহিলেন, “তাহাই হইবে।
 আমি কিছুই লইয়া আসি নাই ; কিছুই লইয়া যাইব না। একবসনে
 চলিলাম। আপনাকে প্রণাম হই।”

এই বলিয়া দ্বিতীয় বাক্যব্যয় ব্যতীত মৃগালিনী শয়নাগার হইতে
 বহিষ্কৃত হইয়া চলিলেন।

যেমন অগ্ন্যগ্ন গৃহবাসীরা ব্যোমকেশের আর্তনাদে শয্যাভ্যাগ করিয়া
 উঠিয়াছিলেন, মণিমালিনীও তদ্রূপ উঠিয়াছিলেন। মৃগালিনীর সঙ্গে সঙ্গে
 তাঁহার পিতা শয্যাগৃহ পর্য্যন্ত আসিলেন দেখিয়া তিনি এই অবসরে
 ভ্রাতার সহিত কথোপকথন করিতেছিলেন ; এবং ভ্রাতার দুঃচরিত্র বৃথিতে
 পারিয়া তাঁহাকে ভৎসনা করিতেছিলেন। যখন তিনি ভৎসনা সমাপন
 করিয়া প্রত্যাগমন করেন, তখন প্রাঙ্গণভূমে, দ্রুতপাদবিক্ষেপিণী মৃগালিনীর
 সহিত তাঁহার সাক্ষাৎ হইল। তিনি জিজ্ঞাসা করিলেন, “সই, অমন
 করিয়া এত রাত্রে কোথায় যাইতেছ ?”

মৃগালিনী কহিলেন, “সখি, মণিমালিনী, তুমি চিরায়ুত্মতী হও।
 আমার সহিত আলাপ করিও না—তোমার বাপ মানা করেছেন।”

মণি। সে কি মৃগালিনী। তুমি কাঁদিতেছ কেন ? সর্বনাশ !
 বাবা কি বলিতে না জানি কি বলিয়াছেন ! সখি, ক্ষেয়। রাগ করিও না।

মণিমালিনী মৃগালিনীকে ফিরাইতে পারিলেন না। পর্বতসামুদ্রবাহী শিলাখণ্ডের স্রায় অভিমানিনী সাক্ষী চলিয়া গেলেন। তখন অতি ব্যস্ত মণিমালিনী পিতৃসন্নিধানে আসিলেন। মৃগালিনীও গৃহের বাহিরে আসিলেন।

বাহিরে আসিয়া দেখিলেন, পূর্বসঙ্কেত স্থানে গিরিজায়া দাঁড়াইয়া আছে। মৃগালিনী তাহাকে দেখিয়া কহিলেন, “তুমি এখনও দাঁড়াইয়া কেন ?”

গি। আমি যে তোমাকে পলাইতে বলিয়া আসিলাম। তুমি আইস না আইস—দেখিয়া যাইবার জন্ত দাঁড়াইয়া আছি।

মৃ। তুমি কি ব্রাহ্মণকে দংশন করিয়াছিলে ?

গি। তা ক্ষতি কি ? বামুন বৈ ত গরু নয় ?

মৃ। কিন্তু তুমি যে গান করিতে করিতে চলিয়া গেলে শুনিলাম ?

গি। তার পর তোমাদের কথাবার্তার শব্দ শুনিয়া ফিরিয়া দেখিতে আসিয়াছিলাম। দেখে মনে হলো, মিলে আমাকে একদিন “কাল্যাপিঁপ্ড়ে” বলে ঠাট্টা করেছিল। সে দিন ছল ফুটানটা বাকি ছিল। স্মৃষ্টিগে পেয়ে বামুনের ঋণ শোধ দিলাম। এখন তুমি কোথা যাইবে ?

মৃ। তোমার ঘরঘর আছে ?

গি। আছে। পাতার কুঁড়ে।

মৃ। সেখানে আর কে থাকে ?

গি। এক বুড়ী মাত্র। তাহাকে আয়ি বলি।

মৃ। চল তোমার ঘরে যাব।

গি। চল। তাই ভাবিতেছিলাম।

এই বলিয়া দুই জনে চলিল। যাইতে যাইতে গিরিজায়া কহিল,
“কিন্তু সে ত কুঁড়ে। সেখানে কয় দিন থাকিবে ?”

মৃ। কালি প্রাতে অশ্রুত যাইব।

গি। কোথা ? মথুরায় ?

মৃ। মথুরায় আমার আর স্থান নাই।

গি। তবে কোথায় ?

মু। যমালয়।

এই কথার পর ছুই জনে ক্রমেক কাল চুপ করিয়া রহিল। তার পর মৃণালিনী বলিল, “এ কথা কি তোমার বিশ্বাস হয়?”

গি। বিশ্বাস হইবে না কেন? কিন্তু সে স্থান ত আছেই, যখন ইচ্ছা তখনই যাইতে পারিবে। এখন কেন আর এক স্থানে যাও না?

মু। কোথা?

গি। নবদ্বীপ।

মু। গিরিজায়া, তুমি ভিখারিণী বেশে কোন মায়াবিনী। তোমার নিকট কোন কথা গোপন করিব না। বিশেষ তুমি হিতৈষী। নবদ্বীপেই যাইব স্থির করিয়াছি।

গি। একা যাইবে?

মু। সঙ্গী কোথায় পাইব?

গি। (গায়িতে গায়িতে)

“মেঘ দরশনে হায়, চাতকিনী ধায় রে।

সঙ্গ যাবি কে কে তোরা আয় আয় আয় রে ॥

মেঘেতে বিজলি হাসি, আমি বড় ভালবাসি,

যে যাবি সে যাবি তোরা, গিরিজায়া যায় রে ॥”

মু। একি রহস্য, গিরিজায়া?

গি। আমি যাব।

মু। সত্য সত্যই?

গি। সত্য সত্যই যাব।

মু। কেন যাবে?

গি। আমার সর্বত্র সমান। রাজধানীতে ভিক্ষা বিস্তর।

দ্বিতীয় খণ্ড

প্রথম পরিচ্ছেদ : গোড়েশ্বর

অতি বিস্তীর্ণ সভামণ্ডপে নবদ্বীপোজ্জ্বলকারী রাজাধিরাজ গোড়েশ্বর বিরাজ কবিতেন। উচ্চ শ্বেত প্রস্তরের বেদির উপরে রত্নপ্রবাল-বিভূষিত সিংহাসনে, রত্নপ্রবালমণ্ডিত ছত্রতলে বর্ষীয়ান রাজা বসিয়া আছেন। শিরোপরি কনক কিঙ্কণী সংবেষ্টিত বিচিত্র কারুকার্যখচিত শুভ্র চন্দ্রাতপ শোভা পাইতেছে। এক দিকে পৃথগাসনে হোমাবশেষ-বিভূষিত, অনিন্দ্যমূর্তি ব্রাহ্মণমণ্ডলী সভাপণ্ডিতকে পরিবেষ্টন করিয়া বসিয়া আছেন। যে আসনে, এক দিন হলায়ুধ উপবেশন করিয়াছিলেন, সে আসনে এক্ষণে এক অপরিণামদর্শী চাটুকার অধিষ্ঠান করিতেছিলেন। অগ্ৰ দিকে মহামাত্য ধর্ম্মাধিকারকে অগ্রবর্তী করিয়া প্রধান রাজপুরুষেরা উপবেশন করিয়াছিলেন। মহাসামন্ত, মহাকুমারামাত্য, প্রমাতা, ঔপরিিক, দাসাপরাধিক, চৌরোদ্ধরনিক, শৌঙ্কিক, গৌল্লিকগণ, ক্যাত্রপ, প্রাস্ত-পালেরা, কোষ্ঠপালেরা, কাণ্ডরিক্য, তদায়ুক্তক, বিনিয়ুক্তক প্রভৃতি সকলে উপবেশন করিতেছেন। মহাপ্রতীহার সশস্ত্রে সভার অসাধারণতা রক্ষা করিতেছেন। স্তাবকেরা উভয় পার্শ্বে শ্রেণীবদ্ধ হইয়া দাঁড়াইয়া আছে। সর্বজন হইতে পৃথগাসনে কুশাসনমাত্র গ্রহণ করিয়া পণ্ডিতবর মাধবাচার্য্য উপবেশন করিয়া আছেন।

রাজসভার নিয়মিত কার্য্যসকল সমাপ্ত হইলে, সভাভঙ্গের উদ্যোগ হইল। তখন মাধবাচার্য্য রাজাকে সম্বোধন করিয়া কহিলেন, “মহারাজ ! ব্রাহ্মণের বাচালতা মার্জ্জনা করিবেন। আপনি রাজনীতিবিশারদ, এক্ষণে ভূমণ্ডলের যত রাজগণ আছেন সর্বাপেক্ষা বহুদর্শী, প্রজাপালক আপনিই আজন্ম রাজা। আপনার অবিদিত নাই যে, শত্রুদমন রাজার প্রধান কর্ম্ম। আপনি প্রবল শত্রুদমনের কি উপায় করিয়াছেন ?”

রাজা কহিলেন, “কি অজ্ঞা করিতেছেন?” সকল কথা বর্ষায়ান্
রাজার শ্রুতিশুলভ হয় নাই।

মাধবাচার্যের পুনরুক্তির প্রতীক্ষা না করিয়া ধর্ম্মাধিকার পশুপতি
কহিলেন, “মহারাজাধিরাজ! মাধবাচার্য রাজসমীপে জিজ্ঞাসু হইয়াছেন
ষে, রাজসক্রমণের কি উপায় হইয়াছে। বঙ্গেশ্বরের কোন্ শত্রু এ
পর্যন্ত দমিত হয় নাই, তাহা এখনও আচার্য্য ব্যক্ত করেন নাই। তিনি
সবিশেষ বাচন করুন।”

মাধবাচার্য্য অল্প হাস্য করিয়া এবার অতুচ্চস্বরে কহিলেন, “মহারাজ,
তুরকীয়েরা অর্থাব্যবর্ত্ত প্রায় সমুদয় হস্তগত করিয়াছে। আপাততঃ
তাহারা মগধ জয় করিয়া গোড়রাজ্য আক্রমণের উত্তোগে আছে।”

এবার কথা রাজার কর্ণে প্রবেশলাভ করিল। তিনি কহিলেন,
“তুরকীদিগের কথা বলিতেছেন? তুরকীয়েরা কি আসিয়াছে?”

মাধবাচার্য্য কহিলেন, “ঈশ্বর রক্ষা করিতেছেন; এখনও তাহারা
এখানে আসে নাই। কিন্তু আসিলে আপনি কি প্রকারে তাহাদিগের
নিবারণ করিবেন?”

রাজা কহিলেন, “আমি কি করিব—আমি কি করিব? আমার এই
প্রাচীন শরীর, আমার যুদ্ধের উত্তোগ সম্ভবে না। আমার এক্ষণে
গঙ্গালাভ হইলেই হয়। তুরকীয়েরা আসে আশুক।”

এবমুত রাজবাক্য সমাপ্ত হইলে সভাস্থ সকলেই নীরব হইল।
কেবল মহাসামন্তের কোষমধ্যস্থ অসি অকারণ ঈষৎ বনৎকার শব্দ করিল।
অধিকাংশ শ্রোতৃবর্গের মুখে কোন ভাবই ব্যক্ত হইল না। মাধবাচার্য্যের
চক্ষু হইতে একবিন্দু অশ্রুপাত হইল।

সভাপণ্ডিত দামোদর প্রথমে কথা কহিলেন, “আচার্য্য, আপনি কি
ক্ষুব্ধ হইলেন? যেরূপ রাজাজ্ঞা হইল, ইহা শাস্ত্রসঙ্গত। শাস্ত্রে ঋষিবাক্য
প্রযুক্ত আছে যে, তুরকীয়েরা এ দেশ অধিকার করিবে। শাস্ত্রে আছে
অবশ্য ঘটিবে—কাহার সাধ্য নিবারণ করে? তবে যুদ্ধোত্তমে প্রয়োজন
কি?”

মাধবাচার্য্য কহিলেন, “ভাল সভাপণ্ডিত মহাশয়, একটা কথা

জিজ্ঞাসা করি, আপনি এতছ্যক্তি কোন্ শাস্ত্রে দেখিয়াছেন ?”

দামোদর কহিলেন, “বিষ্ণুপুরাণে আছে, যথা—”

মাধ । ‘যথা’ থাকুক—বিষ্ণুপুরাণ আনিতে অল্পমতি করুন ; দেখান একরূপ উক্তি কোথায় আছে ?

দামো । আমি কি এতই ভ্রান্ত হইলাম ? ভাল, স্মরণ করিয়া দেখুন দেখি, মনুতে এ কথা আছে কি না ?

মাধ । গোড়েধ্বরের সভাপণ্ডিত মানবধর্ষশাস্ত্রেও কী পারদর্শী নহেন ?

দামো । কি জ্বালা ! আপনি আমাকে বিহ্বল করিয়া তুলিলেন । আপনার সম্মুখে সরস্বতী বিমনা হয়েন, আমি কোন্ ছার ? আপনার সম্মুখে গ্রন্থের নাম স্মরণ হইবে না ; কিন্তু কবিতাটা শ্রবণ করুন ।

মাধ । গোড়েধ্বরের সভাপণ্ডিত যে অল্পষ্টুপ্চ্ছন্দে একটি কবিতা রচনা করিয়া থাকিবেন, ইহা কিছুই অসম্ভব নহে । কিন্তু আমি মুক্তকণ্ঠে বলিতেছি—তুরকীজাতীয় কর্তৃক গোড়বিজয়বিষয়িণী কথা কোন শাস্ত্রে কোথাও নাই ।

পশুপতি কহিলেন—“আপনি কি সর্বশাস্ত্রবিৎ ?”

মাধবাচার্য্য কহিলেন, “আপনি যদি পারেন, তবে আমাকে অশাস্ত্রজ্ঞ বলিয়া প্রতিপন্ন করুন ?”

সভাপণ্ডিতের একজন পারিষদ কহিলেন, “আমি করিব । আত্মপ্লাঘা শাস্ত্রে নিবিদ্ধ । যে আত্মপ্লাঘাপরবশ, সে যদি পণ্ডিত, তবে মূর্খ কে ?”

মাধবাচার্য্য কহিলেন, “মূর্খ তিন জন । যে আত্মরক্ষায় যত্নহীন, যে সেই যত্নহীনতার প্রতিপোষক, আর যে আত্মবুদ্ধির অতীত বিষয়ে বাক্য-ব্যয় করে, ইহারাই মূর্খ । আপনি ত্রিবিধ মূর্খ ।”

সভাপণ্ডিতের পারিষদ অধোবদনে উপবেশন করিলেন ।

পশুপতি কহিলেন, “যবন আইসে, আমরা যুদ্ধ করিব ।”

মাধবাচার্য্য কহিলেন, “সাধু ! সাধু ! আপনার যেরূপ যশঃ, সেইরূপ প্রস্তাব করিলেন । জগদীশ্বর আপনাকে কুলঙ্গী করুন ! আমার

কেবল এই জিজ্ঞাস্তা যে, যদি যুদ্ধই অভিপ্রায়, তবে তাহার কি উত্তোগ হইয়াছে ?”

পশুপতি কহিলেন, “মন্ত্রণা গোপনেই বক্তব্য । এ সভাতলে প্রকাশ্য নহে । কিন্তু যে অশ্ব, পদাতি এবং নাবিকসেনা সংগৃহীত হইতেছে, কিছু দিন এই নগরী পর্য্যটন করিলে তাহা জানিতে পারিবেন ।”

মা । কতক কতক জানিয়াছি ।

প । তবে এ প্রস্তাব করিতেছেন কেন ?

মা । প্রস্তাবের তাৎপর্য্য এই যে, এক বীরপুরুষ এক্ষণে এখানে সমাগত হইয়াছেন । মগধের যুবরাজ হেমচন্দ্রের বীর্য্যের খ্যাতি শুনিয়া থাকিবেন ।

প । বিশেষ শুনিয়াছি । ইহাও শ্রুত আছি যে, তিনি মহাশয়ের শিষ্য । আপনি বলিতে পারিবেন যে, ঈদৃশ বীরপুরুষের বাহুরক্ষিত মগধরাজ্য শত্রুহস্তগত হইল কি প্রকারে ?

মা । যবনবিপ্লবের কালে যুবরাজ প্রবাসে ছিলেন । এই মাত্র কারণ ।

প । তিনি কি এক্ষণে নবদ্বীপে আগমন করিয়াছেন ?

মা । আসিয়াছেন । রাজ্যাপহারক যবন এই দেশে আগমন করিতেছে শুনিয়া এই দেশে তাহাদিগের সহিত সংগ্রাম করিয়া দস্যুর দণ্ডবিধান করিবেন । গৌড়রাজ তাঁহার সঙ্গে সন্ধি স্থাপন করিয়া উভয়ে শত্রু বিনাশের চেষ্টা করিলে উভয়ের মঙ্গল ।

প । রাজবল্লভেরা অতীত তাঁহার পরিচর্য্যায় নিযুক্ত হইবে । তাঁহার নিবাসার্থ যথাযোগ্য বাসগৃহ নির্দিষ্ট হইবে । সন্ধিনিবন্ধনের মন্ত্রণা যথাযোগ্য সময়ে স্থির হইবে ।

পরে রাজ্যান্তার সভাভঙ্গ হইল ।

দ্বিতীয় পরিচ্ছেদ : কুসুমনির্মিতা

উপনগর প্রান্তে গঙ্গাতীরবর্তী এক অট্টালিকা হেমচন্দ্রের বাসার্থে রাজপুরুষেরা নির্দিষ্ট করিলেন । হেমচন্দ্র মাধবাচার্য্যের পরামর্শানুসারে সুরম্য অট্টালিকায় আবাস সংস্থাপিত করিলেন ।

নবদ্বীপে জনার্দিন নামে এক বৃদ্ধ ব্রাহ্মণ বাস করিতেন। তিনি বয়োবাহুল্যপ্রযুক্ত এবং শ্রবণেন্দ্রিয়ের হানিপ্রযুক্ত সর্বতোভাবে অসমর্থ। অথচ নিঃসহায়। তাঁহার সহধর্মিণীও প্রাচীনা এবং শক্তিহীনা। কিছু দিন হইল, ঐহাদিগের পর্ণকুঠীর প্রবল বাতায় বিনাশপ্রাপ্ত হইয়াছিল। সেই অবধি ঐহারা আশ্রয়ভাবে এই বৃহৎ পুরীর এক পার্শ্বে রাজপুরুষদিগের অনুমতি লইয়া বাস করিতেছিলেন। এক্ষণে কোন রাজপুত্র আসিয়া তথায় বাস করিবেন শুনিয়া তাঁহারা পরাধিকার ত্যাগ করিয়া বাসাস্তরের অশেষণে যাইবার উদ্যোগ করিতেছিলেন।

হেমচন্দ্র উহা শুনিয়া দুঃখিত হইলেন। বিবেচনা করিলেন যে, এই বৃহৎ ভবনে আমাদিগের উভয়েরই স্থান হইতে পারে। ব্রাহ্মণ কেন নিরাশ্রয় হইবেন? হেমচন্দ্র দিগ্বিজয়কে আজ্ঞা করিলেন, “ব্রাহ্মণকে গৃহত্যাগ করিতে নিবারণ কর।” ভৃত্য ঈষৎ হাস্য করিয়া কহিল, “এ কার্য্য ভৃত্য দ্বারা সম্ভবে না। ব্রাহ্মণঠাকুর আমার কথা কাণে তুলেন না।”

ব্রাহ্মণ বস্তুতঃ অনেকেরই কথা কাণে তুলেন না—কেন না, তিনি বধির। হেমচন্দ্র ভাবিলেন, ব্রাহ্মণ অভিমান প্রযুক্ত ভৃত্যের আলাপ গ্রহণ করেন না। এজ্জন্ম স্বয়ং তৎসম্ভাষণে গেলেন। ব্রাহ্মণকে প্রণাম করিলেন।

জনার্দিন আশীর্ব্বাদ করিয়া জিজ্ঞাসা করিলেন, “তুমি কে?”

হে। আমি আপনার ভৃত্য।

জ। কি বলিলে—তোমার নাম রামকৃষ্ণ?

হেমচন্দ্র অনুভব করিলেন, ব্রাহ্মণের শ্রবণশক্তি বড় প্রবল নহে। অতএব উচ্চতরস্বরে কহিলেন, “আমার নাম হেমচন্দ্র। আমি ব্রাহ্মণের দাস।”

জ। ভাল ভাল; প্রথমে ভাল শুনিতে পাই নাই, তোমার নাম হনুমান্ দাস।

হেমচন্দ্র মনে করিলেন, “নামের কথা দূর হউক। কার্য্যসাধন হইলেই হইল।” বলিলেন, “নবদ্বীপাধিপতির এই অট্টালিকা, তিনি

ইহা আমার বাসের জন্ত নিবৃত্ত করিয়াছেন। শুনিলাম আমার আসান আপনি স্থান ত্যাগ করিতেছেন।”

জ। না, এখনও গঙ্গানানে যাই নাই; এই স্নানের উত্তোগ করিতেছি।

হে। (অত্যুচ্চৈঃস্বরে) স্নান যথাসময়ে করিবেন। এক্ষণে আমি এই অনুরোধ করিতে আসিয়াছি যে, আপনি এ গৃহ ছাড়িয়া যাইবেন না।

জ। গৃহে আহার করিব না? তোমার বাটীতে কি? আত্ম শ্রাদ্ধ?

হে। ভাল; আহারাদির অভিলাষ করেন, তাহারও উত্তোগ হইবে। এক্ষণে যেরূপ এ বাড়ীতে অবস্থিতি করিতেছেন, সেইরূপই করুন।

জ। ভাল ভাল; ব্রাহ্মণভোজন করাইলে দক্ষিণা ত আছেই। তা বলিতে হইবে না। তোমার বাড়ী কোথা?

হেমচন্দ্র হতাশ্বাস হইয়া প্রত্যাবর্তন করিতেছিলেন, এমন সময়ে পশ্চাৎ হইতে কে তাঁহার উত্তরীয় ধরিয়া টানিল। হেমচন্দ্র ফিরিয়া দেখিলেন, দেখিয়া প্রথম মুহূর্ত্তে তাঁহার বোধ হইল, সম্মুখে একখানি কুসুমনির্মিতা দেবীপ্রতিমা। দ্বিতীয় মুহূর্ত্তে দেখিলেন, প্রতিমা সজীব; তৃতীয় মুহূর্ত্তে দেখিলেন, প্রতিমা নহে, বিধাতার নির্মাণকৌশলসীমারূপিণী বালিকা অথবা পূর্ণযৌবনা তরুণী।

বালিকা না তরুণী? ইহা হেমচন্দ্র তাহাকে দেখিয়া নিশ্চিত করিতে পারিলেন না।

বীণানিন্দিতস্বরে সুন্দরী কহিলেন, “তুমি পিতামহকে কি বলিতেছিলে? তোমার কথা উনি শুনিতে পাইবেন কেন?”

হেমচন্দ্র কহিলেন, “তাহা ত পাইলেন না দেখিলাম। তুমি কে?”

বালিকা বলিল, “আমি মনোরমা।”

হে। ইনি তোমার পিতামহ?

মনো। তুমি পিতামহকে কি বলিতেছিলে?

হে। শুনিলাম ইনি এ গৃহ ত্যাগ করিয়া যাইবার উত্তোগ করিতেছেন। আমি তাই নিবারণ করিতে আসিয়াছি।

ম। এ গৃহে এক রাজপুত্র আসিয়াছেন। তিনি আমাদিগকে

থাকিতে দিবেন কেন ?

হে। আমিই সেই রাজপুত্র। আমি তোমাদিগকে অনুরোধ করিতেছি, তোমরা এখানে থাক।

মা। কেন ?

এ 'কেন'র উত্তর নাই। হেমচন্দ্র অশ্রু উত্তর না পাইয়া কহিলেন, "কেন ? মনে কর, যদি তোমার ভাই আসিয়া এই গৃহে বাস করিত, সে কি তোমাদিগকে তাড়াইয়া দিত ?"

ম। তুমি কি আমার ভাই ?

হে। আজি হইতে তোমার ভাই হইলাম। এখন বুঝিলে ?

ম। বুঝিয়াছি। কিন্তু ভগিনী বলিয়া আমাকে কখন তিরস্কার করিবে না ত ?

হেমচন্দ্র মনোরমার কথার প্রণালীতে চমৎকৃত হইতে লাগিলেন। ভাবিলেন, "এ কি অলৌকিক সরলা বালিকা ? না উন্মাদিনী ?" কহিলেন, "কেন তিরস্কার করিব ?"

ম। যদি আমি দোষ করি ?

হে। দোষ দেখিলে কে না তিরস্কার করে ?

মনোরমা ক্ষুণ্ণভাবে দাঁড়াইয়া রহিলেন, বলিলেন, "আমি কখন ভাই দেখি নাই ; ভাইকে কি লজ্জা করিতে হয় ?"

হে। না।

ম। তবে আমি তোমাকে লজ্জা করিব না—তুমি আমাকে লজ্জা করিবে ?

হেমচন্দ্র হাসিলেন—কহিলেন, "আমার বক্তব্য তোমার পিতামহকে জানাইতে পারিলাম না,—তাহার উপায় কি ?"

ম। আমি বলিতেছি।

এই বলিয়া মনোরমা মৃদু মৃদু স্বরে জনার্দনের নিকট হেমচন্দ্রের অভিপ্রায় জানাইলেন।

হেমচন্দ্র দেখিয়া বিস্মিত হইলেন যে, মনোরমার সেই মৃদু কথা বধিরের বোধগম্য হইল।

ব্রাহ্মণ আনন্দিত হইয়া রাজপুত্রকে আশীর্ব্বাদ করিলেন এবং কহিলেন, “মনোরমা, ব্রাহ্মণীকে বল, রাজপুত্র তাঁহার নাতি হইলেন— আশীর্ব্বাদ করুন।” এই বলিয়া ব্রাহ্মণ স্বয়ং “ব্রাহ্মণী! ব্রাহ্মণী!” বলিয়া ডাকিতে লাগিলেন। ব্রাহ্মণী তখন স্থানান্তরে গৃহকার্য্যে ব্যাপ্তা ছিলেন—ডাক শুনিতে পাইলেন না। ব্রাহ্মণ অসন্তুষ্ট হইয়া বলিলেন, “ব্রাহ্মণীর ঐ বড় দোষ। কাণে কম শোনে।”

তৃতীয় পরিচ্ছেদ : নৌকাযানে

হেমচন্দ্র ত উপবনগৃহে সংস্থাপিত হইলেন। আর মৃগালিনী? নির্ব্বাসিতা, পরপীড়িতা, সহায়হীনা মৃগালিনী কোথায়?

সাক্ষ্য গগনে রক্তিম মেঘমালা কাঞ্চনবর্ণ ত্যাগ করিয়া ক্রমে ক্রমে কৃষ্ণবর্ণ ধারণ করিল। রজনীদন্ত তিমিরাবরণে গঙ্গার বিশাল হৃদয় অস্পষ্টীকৃত হইল। সভামণ্ডলে পরিচারকহস্তজ্বালিত দীপমালার শ্রায়, অথবা প্রভাতে উত্তানকুম্বসমূহের শ্রায়, আকাশে নক্ষত্রগণ ফুটিতে লাগিল। প্রায়াক্ষকার নদীহৃদয়ে নৈশ সমীরণ কিঞ্চিৎ খরতরবেগে বহিতে লাগিল। তাহাতে রমণীহৃদয়ে নায়কসংস্পর্শজনিত প্রকম্পের শ্রায়, নদীবক্ষে তরঙ্গ উথিত হইতে লাগিল। কূলে তরঙ্গাভিঘাতজনিত ফেনপুঞ্জ শ্বেতপুষ্পমালা গ্রথিত হইতে লাগিল। বহু লোকের কোলাহলের শ্রায় বাঁচিরব উথিত হইল। নাবিকেরা নৌসকল তীরলগ্ন করিয়া রাত্রির জগ্ন বিশ্রামের ব্যবস্থা করিতে লাগিল। তন্মধ্যে একখানি ছোট ডিজি অথ নৌকা হইতে পৃথক্ এক খালের মুখে লাগিল। নাবিকেরা আহারাতির ব্যবস্থা করিতে লাগিল।

ক্ষুদ্র তরণীতে দুইটিমাত্র আরোহী। দুইটিই স্ত্রীলোক। পাঠককে বলিতে হইবে না, ইহারা মৃগালিনী আর গিরিজায়া।

গিরিজায়া মৃগালিনীকে সম্বোধন করিয়া কহিল, “আজিকার দিন কাটিল।”

মৃগালিনী কোন উত্তর করিল না।

গিরিজায়া পুনরপি কহিল, “কালিকার দিনও কাটিবে—পরদিনও

কাটিবে—কেন কাটিবে না ?”

মৃণালিনী তথাপি কোন উত্তর করিলেন না ; কেবলমাত্র দীর্ঘশ্বাস ত্যাগ করিলেন ।

গিরিজায়া কহিল, “ঠাকুরাণি ! এ কি এ ? দিবানিশি চিন্তা করিয়া কি হইবে ? যদি আমাদিগের নদীয়া আসা কাজ ভাল না হইয়া থাকে, চল, এখনও ফিরিয়া যাই ।”

মৃণালিনী এবার উত্তর করিলেন । বলিলেন, “কোথায় যাইবে ?”

গি । চল, হ্রদীকেশের বাড়ী যাই ।

মৃ । বরং এই গঙ্গাজলে ডুবিয়া মরিব ।

গি । চল, তবে মথুরায় যাই ।

মৃ । আমি ত বলিয়াছি, তথায় আমার স্থান নাই । কুলটার ঞায় রাত্রিকালে যে বাপের ঘর ছাড়িয়া আসিয়াছি, কি বলিয়া সে বাপের ঘরে আর মুখ দেখাইব ?

গি । কিন্তু তুমি ত আপন ইচ্ছায় আইস নাই, মন্দ ভাবিয়াও আইস নাই । যাইতে ক্ষতি কি ?

মৃ । সে কথা কে বিশ্বাস করিবে ? যে বাপের ঘরে আদরের প্রতিমা ছিলাম, সে বাপের ঘরে ঘৃণিত হইয়াই বা কি প্রকারে থাকিব ?

গিরিজায়া অন্ধকারে দেখিতে পাইল না যে, মৃণালিনীর চক্ষু হইতে বারিবিन्दুর পর বারিবিन्दু পড়িতে লাগিল । গিরিজায়া কহিল, “তবে কোথায় যাইবে ?”

মৃ । যেখানে যাইতেছি ।

গি । সে ত সুখের যাত্রা । তবে অশ্রম কেন ? যাহাকে দেখিতে ভালবাসি, তাহাকে দেখিতে যাইতেছি, ইহার অপেক্ষা সুখ আর কি আছে ?

মৃ । নদীয়ায় আমার সহিত হেমচন্দ্রের সাক্ষাৎ হইবে না ।

গি । কেন ? তিনি কি সেখানে নাই ?

মৃ । সেইখানেই আছেন । কিন্তু তুমি ত জান যে, আমার সহিত এক বৎসর অসাক্ষাৎ তাঁহার ব্রত । আমি কি সে ব্রত ভঙ্গ করাইব ?

গিরিজায়া নীরব হইয়া রহিল। মৃণালিনী আবার কহিলেন, “আর কি বলিয়াই বা তাঁহার নিকট দাঁড়াইব ? আমি কি বলিব যে, হ্রষীকেশের উপর রাগ করিয়া আসিয়াছি, না বলিব যে, হ্রষীকেশ আমাকে কুলটা বলিয়া বিদায় করিয়া দিয়াছে ?”

গিরিজায়া ক্ষণেক নীরব থাকিয়া কহিল, “তবে কি নদীয়ায় তোমার সঙ্গে হেমচন্দ্রের সাক্ষাৎ হইবে না।”

মৃ। না।

গি। তবে যাইতেছ কেন ?

মৃ। তিনি আমাকে দেখিতে পাইবেন না। কিন্তু আমি তাঁহাকে দেখিব। তাঁহাকে দেখিতেই যাইতেছি।

গিরিজায়াব মুখে হাসি ধরিল না। বলিল, “তবে আমি গীত গাই,
চরণতলে দিমু হে শ্যাম পরাণ রতন।

দিব না তোমারে নাথ মিছাব যৌবন ॥

এ রতন সমতুল, ইহা তুমি দিবে মূল,

দিবানিশি মোরে নাথ দিবে দরশন ॥

ঠাকুরাণি, তুমি তাঁহাকে দেখিয়া ত জীবনধারণ করিবে। আমি তোমার দাসী হইয়াছি, আমার ত তাহাতে পেট ভরিবে না, আমি কি খেয়ে বাঁচিব ?”

মৃ। আমি দুই একটি শিল্পকর্ম জানি। মালা গাঁথিতে জানি, চিত্র করিতে জানি, কাপড়ের উপর ফুল তুলিতে জানি। তুমি বাজারে আমার শিল্পকর্ম বিক্রয় করিয়া দিবে।

গিরি। আর আমি ঘরে ঘরে গায়িব। “মৃণাল অধমে” গাইব কি ?
মৃণালিনী অর্দ্ধহাস্ত, অর্দ্ধসকোপ দৃষ্টিতে গিরিজায়ায় প্রতি কটাক্ষ করিলেন।

গিরিজায়া কহিল, “অমন করিয়া চাহিলে আমি গীত গায়িব।”
এই বলিয়া গায়িল,

“সাধের তরণী আমার কে দিল তরঙ্গে।

কে আছে কাণ্ডারী হেন কে যাইবে সঙ্গে ॥”

মৃণালিনী কহিল, “যদি এত ভয়, তবে একা এলে কেন ?”
গিরিজায়া কহিল, “আগে কি জানি ।” বলিয়া গায়িতে লাগিল,

“ভাসল তরী সকাল বেলা, ভাবিলাম এ জলখেলা,
মধুর বহিবে বায়ু, ভেসে যাব রঙ্গে ।

এখন—গগনে গরজে ঘন, বহে খর সমীরণ,
কূল ত্যজি এলাম কেন, মরিতে আতজে ॥”

মৃণালিনী কহিল, “কূলে ফিরিয়া যাও না কেন ?”

গিরিজায়া গায়িতে লাগিল,

মনে করি, কূলে ফিরি, বাহি তরী ধীরি ধীরি
কূলেতে কণ্টক-তরু বেষ্টিত ভুজজে ।”

মৃণালিনী কহিলেন, “তবে ডুবিয়া মর না কেন ?”

গিরিজায়া কহিল, “মরি তাহাতে ক্ষতি নাই, কিন্তু” বলিয়া আবার
গায়িল,

“যাহারে কাণ্ডারী করি, সাজাইয়া দিমু তরী,
সে কভু না দিল পদ তরণীর অঙ্গে ॥”

মৃণালিনী কহিলেন, “গিরিজায়া এ কোন অপ্রেমিকের গান ।”

গি । কেন ?

মৃ । আমি হইলে তরী ডুবাই ।

গি । সাধ করিয়া ?

মৃ । সাধ করিয়া ।

গি । তবে ভূমি জলের ভিতর রঙ্গ দেখিয়াছ ।

চতুর্থ পরিচ্ছেদ : বাতায়নে

হেমচন্দ্র কিছু দিন উপবনগৃহে বাস করিলেন । জনার্দনের সহিত
প্রত্যহ সাক্ষাৎ হইত ; কিন্তু ব্রাহ্মণের বধিরতাশ্রযুক্ত ইঞ্জিতে আলাপ
হইত মাত্র । মনোরমার সহিতও সর্বদা সাক্ষাৎ হইত, মনোরমা কখন
ঠাঁহার সহিত উপযাচিকা হইয়া কথা কহিতেন, কখন বা বাক্যব্যয় না
করিয়া স্থানান্তরে চলিয়া যাইতেন । বস্তুতঃ মনোরমার প্রকৃতি ঠাঁহার

পক্ষে অধিকতর বিশ্বয়জনক বলিয়া বোধ হইতে লাগিল। প্রথমতঃ তাঁহার বয়ঃক্রম দূরমুমেয়, সহজে তাঁহাকে বালিকা বলিয়া বোধ হইত, কিন্তু কখন কখন মনোরমাকে অভিশয় গান্ধার্যশালিনী দেখিতেন। মনোরমা কি অত্যাপি কুমারী? হেমচন্দ্র একদিন কথোপকথনচ্ছলে মনোরমাকে জিজ্ঞাসা করিলেন, “মনোবমা, তোমার শ্বশুরবাড়ী কোথা?” মনোরমা কহিল, “বলিতে পারি না।” আর এক দিন জিজ্ঞাসা করিয়াছিলেন, “মনোরমা, তুমি কয় বৎসরের হইয়াছ?” মনোরমা তাহাতেও উত্তর দিয়াছিলেন, “বলিতে পারি না।”

মাধবাচার্য্য হেমচন্দ্রকে উপবনে স্থাপিত কবিয়া দেশপর্য্যটনে যাত্রা করিলেন। তাঁহার অভিপ্রায় এই যে, এ সময় গৌড়দেশীয় অধীন রাজগণ যাহাতে নবদ্বীপে সসৈন্য সমবেত হইয়া গৌড়েশ্বরের আনুকূল্য করেন, তদ্বিষয়ে তাঁহাদিগকে প্রবৃত্তি দেন। হেমচন্দ্র নবদ্বীপে তাঁহার প্রতীক্ষা করিতে লাগিলেন। কিন্তু নিষ্ফল্যে দিনযাপন ক্লেশকর হইয়া উঠিল। হেমচন্দ্র বিরক্ত হইলেন। এক একবার মনে হইতে লাগিল যে, দিগ্বিজয়কে গৃহরক্ষায় রাখিয়া অথ লইয়া একবার গৌড়ে গমন করেন। কিন্তু তথায় মৃগালিনীর সাক্ষাৎ লাভ করিলে তাঁহার প্রতিজ্ঞাভঙ্গ হইবে, বিনা সাক্ষাতে গৌড়যাত্রায় কি ফলোদয় হইবে? এই সকল আলোচনায় যদিও গৌড়যাত্রায় হেমচন্দ্র নিরস্ত হইলেন, তথাপি অল্পদিন মৃগালিনীচিন্তায় হৃদয় নিযুক্ত থাকিত। একদা প্রদোষকালে তিনি শয়নকক্ষে, পর্য্যঙ্কোপরি শয়ন করিয়া মৃগালিনীর চিন্তা করিতেছিলেন। চিন্তাতেও হৃদয় সুখলাভ করিতেছিল। মুক্ত বাতায়নপথে হেমচন্দ্র প্রকৃতির শোভা নিরীক্ষণ করিতেছিলেন। নবীন শরৎঋতু। রজনী চন্দ্রিকাশালিনী, আকাশ নির্মল, বিস্তৃত, নক্ষত্রখচিত, কচিং স্তরপরম্পরাবিগ্নস্ত খেঁতাধুদমালায় বিহ্বলিত। বাতায়নপথে অদূরবর্তিনী ভাগীরথীও দেখা যাইতেছিল; ভাগীরথী বিশালোরসী বহুদূরবিসর্গিণী, চন্দ্রকর-প্রতিঘাতে উজ্জলতরঙ্গিনী দূরপ্রান্তে ধুমময়ী, নববারি-সমাগম-প্রস্থাদিনী। নববারি-সমাগমজনিত কল্লোল হেমচন্দ্র শুনিতে পাইতেছিলেন। বাতায়নপথে বায়ু প্রবেশ করিতেছিল। বায়ু গঙ্গাতরঙ্গে

নিষ্কিণ্ড জলকণা-সংস্পর্শে শীতল, নিশাসমাগমে প্রফুল্ল বস্তুকুমুমসংস্পর্শে স্নগন্ধি ; চন্দ্রকরপ্রতিঘাতী-শ্চামোজ্জল বৃক্ষপত্র বিধূত করিয়া, নদীতীর-বিরাজিত কাশকুমুম আন্দোলিত করিয়া, বায়ু বাতায়নপথে প্রবেশ করিতেছিল। হেমচন্দ্র বিশেষ প্রীতিলাভ করিলেন ;

অকস্মাৎ বাতায়নপথ অন্ধকার হইল—চন্দ্রালোকের গতি রোধ হইল। হেমচন্দ্র বাতায়নসন্নিধি একটি মনুষ্যমুণ্ড দেখিতে পাইলেন। বাতায়ন ভূমি হইতে কিছু উচ্চ—এজ্ঞ্য কাহারও হস্তপদাদি কিছু দেখিতে পাইলেন না—কেবল একখানি মুখ দেখিলেন। মুখখানি অতি বিশাল-শ্মশ্রুসংযুক্ত, তাহার মস্তকে উষ্ণীয়। সেই উজ্জ্বল চন্দ্রালোকে, বাতায়নের নিকটে, সম্মুখে শ্মশ্রুসংযুক্ত উষ্ণীয়ধারী মনুষ্যমুণ্ড দেখিয়া, হেমচন্দ্র শয্যা হইতে লক্ষ দিয়া নির্জ শানিত অসি গ্রহণ করিলেন।

অসি গ্রহণ করিয়া হেমচন্দ্র চাহিয়া দেখিলেন যে, বাতায়নে আর মনুষ্যমুণ্ড নাই।

হেমচন্দ্র অসিহস্তে দারোদঘাটন করিয়া গৃহ হইতে নিষ্ক্রান্ত হইলেন। বাতায়নতলে আসিলেন। তথায় কেহ নাই।

গৃহের চতুঃপার্শ্বে ; গঙ্গাতীরে, বনমধ্যে হেমচন্দ্র ইতস্ততঃ অন্বেষণ করিলেন। কোথাও কাহাকে দেখিলেন না।

হেমচন্দ্র গৃহে প্রত্যাবর্তন করিলেন। তখন রাজপুত্র পিতৃদত্ত যোদ্ধবেশে আপাদমস্তক আত্মশরীর মণ্ডিত করিলেন। অকালজলদোদয়-বিমর্ষিত গগনমণ্ডলবৎ তাঁহার সুন্দর মুখকান্তি অন্ধকারময় হইল। তিনি একাকী সেই গস্তীর নিশাতে শঙ্কময় হইয়া যাত্রা করিলেন। বাতায়ন-পথে মনুষ্যমুণ্ড দেখিয়া তিনি জানিতে পারিয়াছিলেন যে, বঙ্গে তুরক আসিয়াছে।

পঞ্চম পরিচ্ছেদ : বাপীকূলে

অকালজলদোদয়স্বরূপ ভীমমূর্ত্তি রাজপুত্র হেমচন্দ্র তুরকের অন্বেষণে নিষ্ক্রান্ত হইলেন। ব্যাজ্জ যেমন আহাৰ্য্য দেখিবামাত্র বেগে ধাবিত হয়, হেমচন্দ্র তুরক দেখিবামাত্র সেইরূপ ধাবিত হইলেন। কিন্তু কোথায়.

তুরকের সাক্ষাৎ পাইবেন, তাহার স্থিরতা ছিল না।

হেমচন্দ্র একটিমাত্র তুরক দেখিয়াছিলেন। কিন্তু তিনি এই সিদ্ধান্ত করিলেন যে, হয় তুরকসেনা নগরসন্নিধানে উপস্থিত হইয়া লুকায়িত আছে, নতুবা এই ব্যক্তি তুরকসেনার পূর্বচর। যদি তুরকসেনাই আসিয়া থাকে, তবে তৎসঙ্গে একাকী সংগ্রাম সম্ভবে না। কিন্তু যাহাই হউক, প্রকৃত অবস্থা কি, তাহার অনুসন্ধান না করিয়া হেমচন্দ্র কদাচ স্থির থাকিতে পারেন না। যে মহৎকার্য্য জ্ঞান মৃগালিনীকে ত্যাগ করিয়াছেন, অদ্য রাত্রিতে নিদ্রাভিভূত হইয়া সে কক্ষের উপেক্ষা করিতে পারেন না। বিশেষ যবনবধে হেমচন্দ্রের আন্তরিক আনন্দ। উকীষধারী মুণ্ড দেখিয়া অবধি তাঁহার জিহ্বাংসা ভয়ানক প্রবল হইয়াছে, সুতরাং তাঁহার স্থির হইবার সম্ভবনা কি? অতএব দ্রুতপদবিক্ষেপে হেমচন্দ্র রাজপথাভিমুখে চলিলেন।

উপবনগৃহ হইতে রাজপথ কিছু দূর। যে পথ বাহিত করিয়া উপবনগৃহ হইতে রাজপথে যাইতে হয়, সে বিরল-লোক-প্রবাহ গ্রাম্য পথ মাত্র। হেমচন্দ্র সেই পথে চলিলেন। সেই পথপার্শ্বে অতি বিস্তারিত, সুরম্য সোপানাবলিশোভিত এক দীর্ঘিকা ছিল। দীর্ঘিকাপার্শ্বে অনেক বকুল, শাল, অশোক, চম্পক, কদম্ব, অশ্বথ, বট, আশ্র, তিস্তিড়ী প্রভৃতি বৃক্ষ ছিল। বৃক্ষগুলি যে সুষৃঙ্খলরূপে শ্রেণীবিন্যস্ত ছিল, এমত নহে, বহুতর বৃক্ষ পরস্পর শাখায় শাখায় সম্বন্ধ হইয়া বাপীতীরে ঘনাকার করিয়া রহিত। দিবসেও তথায় অন্ধকার। কিম্বদন্তী ছিল যে, সেই সরোবরে ভূতযোনি বিহার করিত। এই সংস্কার প্রতিবাসীদিগের মনে একরূপ দৃঢ় হইয়া উঠিয়াছিল যে, সচরাচর তথায় কেহ যাইত না। যদি যাইত, তবে একাকী কেহ যাইত না। নিশাকালে কদাপি কেহ যাইত না।

পৌরাণিক ধর্মের একাধিপত্যকালে হেমচন্দ্রও ভূতযোনির অস্তিত্ব সম্বন্ধে প্রত্যয়শালী হইবেন, তাহার আর বিচিত্র কি? কিন্তু প্রেতসম্বন্ধে প্রত্যয়শালী বলিয়া তিনি গম্ভব্য পথে যাইতে সঙ্কোচ করেন, একরূপ ভীর্ণস্বভাব নহেন। অতএব তিনি নিঃসঙ্কোচ হইয়া বাপীপার্শ্ব দিয়া

চলিলেন। নিঃশব্দেচ বটে, কিন্তু কোতূহলশূন্য নহেন। বাপীর পার্শ্বে সর্বত্র এবং তন্তীরপ্রতি অনিমেষলোচন নিষ্ক্রিপ্ত করিতে করিতে চলিলেন। সোপানমার্গের নিকটবর্তী হইলেন। সহসা চমকিত হইলেন। জন-শ্রুতির প্রতি তাঁহার বিশ্বাস দৃঢ়ীকৃত হইল। দেখিলেন, চন্দ্রালোকে সর্বাধঃস্থ সোপানে, জলে চরণ রক্ষা করিয়া শ্বেতবসনপরিধানা কে বসিয়া আছে। স্ত্রীমূর্ত্তি বলিয়া তাঁহার বোধ হইল। শ্বেতবসনা অবেগীসম্বন্ধ-কুম্বলা ; কেশজাল স্বন্ধ, পৃষ্ঠদেশ, বাহুযুগল, মুখমণ্ডল, হৃদয় সর্বত্র আচ্ছন্ন করিয়া রহিয়াছে। প্রেত বিবেচনা করিয়া হেমচন্দ্র নিঃশব্দে চলিয়া যাইতেছিলেন। কিন্তু মনে ভাবিলেন, যদি মনুষ্য হয় ? এত রাত্রে কে এ স্থানে ? সে ত তুরককে দেখিলে দেখিয়া থাকিতে পারে ? এই সন্দেহে হেমচন্দ্র ফিরিলেন। নির্ভয়ে বাপীতীরারোহণ করলেন, সোপানমার্গে ধীরে ধীরে অবতরণ করিতে লাগিলেন। প্রেতিনী তাঁহার আগমন জানিতে পারিয়াও সরিল না, পূর্বমত রহিল। হেমচন্দ্র তাঁহার নিকটে আসিলেন। তখন সে উঠিয়া দাঁড়াইল। হেমচন্দ্রের দিকে ফিরিল ; হস্তদ্বারা মুখাবরণকারী কেশদাম অপমৃত্ত করিল। হেমচন্দ্র তাহার মুখ দেখিলেন। সে প্রেতিনী নহে, কিন্তু প্রেতিনী হইলে হেমচন্দ্র অধিকতর বিস্ময়াপন্ন হইতেন না। কহিলেন, “কে মনোরমা ! তুমি এখানে ?”

মনোরমা কহিল, “আমি এখানে অনেকবার আসি—কিন্তু তুমি এখানে কেন ?”

হেম। আমার কৰ্ম্ম আছে।

মনো। এ রাত্রে কি কৰ্ম্ম ?

হেম। পশ্চাৎ বলিব ; তুমি এ রাত্রে এখানে কেন ?

মনো। তোমার এ বেশ কেন ? হাতে শূল ; কাঁকালে তরবারি ; তরবারে এ কি জ্বলিতেছে ? এ কি হীরা ? মাথায় এ কি ? ইহাতে ঝক্‌মক্‌ করিয়া জ্বলিতেছে, এই বা কি ? এও কি হীরা ? এত হীরা পেলো কোথায় ?

হেম। আমার ছিল।

মনো । এ রাত্রে এত হীরা পরিয়া যাইতেছ ? চোর যে কাড়িয়া লইবে ?

হেম । আমার নিকট হইতে চোরে কাড়িতে পারে না ।

মনো । তা এত রাত্রে এত অলঙ্কারের প্রয়োজন কি ? তুমি কি বিবাহ কবিত্তে যাইতেছ ?

হেম । তোমার কি বোধ হয়, মনোরমা ?

মনো । মানুষ মারিবার অস্ত্র লইয়া কেহ বিবাহ করিতে যায় না । তুমি যুদ্ধে যাইতেছ ।

হেম । কাহার সঙ্গে যুদ্ধ করিব ? তুমিই বা এখানে কি করিতেছিলে ?

মনো । স্নান কবিত্তেছিলাম । স্নান করিয়া বাতাসে চুল শুকাইতে ছিলাম । এই দেখ, চুল এখনও ভিজ্জা রহিয়াছে ।

এই বলিয়া মনোরমা আর্দ্র কেশ হেমচন্দ্রের হস্তে স্পর্শ করাইলেন ।

হেম । রাত্রে স্নান কেন ?

মনো । আমার গা জ্বালা করে ।

হেম । গঙ্গাস্নান না করিয়া এখানে কেন ?

মনো । এখানকার জল বড় শীতল ।

হেম । তুমি সর্বদা এখানে আইস ?

মনো । আসি ।

হেম । আমি তোমার সম্বন্ধ করিতেছি—তোমার বিবাহ হইবে । বিবাহ হইলে এরূপ কি প্রকারে আসিবে ?

মনো । আগে বিবাহ হউক ।

হেমচন্দ্র হাসিয়া কহিলেন, “তোমার লজ্জা নাই—তুমি কালামুখী ।”

মনো । তিরস্কার কর কেন ? তুমি যে বলিয়াছিলে, তিরস্কার করিবে না ।

হেম । সে অপরাধ লইও না । এখান দিয়া কাহাকেও যাইতে দেখিয়াছ ?

মনো । দেখিয়াছি ।

হেম । তাহার কি বেশ ?

মনো । তুরকের বেশ ।

হেমচন্দ্র অভ্যস্ত বিস্মিত হইলেন ; বলিলেন “সে কি ? তুমি তুরক
চিনলে কি প্রকারে ?”

মনো । আমি পূর্বে তুরক দেখিয়াছি ।

হেম । সে কি ? কোথায় দেখিলে ?

মনো । যেখানে দেখি না—তুমি কি সেই তুরকের অনুসরণ
করিবে ?

হেম । করিব—সে কোন্ পথে গেল ?

মনো । কেন ?

হেম । তাহাকে বধ করিব ।

মনো । মানুষ মেরে কি হবে ?

হেম । তুরক আমার পরম শত্রু ।

মনো । তবে একটি মারিয়া কি তৃপ্তি লাভ করিবে ?

হেম । আমি যত তুরক দেখিতে পাইব, তত মারিব ।

মনো । পারিবে ?

হেম । পারিব ।

মনোরমা বলিল, “তবে সাবধানে আমার সঙ্গ আইস ।”

হেমচন্দ্র ইতস্ততঃ করিতে লাগিলেন । যখনযুদ্ধে এই বালিকা
পথপ্রদর্শিনী ।

মনোরমা তাঁহার মানসিক ভাব বুঝিলেন ; বলিলেন, “আমাকে
বালিকা ভাবিয়া অবিশ্বাস করিতেছ ?”

হেমচন্দ্র মনোরমার প্রতি চাহিয়া দেখিলেন । বিস্ময়াপন্ন হইয়া
ভাবিলেন—মনোরমা কি মানুষী ?

ষষ্ঠ পরিচ্ছেদ : পশুপতি

গৌড়দেশের ধর্মাধিকার পশুপতি অসাধারণ ব্যক্তি ; তিনি দ্বিতীয়
গৌড়েশ্বর । রাজা বৃদ্ধ, বার্কক্যের ধর্মামুসারে পরমতাবলম্বী এবং

রাজকার্যে অযত্নবান হইয়াছেন, সুতরাং প্রধানামাত্য ধর্ম্মাধিকারের হস্তেই গৌড়রাজ্যের প্রকৃত ভার অর্পিত হইয়াছিল এবং সম্পদে অথবা ঐশ্বর্যে পশুপতি গৌড়েস্বরের সমকক্ষ ব্যক্তি হইয়া উঠিয়াছিলেন ।

পশুপতির বয়ঃক্রম পঞ্চত্রিংশৎ বৎসর হইবে । তিনি দেখিতে অতি সুপুরুষ । তাঁহার শরীর দীর্ঘ, বক্ষ বিশাল, সর্বাঙ্গ অস্থিমাংসের উপযুক্ত সংযোগে সুন্দর । তাঁহার বর্ণ তপ্ত কাঞ্চনমণ্ডিত ; ললাট অতি বিস্তৃত, মানসিক শক্তির মন্দিরস্বরূপ । নাসিকা দীর্ঘ এবং উন্নত, চক্ষু ক্ষুদ্র, কিন্তু অসাধারণ ঔজ্জ্বল্য-সম্পন্ন । মুখকান্তি জ্ঞানগান্ধীর্ঘ্যাব্যঞ্জক এবং অল্পদিন বিষয়ানুষ্ঠানজনিত চিন্তার গুণে কিছু পুরুষভাবপ্রকাশক । তাহা হইলে কি হয়, রাজসভাতলে তাঁহার ত্রায় সর্বোৎকৃষ্ট সুন্দর পুরুষ আর কেহই ছিল না । লোকে বলিত, গৌড়দেশে তাদৃশ পণ্ডিত এবং বিচক্ষণ ব্যক্তিও কেহ ছিল না ।

পশুপতি জাতিতে ব্রাহ্মণ, কিন্তু তাঁহার জন্মভূমি কোথা, তাহা কেহ বিশেষ জ্ঞাত ছিল না । কথিত ছিল যে, তাঁহার পিতা শাস্ত্রব্যবসায়ী দরিদ্র ব্রাহ্মণ ছিলেন ।

পশুপতি কেবল আপন বুদ্ধিবিচার প্রভাবে গৌড়রাজ্যের প্রধান পদে অধিষ্ঠিত হইয়াছিলেন ।

পশুপতি যৌবনকালে কাশীধামে পিতার নিকট থাকিয়া শাস্ত্রাধ্যয়ন করিতেন । তথায় কেশব নামে এক বঙ্গীয় ব্রাহ্মণ বাস করিতেন । হৈমবতী নামে কেশবের এক অষ্টমবর্ষীয়া কন্যা ছিল । তাহার সহিত পশুপতির পরিণয় হয় । কিন্তু অদৃষ্টবশতঃ বিবাহের রাত্রেই কেশব, সম্প্রদানের পর কন্যা লইয়া অদৃশ্য হইল । আর তাহার কোন সন্ধান পাওয়া গেল না । সেই পর্য্যন্ত পশুপতি পত্নীসহবাসে বঞ্চিত ছিলেন । কারণবশতঃ একাল পর্য্যন্ত দ্বিতীয় দারপরিগ্রহ করেন নাই । তিনি এক্ষণে রাজপ্রাসাদতুল্য উচ্চ অট্টালিকায় বাস করিতেন, কিন্তু বামানয়ন-নিঃসৃত জ্যোতির অভাবে সেই উচ্চ অট্টালিকা আজি অন্ধকারময় ।

আজি রাত্রে সেই উচ্চ অট্টালিকার এক নিভৃতকক্ষে পশুপতি, একাকী দীপালোকে বসিয়া আছেন । এই কক্ষের পশ্চাতেই আত্মকানন ।।

আত্রকাননে নিজ্ঞান্ধ হইবার জ্ঞা একটি গুণ্ডদ্বার আছে । সেই দ্বারে আসিয়া নিশীথকালে মূছ মূছ কে আঘাত করিল । গৃহভ্যন্তর হইতে পশুপতি দ্বার উন্মাতিত করিলেন এক ব্যক্তি গৃহে প্রবেশ করিল । সে মুসলমান । হেমচন্দ্র তাহাকেই বাতায়নপথে দেখিয়াছিলেন । পশুপতি তখন তাহাকে পৃথগাসনে উপবেশন করিতে বলিয়া বিশ্বাসজনক অভিজ্ঞান দেখিতে চাহিলেন । মুসলমান অভিজ্ঞান দৃষ্ট করাইলেন ।

পশুপতি সংস্কৃতে কহিলেন, “বুঝিলাম আপনি তুরকসেনাপতির বিশ্বাসপাত্র । স্মৃতরাং আমারও বিশ্বাসপাত্র । আপনারই নাম মহম্মদ আলি ? এক্ষণে সেনাপতির অভিপ্রায় প্রকাশ করুন ।”

যবন সংস্কৃতে উত্তর দিলেন, কিন্তু তাঁহার সংস্কৃতের তিনভাগ ফরাসী, আর অবশিষ্ট চতুর্থ ংগ যেরূপ সংস্কৃত, তাহা ভারতবর্ষে কখন ব্যবহৃত হয় নাই । তাহা মহম্মদ আলিরই সৃষ্ট সংস্কৃত । পশুপতি বহুকাষ্টে তাহার অর্থবোধ করিলেন । পাঠক মহাশয়ের সে কষ্টভোগের প্রয়োজন নাই, আমরা তাঁহার সুবোধার্থে সে নূতন সংস্কৃত অনুবাদ করিয়া দিতেছি ।

যবন কহিল, “খিলিজি সাহেবের অভিপ্রায় আপনি অবগত আছেন । বিনা যুদ্ধে গৌড়বিজয় করিবেন তাঁহার ইচ্ছা হইয়াছে । কি হইলে আপনি এ রাজ্য তাঁহার হস্তে সমর্পণ করিবেন ?”

পশুপতি কহিলেন, “আমি এ রাজ্য তাঁহার হস্তে সমর্পণ করিব কি না, তাহা অনিশ্চিত । স্বদেশবৈরিতা মহাপাপ । আমি এ কর্ম কেন করিব ?”

য । উত্তম । আমি চলিলাম । কিন্তু আপনি তবে কেন খিলিজির নিকট দূত প্রেরণ করিয়াছিলেন ?

প । তাঁহার যুদ্ধের সাধ কতদূর পর্য্যন্ত, তাহা জানিবার জ্ঞা ।

য । তাহা আমি আপনাকে জানাইয়া যাই—যুদ্ধেই তাঁহার আনন্দ ।

প । মনুষ্যযুদ্ধে, পশুযুদ্ধে চ ? হস্তিযুদ্ধে কেমন আনন্দ ?

মহম্মদ আলি সকোপে কহিলেন, “গৌড়ে যুদ্ধের অভিপ্রায়ে আসা পশুযুদ্ধেই আসা । বুঝিলাম, ব্যঙ্গ করিবার জ্ঞাই আপনি সেনাপতিকে

লোক পাঠাইতে বলিয়াছিলেন। আমরা যুদ্ধ জানি, ব্যঙ্গ জানি না।
যাহা জানি, তাহা করিব।”

এই বলিয়া মহম্মদ আলি, গমনোচ্ছোগী হইল। পশুপতি কহিলেন,
“ক্ষণেক অপেক্ষা করুন, আর কিছু শুনিয়া যান। আমি যবনহস্তে
এ রাজ্য সমর্পণ করিতে অসম্মত নহি; অক্ষমও নহি। আমিই গৌড়ের
রাজা, সেনরাজা নামমাত্র। কিন্তু সমুচিত মূল্য না পাইলে আপন রাজ্য
কেন আপনাদিগকে দিব?”

মহম্মদ আলি কহিলেন, “আপনি কি চাহেন?”

প। খিলিজি কি দিবেন?

য। আপনার যাহা আছে, তাহা সকলই থাকিবে—আপনার
জীবন, ঐশ্বর্য, পদ সকলই থাকিবে। এই মাত্র।

প। তবে আমি পাইলাম কি? এ সকলই ত আমার আছে—
কি লোভে আমি গুরুতর পাপানুষ্ঠান করিব?

য। আমাদের আনুকূল্য না করিলে কিছুই থাকিবে না; যুদ্ধ
করিলে, আপনার ঐশ্বর্য, পদ, জীবন পর্য্যন্ত অপহৃত হইবে।

প। তাহা যুদ্ধ শেষ না হইলে বলা যায় না। আমরা যুদ্ধ
করিতে একেবারে অনিচ্ছুক বিবেচনা করিবেন না। বিশেষ মগধে
বিদ্রোহের উদ্যোগ হইতেছে, তাহাও অবগত আছি। তাহার নিবারণ
জন্ত এক্ষণে খিলিজি ব্যস্ত, গৌড়জয়ের চেষ্টা আপাততঃ কিছুদিন তাঁহাকে
ত্যাগ করিতে হইবে, তাহাও অবগত আছি। আমার প্রার্থিত পুরস্কার
না দেন না দিবেন; কিন্তু যুদ্ধ করাই যদি স্থির হয়, তবে আমাদের
এই উত্তম সময়। যখন বিহারে বিদ্রোহীসেনা সজ্জিত হইবে,
গৌরেশ্বরের সেনাও সাজিবে।

ম। ক্ষতি কি? পিপড়ের কামড়ের উপর মশা কামড়াইলে
হাতী মরে না। কিন্তু আপনার প্রার্থিত পুরস্কার কি, তাহা শুনিয়া
যাইতে বাসনা করি।

প। শুনুন আমিই এক্ষণে প্রকৃত গৌড়ের ঈশ্বর, কিন্তু লোকে
আমাকে গৌড়েশ্বর বলে না। আমি স্বনামে রাজা হইতে বাসনা করি।

সেনবংশ লোপ হইয়া পশুপতি গৌড়াধিপতি হউক ।

ম । তাহাতে আমরাদিগের কি উপকার করিলেন ? আমরাদিগকে কি দিবেন ?

প । রাজকর মাত্র । মুসলমানের অধীনে করপ্রদ মাত্র রাজা হইব ।

ম । ভাল ; আপনি যদি প্রকৃত গৌড়েশ্বর, রাজা যদি আপনার একরূপ করতলস্থ, তবে আমরাদিগের সহিত আপনার কথাবার্তার আবশ্যক কি ? আমরাদিগের সাহায্যের প্রয়োজন কি ? আমরাদিগকে কর দিবেন কেন ?

প । তাহা স্পষ্ট করিয়া বলিব । ইহাতে কপটতা করিব না । প্রথমতঃ সেনরাজ আমার প্রভু ; বয়সে বৃদ্ধ, আমাকে স্নেহ করেন । স্ববলে যদি আমি তাঁহাকে রাজ্যচ্যুত করি—তবে অত্যন্ত লোকনিন্দা । আপনারা কিছুমাত্র যুদ্ধোত্তম দেখাইয়া, আমার আনুকূল্যে বিনা যুদ্ধে রাজধানী প্রবেশপূর্বক তাঁহাকে সিংহাসনচ্যুত করিয়া আমাকে তদুপরি স্থাপিত করিলে সে নিন্দা হইবে না । দ্বিতীয়তঃ রাজ্য অনধিকারীর অধিকারগত হইলেই বিদ্রোহের সম্ভাবনা, আপনাদিগের সাহায্যে সে বিদ্রোহ সহজেই নিবারণ করিতে পারিব । তৃতীয়তঃ আমি স্বয়ং রাজা হইলে এক্ষণে সেনরাজার সহিত আপনাদিগের যে সম্বন্ধ, আমার সঙ্গেও সেই সম্বন্ধ থাকিবে । আমরাদিগের সহিত যুদ্ধের সম্ভাবনা থাকিবে । যুদ্ধে আমি প্রশস্ত আছি—কিন্তু জয় পরাজয় উভয়েরই সম্ভাবনা । জয় হইলে আমার নূতন কিছু লাভ হইবে না । কিন্তু পরাজয়ে সর্বস্ব-হানি । কিন্তু আপনাদিগের সহিত সন্ধি করিয়া রাজ্য গ্রহণ করিলে সে আশঙ্কা থাকিবে না । বিশেষতঃ সর্বদা যুদ্ধোত্তম থাকিতে হইলে নূতন রাজ্য সুশাসিত হয় না ।

ম । আপনি রাজনৈতিজ্ঞের ন্যায় বিবেচনা করিয়াছেন । আপনার কথায় আমার সম্পূর্ণ প্রত্যয় জন্মিল । আমিও এইরূপ স্পষ্ট করিয়া খিনিজি সাহেবের অভিপ্রায় ব্যক্ত করি । তিনি এক্ষণে অনেক চিন্তায় ব্যস্ত আছেন যথার্থ, কিন্তু হিন্দুস্থানে যবনরাজ একেশ্বর হইবেন, অল্প রাজার নামমাত্র আমরা রাখিব না । কিন্তু আপনাকে গৌড়ে

শাসনকর্তা করিব। যেমন দিল্লীতে মহম্মদ ঘোরার প্রতিনিধি কুতুবউদ্দীন, যেমন পূর্বদেশে কুতুবউদ্দীনের প্রতিনিধি বখ্‌তিয়ার খিলিজি, তেমনই গৌড়ে আপনি বখ্‌তিয়ারের প্রতিনিধি হইবেন। আপনি ইহাতে স্বীকৃত আছেন কি না ?

পশুপতি কহিলেন, “আমি ইহাতে সম্মত হইলাম।”

ম। ভাল ; কিন্তু আমার আর এক কথা জিজ্ঞাস্য আছে। আপনি যাহা অঙ্গীকার করিতেছেন, তাহা সাধন করিতে আপনার ক্ষমতা কি ?

প। আমার অনুমতি ব্যতীত একটি পদাতিকও যুদ্ধ করিবে না। রাজকোষ আমার অনুচরের হস্তে। আমার আদেশ ব্যতীত যুদ্ধের উদ্যোগে একটি কড়াও খরচ হইবে না। পাঁচ জন অনুচর লইয়া খিলিজিকে রাজপুরে প্রবেশ করিতে বলিও ; কেহ জিজ্ঞাসা করিবে না, “কে তোমরা ?”

ম। আরও এক কথা বাকি আছে। এই দেশে যবনের পরম শত্রু হেমচন্দ্র বাস করিতেছে। আজ রাত্রেই তাহার মুণ্ড যবন-শিবিরে প্রেরণ করিতে হইবে।

প। আপনারা আসিয়াই তাহা ছেদন করিবেন—আমি শরণাগত-হত্যা-পাপ কেন স্বীকার করিব ?

ম। আমরাদিগের হইতে হইবে না। যবন-সমাগম শুনিবা মাত্র সে ব্যক্তি নগর ত্যাগ করিয়া পলাইবে। আজি সে নিশ্চিন্ত আছে। আজি লোক পাঠাইয়া তাহাকে বধ করুন।

প। ভাল, ইহাও স্বীকার করিলাম।

ম। আমরা সন্তুষ্ট হইলাম। আমি আপনার উত্তর লইয়া চলিলাম।

প। যে আজ্ঞা। আর একটা কথা জিজ্ঞাস্য আছে।

ম। কি, আশ্চর্য করুন।

প। আমি ত রাজ্য আপনাদিগের হাতে দিব। পরে যদি আপনারা আমাকে বহিষ্কৃত করেন ?

ম। আমরা আপনার কথায় নির্ভর করিয়া অল্পমাত্র সেনা লইয়া

দূত পরিচয়ে পুরপ্রবেশ করিব। তাহাতে যদি আমরা স্বীকার মত কর্ম না করি, আপনি সহজেই আমাদেরকে বহিস্কৃত করিয়া দিবেন।

প। আর যদি আপনারা অল্প সেনা লইয়া না আইসেন ?

ম। তবে যুদ্ধ করিবেন।

এই বলিয়া মহম্মদ আলি বিদায় হইল।

সপ্তম পরিচ্ছেদ : চৌরোদ্ধরণিক

মহম্মদ আলি বাহির হইয়া দৃষ্টিপথাভীত হইলে, অশ্ব একজন গুপ্তদ্বার-নিষ্টি আসিয়া মৃদুস্বরে কহিল, “প্রবেশ করিব ?”

পশুপতি কহিলেন, “কর।”

এক জন চৌরোদ্ধরণিক প্রবেশ করিল। সে প্রণত হইলে পশুপতি আশীর্ব্বাদ করিয়া জিজ্ঞাসা করিলেন, “কেমন শাস্তশীল! মঙ্গল সংবাদ ত ?”

চৌরোদ্ধরণিক কহিল, “আপনি একে একে প্রশ্ন করুন—আমি ক্রমে সকল সংবাদ নিবেদন করিতেছি।”

পশু। যবনদিগের অবস্থিতি স্থানে গিয়াছিল ?

শাস্ত। সেখানে কেহ যাইতে পারে না।

পশু। কেন ?

শাস্ত। অতি নিবিড় বণ, ছর্ভেছ।

পশু। কুঠারহস্তে বৃক্ষচ্ছেদন করিতে করিতে গেলে না কেন ?

শাস্ত। ব্যাঘ্র ভল্লকের দৌরাখ্য।

পশু। সশস্ত্রে গেলে না কেন ?

শাস্ত। যে সকল কাঠুরিয়ারা ব্যাঘ্র ভল্লুক বধ করিয়া বনমধ্যে প্রবেশ করিয়াছিল, তাহারা সকলেই যবন-হস্তে প্রাণত্যাগ করিয়াছে—কেহই ফিরিয়া আইসে নাই।

পশু। তুমিও না হয় না আসিতে ?

শাস্ত। তাহা হইলে কে আসিয়া আপনাকে সংবাদ দিত ?

পশুপতি হাসিয়া কহিলেন, “তুমিই আসিতে।”

শাস্ত্রশীল প্রণাম করিয়া কহিল, “আমিই সংবাদ দিতে আসিয়াছি।”

পশুপতি আনন্দিত হইয়া জিজ্ঞাসা করিলেন, “কি প্রকারে গেলে?”

শাস্ত্র। প্রথমে উষ্ণীয় অস্ত্র ও তুরকী বেশ সংগ্রহ করিলাম। তাহা বাঁধিয়া পৃষ্ঠে সংস্থাপিত করিলাম। তার উপর কাঠুরিয়াদিগের সঙ্গে বন-পথে প্রবেশ করিলাম। পরে যখন যবনেরা কাঠুরিয়াদিগকে দেখিতে পাইয়া তাহাদিগকে মারিতে প্রবৃত্ত হইল—তখন আমি অপসৃত হইয়া বৃক্ষান্তরালে বেশপরিবর্তন করিলাম। পরে মুসলমান হইয়া যবনশিবিরে সর্বত্র বেড়াইলাম।

পশু। প্রশংসনীয় বটে। যবন-সৈন্য কত দেখিলে?

শাস্ত্র। সে বৃহৎ অরণ্যে যত ধরে। বোধ হয়, পঁচিশ হাজার হইবে।

পশুপতি ভ্রূ কুঞ্চিত করিয়া কিয়ৎক্ষণ স্তব্ধ হইয়া রহিলেন, পরে কহিলেন, “তাহাদিগের কথাবার্তা কি শুনিলে?”

শাস্ত্র। বিস্তর শুনিলাম—কিন্তু তাহার কিছুই আপনার নিকট নিবেদন করিতে পারিলাম না।

পশু। কেন?

শাস্ত্র। যাবনিক ভাষায় পণ্ডিত নহি।

পশুপতি হাস্য করিলেন। শাস্ত্রশীল তখন কহিলেন, “মহম্মদ আলি এখানে যে আসিয়াছিলেন, তাহাতে বিপদ আশঙ্কা করিতেছি।”

পশুপতি চমকিত হইয়া কহিলেন, “কেন?”

শাস্ত্র। তিনি অলক্ষিত হইয়া আসিতে পারেন নাই। তাহার আগমনে কেহ কেহ জানিতে পারিয়াছে।

পশুপতি অত্যন্ত শঙ্কায়িত হইয়া কহিলেন, “কিসে জানিলে?”

শাস্ত্রশীল কহিলেন, “আমি শ্রীচরণ দর্শনে আসিবার সময় দেখিলাম যে, বৃক্ষতলে এক ব্যক্তি লুকাইয়া হইল তাহার যুদ্ধের সাজ। তাহার সঙ্গে কথোপকথনে বুঝিলাম যে, সে মহম্মদ আলিকে এ পুরীতে প্রবেশ করিতে দেখিয়া তাহার জগ্ম প্রতীক্ষা করিতেছে, অন্ধকারে তাহাকে চিনিতে পারিলাম না।”

পশু । তার পর ?

শাস্ত । তার পর দাস তাহাকে চিত্রগৃহে কারারুদ্ধ করিয়া রাখিয়া আসিয়াছি ।

পশুপতি চৌরোদ্ধরণিকণে সাধুবাদ করিতে লাগিলেন ; এবং কহিলেন, “কাল প্রাতে উঠিয়া সে ব্যক্তির প্রতি বিহিত করা যাইবেক । আজি রাত্রিতে সে কারারুদ্ধই থাক । এক্ষণে তোমাকে অণু এক কার্য সাধন করিতে হইবে । যবন-সেনাপতির ইচ্ছা, অণু রাত্রিতে তিনি মগধরাজপুত্রের ছিন্ন মস্তক দর্শন করেন । তাহা এখনই সংগ্রহ করিবে ।”

শাস্ত । কার্য নিতান্ত সহজ নহে । রাজপুত্র পিঁপড়ে মাছি ন’ন ।

পশু । আমি তোমাকে একা যুদ্ধে যাইতে বলিতেছি না । কতকগুলি লোক লইয়া তাঁহার বাড়ী আক্রমণ করিবে ।

শাস্ত । লোকে কি বলিবে ?

পশু । লোকে বলিবে, দস্যুতে তাঁহাকে মারিয়া গিয়াছে ।

শাস্ত । যে আঞ্জা, আমি চলিলাম ।

পশুপতি শাস্তশীলকে পুরস্কার দিয়া বিদায় করিলেন । পরে গৃহাভ্যন্তরে যথা বিচিত্র সূক্ষ্ম কারুকার্য-খচিত মন্দিরে অষ্টভূজা মূর্তি স্থাপিত আছে, তথায় গমন করিয়া প্রতিমাগ্রে সাষ্টাঙ্গে প্রণাম করিলেন । গাত্রোত্থান করিয়া যুক্তকরে ভক্তিভাবে ইষ্টদেবীর স্তুতি করিয়া কহিলেন, “জননি ! বিশ্বপালিনি ! আমি অকূল সাগরে ঝাঁপ দিলাম—দেখিও মা ! আমায় উদ্ধার করিও । আমি জননীস্বরূপা জন্মভূমি কখন দেবদেবী যবনকে বিক্রয় করিব না । কেবলমাত্র এই আমার পাপাভিসন্ধি যে, অন্ধম প্রাচীন রাজার স্থানে আমি রাজা হইব । যেমন কণ্টকের দ্বারা কণ্টক উদ্ধার করিয়া পরে উভয় কণ্টককে দূরে ফেলিয়া দেয়, তেমনি যবন-সহায়তায় রাজ্যলাভ করিয়া রাজ্য-সহায়তায় যবনকে নিপাত করিব । ইহাতে পাপ কি মা ? যদি ইহাতে পাপ হয়, যাবজ্জীবন প্রজার সুখানুষ্ঠান করিয়া সে পাপের প্রায়শ্চিত্ত করিব । জগৎপ্রসবিনি ! প্রসন্ন হইয়া আমার কামনা সিদ্ধ কর ।”

এই বলিয়া পশুপতি পুনরপি সাষ্টাঙ্গে প্রণাম করিলেন । প্রণাম করিয়া গাত্ৰোত্থান করিলেন—শয্যাগৃহে যাইবার জন্ত ফিরিয়া দেখিলেন—
—অপূর্ব দর্শন—

সম্মুখে দ্বারদেশ ব্যাপ্ত করিয়া, জীবনময়ী প্রতিমারূপিণী তরুণী দাঁড়াইয়া রহিয়াছে ।

পশুপতি প্রথমে চমকিত হইলেন—শিহরিয়া উঠিলেন । পরক্ষণেই উচ্ছ্বাসোন্মুখ সমুদ্র-বারিবৎ আনন্দে স্ফীত হইলেন ।

তরুণী বীণানিন্দিত স্বরে কহিলেন, “পশুপতি !”

পশুপতি দেখিলেন—মনোরমা ।

অষ্টম পরিচ্ছেদ : মোহিনী

সেই রত্নপ্রদীপদীপ্ত দেবীমন্দিরে, চন্দ্রালোকবিভাসিত দ্বারদেশে, মনোরমাকে দেখিয়া, পশুপতির হৃদয় উচ্ছ্বাসোন্মুখ সমুদ্রের গায় স্ফীত হইয়া উঠিল । মনোরমা নিতান্ত খর্ব্বাকৃতি নহে, তবে তাঁহাকে বালিকা বলিয়া বোধ হইত, তাহাব হেতু এই যে, মুখকান্তি অনির্বচনীয় কোমল, অনির্বচনীয় মধুর, নিতান্ত বালিকা বয়সেব ঔদাৰ্য্যবিশিষ্ট ; স্মুতরাং হেমচন্দ্র যে তাঁহার পঞ্চদশ বৎসর বয়ঃক্রম অনুভব করিয়াছিলেন, তাহা অগ্ণায় হয় নাই । মনোরমার বয়ঃক্রম যথার্থ পঞ্চদশ, কি ষোড়শ, কি তদধিক, কি তন্ন্যূন, তাহা ইতিহাসে লেখে না, পাঠক মহাশয় স্বয়ং সিদ্ধান্ত করিবেন ।

মনোরমার বয়স যতই হউক না কেন, তাঁহার রূপরাশি অতুল—
চক্ষুতে ধরে না । বাল্যে, কৈশোরে, যৌবনে, সর্বকালে সে রূপরাশি
দুর্লভ । এক বর্ণ সোনার চাঁপা, তাহাতে ভুজঙ্গশিশুশ্রেণীর গায় কুঞ্চিত
অলকশ্রেণী মুখখানি বেড়িয়া থাকে ; এক্ষণে বাপীজলসিঞ্চনে সে কেশ
ঝাজু হইয়াছে ; অর্দ্ধচন্দ্রাকৃত নির্মল ললাট, ভ্রমর-ভর-স্পন্দিত নীল-
পুষ্পতুল্য কৃষ্ণতার, চঞ্চল, লোচনযুগল ; মুহুমূহুঃ আকৃষ্ণ-বিষ্কারণ-
প্রবৃত্ত রক্তযুক্ত স্তূর্ণন নাসা ; অধরৌষ্ঠ যেন প্রাতঃশিশিরে সিক্ত
প্রাতঃসূর্য্যের কিরণে প্রোক্ষিত রক্তকুম্ভাবলীর স্তরযুগল তুল্য ; কপোল

যেন চন্দ্রকরোজ্জ্বল, নিতান্ত স্থির, গঙ্গাধুবিস্তারবৎ প্রসন্ন ; শাবকহিংসা-
 শঙ্কায় উত্তেজিত। হংসীর শ্যায় গ্রীবা—বেগী বাঁধিলেও সে গ্রীবার উপরে
 আবদ্ধ ক্ষুদ্র কুঞ্চিত কেশসকল আসিয়া কেলি করে। দ্বিরদ-রদ যদি
 কুসুমকোমল হইত, কিম্বা চম্পক যদি গঠনোপযোগী কাঠিণ্ড পাইত,
 কিম্বা চন্দ্রাকিরণ যদি শরীরবিশিষ্ট হইত, তবে তাহাতে সে বাহুযুগল
 গড়িতে পারা যাইত,—সে হৃদয় কেবল সেই হৃদয়েই গড়া যাইতে
 পারিত। এ সকলই অগ্ন সুন্দরীর আছে। মনোরমার রূপরাশি অতুল
 কেবল তাঁহার সর্বসঙ্গীণ সৌকুমার্যের জগ্ন। তাঁহার বদন সুকুমার ;
 অধর, ভ্রুযুগ, ললাট সুকুমার ; সুকুমার কপোল ; সুকুমার কেশ।
 অলকাবলী যে ভুজঙ্গশিশুরূপী সেও সুকুমার ভুজঙ্গশিশু। গ্রীবায়,
 গ্রীবভঙ্গীতে, সৌকুমার্য ; বাহুতে, বাহুর প্রক্ষেপে, সৌকুমার্য ; হৃদয়ের
 উচ্ছ্বাসে সেই সৌকুমার্য ; সুকুমার চরণ, চরণবিছাস সুকুমার। গমন
 সুকুমার, বসন্তবায়ুসঞ্চালিত কুসুমিত লতার মন্দান্দোলন তুল্য ; বচন
 সুকুমার, নিশীথসময়ে জলরাশিপার হইতে সমাগত বিরহ-সঙ্গীত তুল্য ;
 কটাক্ষ সুকুমার, ক্ষণমাত্র জগ্ন মেঘমালামুক্ত সুখাংশুর কিরণসম্পাত তুল্য ;
 আর ঐ যে মনোরমা দেবীগৃহদ্বারদেশে দাঁড়াইয়া আছেন,—পশুপতির
 মুখাবলোকন জগ্ন উন্নতমুখী, নয়নভারা উদ্ধরস্থাপনম্পন্দিত, আর বাপী-
 জলার্দ্ৰ, অবদ্ধ কেশরাশির কিয়দংশ এক হস্তে ধরিয়া, এক চরণ ঈষদ্বাত্র
 অগ্রবর্তী করিয়া, যে ভঙ্গীতে মনোরমা দাঁড়াইয়া আছে, ও ভঙ্গীও
 সুকুমার ; নবীন সূর্য্যোদয়ে সত্ত্বঃপ্রফুল্লদলমালাময়ী নলিনীর প্রসন্ন
 বীড়াতুল্য সুকুমার। সেই মাধুর্য্যময় দেহের উপর দেবীপার্শ্বস্থিত
 রত্নদৌপের আলোক পতিত হইল। পশুপতি অতৃপ্ত নয়নে দেখিতে
 লাগিলেন।

নবম পরিচ্ছেদ : মোহিতা

পশুপতি অতৃপ্তনয়নে দেখিতে লাগিলেন। দেখিতে দেখিতে
 মনোরমার সৌন্দর্য্য-সাগরের এক অপূর্ব্ব মহিমা দেখিতে পাইলেন।
 যেমন সূর্য্যের প্রথর করমালার হান্তময় অধরাশি মেঘসঙ্কারে ক্রমে ক্রমে

গম্ভীর কৃষ্ণকাস্তি প্রাপ্ত হয়, তেমনই পশুপতি দেখিতে দেখিতে মনোরমার সৌকুমার্যময় মুখমণ্ডল গম্ভীর হইতে লাগিল। আর সে বালিকামূলভ ঔদার্যব্যঞ্জক ভাব রহিল না। অপূর্ব তেজোভিব্যক্তির সহিত প্রগল্ভ বয়সেরও চূর্ণভ গাম্ভীর্য তাহাতে বিরাজ করিতে লাগিল। সরলতাকে ঢাকিয়া প্রতিভা উদ্ভিত হইল। পশুপতি কহিলেন, “মনোরমা, এক রাত্রিতে কেন আসিয়াছ ?—এ কি ? আজি তোমার এ ভাব কেন ?”

মনোরমা উত্তর করিলেন, “আমার কি ভাব দেখিলে ?”

প। তোমার ছই মূর্তি—এক মূর্তি আনন্দময়ী, সরলা বালিকা—সে মূর্তিতে কেন আসিলে না ?—সেইরূপে আমার হৃদয় শীতল হয়। আর তোমার এই মূর্তি গম্ভীরা তেজস্বিনী প্রতিভাময়ী প্রখরবুদ্ধিশালিনী—এ মূর্তি দেখিলে আমি ভীত হই। তখন বুঝিতে পারি যে, তুমি কোন দৃঢ় প্রতিজ্ঞাবদ্ধ হইয়াছ। আজি তুমি এ মূর্তিতে আমাকে ভয় দেখাইতে কেন আসিয়াছ ?

ম। পশুপতি, তুমি এত রাত্রি জাগরণ করিয়া কি করিতেছ ?

প। আমি রাজকার্য্যে ব্যস্ত ছিলাম—কিন্তু তুমি—

ম। পশুপতি, আবার ? রাজকার্য্যে না নিজকার্য্যে ?

প। নিজকার্য্যই বল। রাজকার্য্যেই হউক, আর নিজকার্য্যেই হউক, আমি কবে না ব্যস্ত থাকি ? তুমি আজ জিজ্ঞাসা করিতেছ কেন ?

ম। আমি সকল শুনিয়াছি।

প। কি শুনিয়াছ ?

ম। যবনের সঙ্গে পশুপতির মন্ত্রণা—শাস্ত্রশীলের সঙ্গে মন্ত্রণা—দ্বারের পার্শ্বে থাকিয়া সকল শুনিয়াছি।

পশুপতিব মুখমণ্ডল যেন মেঘাঙ্ককারে ব্যাপ্ত হইল। তিনি বহুক্ষণ চিন্তামগ্ন থাকিয়া কহিলেন, “ভালই হইয়াছে। সকল কথাই আমি তোমাকে বলিতাম—না হয় তুমি আগে শুনিয়াছ। তুমি কোন কথা না জান ?”

ম। পশুপতি, তুমি আমাকে ত্যাগ করিলে ?

প। কেন, মনোরমা ? তোমার জগ্গই আমি এ মন্ত্রণা করিয়াছি।

আমি এক্ষণে রাজভৃত্য, ইচ্ছামত কার্য্য করিতে পারি না। এখন বিধবা-বিবাহ করিলে জনসমাজে পরিত্যক্ত হইব; কিন্তু যখন আমি স্বয়ং রাজা হইব, তখন কে আমায় ত্যাগ করিবে? যেমন বল্লালসেন কোলীশ্বের নূতন পদ্ধতি প্রচলিত করিয়াছিলেন, আমি সেইরূপ বিধবা-পরিণয়ের নূতন পদ্ধতি প্রচলিত করিব।

মনোরমা দীর্ঘশ্বাস ত্যাগ করিয়া কহিলেন, “পশুপতি, সে সকল আমার স্বপ্ন মাত্র। তুমি রাজা হইলে, আমার সে স্বপ্ন ভঙ্গ হইবে। আমি কখনও তোমার মহিষী হইব না।”

প। কেন মনোরমা?

ম। কেন? তুমি রাজ্যভার গ্রহণ করিলে আর কি আমায় ভালবাসিবে? রাজ্যই তোমার হৃদয়ে প্রধান স্থান পাইবে!—তখন আমার প্রতি তোমার অনাদর হইবে। তুমি যদি ভাল না বাসিলে—তবে আমি কেন তোমার পত্নী-শৃঙ্খলে বাঁধা পড়িব?

প। এ কথা কে কেন মনে স্থান দিতেছে? আগে তুমি—পরে রাজ্য। আমার চিরকাল এইরূপ থাকিবে।

ম। রাজা হইয়া যদি তাহা কর, রাজ্য অপেক্ষা মহিষী যদি অধিক ভালবাস, তবে তুমি রাজ্য করিতে পারিবে না। তুমি রাজ্যচ্যুত হইবে। স্ত্রী-রাজার রাজ্য থাকে না।

পশুপতি প্রশংসমানলোচনে মনোরমার মুখপ্রতি চাহিয়া রহিলেন; কহিলেন, “যাহার বামে এমন সরস্বতী, তাঁহার আশঙ্কা কি? না হয়, তাহাই হউক। তোমার জন্ম রাজ্য ত্যাগ করিব।”

ম। তবে রাজ্য গ্রহণ করিতেছে কেন? ত্যাগের জন্ম গ্রহণে ফল কি?

প। তোমার পাণিগ্রহণ।

ম। সে আশা ত্যাগ কর। তুমি রাজ্যলাভ করিলে আমি কখনও তোমার পত্নী হইব না।

প। কেন, মনোরমা! আমি কি অপরাধ করিলাম?

ম। তুমি বিশ্বাসঘাতক—আমি বিশ্বাসঘাতককে কি প্রকারে ভক্তি-

করিব ? কি প্রকারে বিশ্বাসঘাতককে ভালবাসিব ?

প। কেন, আমি কিসে বিশ্বাসঘাতক হইলাম ?

ম। তোমার প্রতিপালক প্রভুকে রাজ্যচ্যুত করিবার কল্পনা করিতেছ ; শরণাগত রাজপুত্রকে মারিবার কল্পনা করিতেছ ; ইহা কি বিশ্বাসঘাতকের কৰ্ম নয় ? যে প্রভুর নিকট বিশ্বাস নষ্ট করিল, সে স্ত্রীর নিকট অবিশ্বাসী না হইবে কেন ?

পশুপতি নীরব হইয়া রহিলেন। মনোরমা পুনরপি বলিতে লাগিলেন, “পশুপতি, আমি মিনতি করিতেছি, এই ছুর্বুদ্ধি ত্যাগ কর।”

পশুপতি পূর্ববৎ অধোবদনে রহিলেন। তাঁহার রাজ্যাকাঙ্ক্ষা এবং মনোরমাকে লাভ করিবার আকাঙ্ক্ষা উভয়ই গুরুতর ? কিন্তু রাজ্য-লাভের যত্ন করিলে মনোরমার শ্রণয় হারাইতে হয়। সেও অত্যাচারী। উভয় সঙ্কটে তাঁহার চিন্তামধ্যে গুরুতর চাঞ্চল্য জন্মিল। তাঁহার মতির স্থিরতা দূর হইতে লাগিল। “যদি মনোরমাকে পাই, ভিক্ষাও ভাল, রাজ্যে কাজ কি ?” এইরূপ পুনঃ পুনঃ মনে ইচ্ছা হইতে লাগিল। কিন্তু তখনই আবার ভাবিতে লাগিলেন, “কিন্তু তাহা হইলে লোকনিন্দা, জনসমাজে কলঙ্ক, জাতিনাশ হইবে ; সকলের ঘৃণিত হইব। তাহা কি প্রকারে সহিব ?” পশুপতি নীরবে রহিলেন ; কোন উত্তর দিতে পারিলেন না।

মনোরমা উত্তর না পাইয়া কহিতে লাগিল, “শুন পশুপতি, তুমি আমার কথায় উত্তর দিলে না। আমি চলিলাম। কিন্তু এই প্রতিজ্ঞা করিতেছি যে, বিশ্বাসঘাতকের সঙ্গে ইহজন্মে আমার সাক্ষাৎ হইবে না।”

এই বলিয়া মনোরমা পশ্চাৎ ফিরিল। পশুপতি রোদন করিয়া উঠিলেন।

অমনই মনোরমা আবার ফিরিল। আসিয়া, পশুপতির হস্তধারণ করিল। পশুপতি তাঁহার মুখপানে চাহিয়া দেখিলেন। দেখিলেন, তেজো-গর্ববিশিষ্টা, কুঞ্চিত্তজ্বীচিবিক্ষেপকারিণী সরস্বতী মূর্ত্তি আর নাই ; সেই প্রতিভা দেবী অন্তর্দ্বান হইয়াছেন ; কুসুমশুকুমারী বালিকা তাঁহার হস্তধারণ করিয়া তাঁহার সঙ্গে রোদন করিতেছে।

মনোরমা কহিলেন, “পশুপতি, কাঁদিতেছ কেন ?”

পশুপতি চক্ষুর জল মুছিয়া কহিলেন, “তোমার কথায় ।”

ম । কেন, আমি কি বলিয়াছি ?

প । তুমি আমাকে ত্যাগ করিয়া যাইতেছিলে ।

ম । আর আমি এমন করিব না ।

প । তুমি আমার রাজমহিষী হইবে ?

ম । হইব ।

পশুপতির আনন্দসাগর উছলিয়া উঠিল । উভয়ে অশ্রুপূর্ণ লোচনে উভয়ের মুখপ্রতি চাহিয়া উপবেশন করিয়া রহিলেন । সহসা মনোরমা পক্ষিণীর শ্রায় গাত্রোথান করিয়া চলিয়া গেলেন ।

দশম পরিচ্ছেদ : কাঁদ

পূর্বেই কথিত হইয়াছে যে, বাপীতীর হইতে হেমচন্দ্র মনোরমার অনুবর্তী হইয়া যবনসন্ধানে আসিতেছিলেন । মনোরমা ধর্মাধিকারে গৃহ কিছু দূরে থাকিতে হেমচন্দ্রকে কহিলেন, “সন্মুখে এই অট্টালিকা দেখিতেছ ?”

হেম । দেখিতেছি ।

মনো । ঐখানে যবন প্রবেশ করিয়াছে ।

হেম । কেন ?

এ প্রশ্নের উত্তর না দিয়া মনোরমা কহিলেন, “তুমি এইখানে গাছের আড়ালে থাক । যবনকে এই স্থান দিয়া যাইতে হইবে ।”

হেম । তুমি কোথায় যাইবে ?

মনো । আমিও এই বাড়ীতে যাইব ।

হেমচন্দ্র স্বীকৃত হইলেন । মনোরমার আচরণ দেখিয়া কিছু বিস্মিত হইলেন । তাহার পরামর্শানুসারে পথিপার্শ্বে বৃক্ষান্তরালে লুকায়িত হইয়া রহিলেন । মনোরমা গুপ্তপথে অলক্ষ্যে গৃহমধ্যে প্রবেশ করিলেন ।

এই সময়ে শাস্ত্রশীল পশুপতির গৃহে আসিতেছিল । সে দেখিল যে, এক ব্যক্তি বৃক্ষান্তরালে লুকায়িত হইল । শাস্ত্রশীল সন্দেহপ্রযুক্ত-

সেই বৃক্ষতলে গেল। তথায় হেমচন্দ্রকে দেখিয়া প্রথমে চোর অনুমানে কহিল, “কে তুমি? এখানে কি করিতেছ?” পরে তৎক্ষণে হেমচন্দ্রের বহুমূল্যের অলঙ্কারশোভিত যোদ্ধবেশ দেখিয়া কহিল, আপনি কে?”

হেমচন্দ্র কহিলেন, “আমি যে হই না কেন?”

শা। আপনি এখানে কি করিতেছেন?

হেম। আমি এখানে যবনানুসন্ধান করিতেছি।

শান্তশীল চমকিত হইয়া কহিল, “যবন কোথায়?”

হে। এই গৃহমধ্যে প্রবেশ করিয়াছে।

শান্তশীল ভীত ব্যক্তির স্তায় স্বরে কহিল, “এ গৃহে কেন?”

হে। তাহা আমি জানি না।

শা। এ গৃহ কাহার?

হেম। তাহা জানি না।

শা। তবে আপনি কি প্রকারে জানিলেন যে, এই গৃহে যবন প্রবেশ করিয়াছে?

হেম। তা তোমার শুনিয়া কি হইবে?

শা। এই গৃহ আমার। যদি যবন ইহাতে প্রবেশ করিয়া থাকে, তবে কোন অনিষ্টকামনা করিয়া গিয়াছে সন্দেহ নাই। আপনি যোদ্ধা এবং যবনদ্রোহী দেখিতেছি। যদি ইচ্ছা থাকে, তবে আমার সঙ্গে আসুন—উভয়ে চোরকে ধৃত করিব।

হেমচন্দ্র সম্মত হইয়া শান্তশীলের সঙ্গে চলিলেন। শান্তশীল সিংহদ্বার দিয়া পশুপতির গৃহে হেমচন্দ্রকে লইয়া প্রবেশ করিলেন এবং এক কক্ষ-মধ্যে প্রবেশ করিয়া কহিলেন, “এই গৃহমধ্যে আমার সুবর্ণ রত্নাদি সকল আছে, আপনি ইহার প্রহরায় অবস্থিতি করুন। আমি ততক্ষণ সন্ধান করিয়া আসি, কোন্ স্থানে যবন লুকায়িত আছে।”

এই কথ' বলিয়াই শান্তশীল সেই কক্ষ হইতে নিজ্জাস্ত হইলেন এবং হেমচন্দ্র কোন উত্তর দিতে না দিতেই বাহির দিকে কক্ষদ্বার রুদ্ধ করিলেন। হেমচন্দ্র কাঁদে পড়িয়া বন্দী হইয়া রহিলেন।

একদশ পরিচ্ছেদ : মুক্ত

মনোরমা পশুপতির নিকট বিদায় হইয়াই দ্রুতপদে চিত্রগৃহে আসিল। পশুপতির সহিত শাস্ত্রশীলের কথোপকথন সময়ে শুনিয়াছিল যে, ঐ ঘরে হেমচন্দ্র রুদ্ধ হইয়াছিলেন। আসিয়াই চিত্রগৃহের দ্বারোন্মোচন করিল। হেমচন্দ্রকে কহিল, “হেমচন্দ্র, বাহির হইয়া যাও।”

হেমচন্দ্র গৃহের বাহিরে আসিলেন। মনোরমা তাঁহার সঙ্গে সঙ্গে আসিল। তখন হেমচন্দ্র মনোরমাকে জিজ্ঞাসা করিলেম, “আমি রুদ্ধ হইয়াছিলাম কেন ?

ম। তাহা পরে বলিব।

হে। যে ব্যক্তি আমাকে রুদ্ধ করিয়াছিল, সে কে ?

ম। শাস্ত্রশীল।

হে। শাস্ত্রশীল কে ?

ম। চৌরোদ্ধরণিক।

হে। এই কি তাহার বাড়ী ?

ম। না।

হে। এ কাহার বাড়ী ?

ম। পবে বলিব।

হে। যখন কোথায় গেল ?

ম। শিবিরে গিয়াছে।

হে। শিবির! কত যখন আসিয়াছে ?

ম। পঁচিশ হাজার।

হে। কোথায় তাদের শিবির ?

ম। মহাবনে।

হে। মহাবন কোথায় ?

ম। এই নগরের উত্তরে কিছু দূরে।

হেমচন্দ্র করলগ্নকপোল হইয়া ভাবিতে লাগিলেন।

মনোরমা কহিল, “ভাবিতেছ কেন ? তুমি কি তাহাদিগের সহিত যুদ্ধ করিবে ?

হে । পঁচিশ হাজারের সঙ্গে একের যুদ্ধ সম্ভবে ?

ম । তবে কি করিবে—ঘরে ফিরিয়া যাইবে ?

হে । এখন ঘরে যাব না ।

ম । কোথা যাবে ?

হে । মহাবনে ।

ম । যুদ্ধ করিবে না, তবে মহাবনে যাইবে কেন ?

হে । যবনদিগকে দেখিতে ।

ম । যুদ্ধ করিবে না, তবে দেখিয়া কি হইবে ?

হে । দেখিলে জানিতে পারিব, কি উপায়ে তাহাদিগকে মারিতে পারিব !

মনোরমা চমকিয়া উঠিলেন । কহিলেন, “বিশ হাজার মানুষ মারিবে ? কি সর্বনাশ । ছি ! ছি !”

হে । মনোরমা, তুমি এ সকল সংবাদ কোথায় পাইলে ?

ম । আরও সংবাদ আছে । আজ রাত্রিতে তোমাকে মারিবার জ্ঞান তোমার ঘরে দস্যু আসিবে । আজি ঘরে যাইও না ।

এই বলিয়া মনোরমা উদ্ধ্বাসে পলায়ন করিল ।

দ্বাদশ পরিচ্ছেদ : অতিথি-সৎকার

হেমচন্দ্র গৃহে প্রত্যাগমন করিয়া এক সুন্দর অশ্ব সজ্জিত করিয়া তত্পরি আরোহণ করিলেন : এবং অশ্বে কশাঘাত করিয়া মহাবনাভিমুখে যাত্রা করিলেন । নগর পার হইলেন ; তৎপরে প্রাস্তর । প্রাস্তরেরও কিয়দংশ পার হইলেন, এমন সময়ে অকস্মাৎ স্বল্পদেশে গুরুতর বেদনা পাইলেন । দেখিলেন, স্বন্ধে একটি তীর বিদ্ধ হইয়াছে । পশ্চাতে অশ্বের পদধ্বনি শ্রুত হইল । ফিরিয়া দেখিলেন, তিনজন অশ্বারোহী আসিতেছে ।

হেমচন্দ্র বোটকের মুখ ফিরাইয়া তাহাদিগের প্রতীক্ষা করিতে.

লাগিলেন। ফিরিবামাত্র দেখিলেন, প্রত্যেক অশ্বারোহী তাঁহাকে লক্ষ্য করিয়া এক এক শরসন্ধান করিল। হেমচন্দ্র বিচিত্র শিক্ষাকৌশলে করস্ব শূলান্দোলন দ্বারা তীরত্রয়ের আঘাত এককালে নিবারণ করিলেন।

অশ্বারোহিণ পুনর্ব্বার একেবারে শরসংযোগ করিল এবং তাহা নিবারিত হইতে না হইতেই পুনর্ব্বার শরত্রয় ত্যাগ করিল।

এইরূপ অবিরতহস্তে হেমচন্দ্রের উপর বাণক্ষেপ করিতে লাগিল। হেমচন্দ্র তখন বিচিত্র রঙ্গাদিমণ্ডিত চর্ম্ম হস্তে লইলেন, এবং তৎসঞ্চালন দ্বারা অবলীলাক্রমে সেই শরঞ্জালবর্ষণ নিরাকরণ করিতে লাগিলেন; কদাচিৎ ছুই এক শর অশ্বশরীরে বিদ্ধ হইল মাত্র। স্বয়ং অক্ষত রহিলেন।

বিস্মিত হইয়া অশ্বারোহিত্রয় নিরস্ত হইল। পরস্পরে কি পরামর্শ করিতে লাগিল। হেমচন্দ্র সেই অবকাশে একজনের প্রতি শরত্যাগ করিলেন। সে অব্যর্থ সন্ধান। শর একজন অশ্বারোহীর ললাটমধ্যে বিদ্ধ হইল। সে অমনি অশ্বপৃষ্ঠচ্যুত হইয়া ধরাতলশায়িত হইল।

তৎক্ষণাৎ অপর ছুই জনে অশ্বে কশাঘাত করিয়া, শূলযুগল প্রণত করিয়া হেমচন্দ্রের প্রতি ধাবমান হইল এবং শূলক্ষেপযোগ্য নৈকট্য প্রাপ্ত হইলে শূলক্ষেপ করিল। যদি তাহারা হেমচন্দ্রকে লক্ষ্য করিয়া শূল ত্যাগ করিত, তবে হেমচন্দ্রের বিচিত্র শিক্ষায় তাহা নিবারিত হওয়ার সম্ভাবনা ছিল, কিন্তু তাহা না করিয়া আক্রমণকারীরা হেমচন্দ্রের অশ্বপ্রতি লক্ষ্য করিয়া শূলত্যাগ করিয়াছিল। তত দূর অধঃ পর্য্যস্ত হস্তসঞ্চালনে হেমচন্দ্রের বিলম্ব হইল। একের শূল নিবারিত হইল, অপরের নিবারিত হইল না। শূল অশ্বের গ্রীবাতে বিদ্ধ হইল। সেই আঘাত প্রাপ্তিমাত্র সে রমণীয় ঘোড়ক মুমূর্ষু হইয়া ভূতলে পড়িল।

সুশিক্ষিতের ঞায় হেমচন্দ্র পতনশীল অশ্ব হইতে লক্ষ্য দিয়া ভূতলে দাঁড়াইলেন এবং পলকমধ্যে নিজ করস্ব করাল শূল উন্নত করিয়া কহিলেন, “আমার পিতৃদত্ত শূল শত্রুরক্ত পান না করিয়া কখন ফেরে নাই।” তাঁহার এই কথা সমাপ্ত হইতে না হইতে তদগ্রে বিদ্ধ হইয়া দ্বিতীয় অশ্বারোহী ভূতলে পতিত হইল।

ইহা দেখিয়া তৃতীয় অস্বারোহী অশ্বের মুখ কিরাইয়া বেগে পলায়ন করিল। সেই শাস্ত্রশীল।

হেমচন্দ্র তখন অবকাশ পাইয়া নিজ স্বক্ৰবিন্দু তীর মোচন করিলেন। তীর কিছু অধিক মাংসভেদ করিয়াছিল—মোচন মাত্র অতিশয় শোণিত-ক্ষতি হইতে লাগিল। হেমচন্দ্র নিজ বস্ত্র দ্বারা তাহার নিবারণের চেষ্টা করিতে লাগিলেন। কিন্তু তাহা নিষ্ফল হইল। ক্রমে হেমচন্দ্র রক্তক্ষতি হেতু দুর্বল হইতে লাগিলেন। তখন বুঝিলেন যে, যবন-শিবিরে গমনের অণু আর কোন সম্ভাবনা নাই। অশ্ব হত হইয়াছে—নিজবল হত হইতেছে। অতএব অপ্রসন্ন মনে, ধীরে ধীরে, নগরাভিমুখে প্রত্যাবর্তন করিতে লাগিলেন।

হেমচন্দ্র প্রাস্তুর পার হইলেন। তখন শরীর নিতান্ত অবশ হইয়া আসিল—শোণিতস্রোতে সর্বদাঙ্গ আর্দ্র হইল; গতিশক্তি রহিত হইয়া আসিতে লাগিল। কষ্টে নগরমধ্যে প্রবেশ করিলেন। আর যাইতে পারেন না। এক কুটারের নিকট বটবৃক্ষতলে উপবেশন করিলেন। তখন রজনী প্রভাত হইয়াছে। রাত্রিজাগরণ—সমস্ত রাত্রির পরিশ্রম—রক্তস্রাবে বলহানি—এই সকল কারণে হেমচন্দ্রের চক্ষুতে পৃথিবী ঘুরিতে লাগিল। তিনি বৃক্ষমূলে পৃষ্ঠ রক্ষা করিলেন। চক্ষু মুদ্রিত হইল—নিদ্রা প্রবল হইল—চেতনা অপঙ্গত হইল। নিদ্রাবেশে স্বপ্নে যেন শুনিলেন, কে গায়িতেছে,

“কণ্টকে গঠিল বিধি মুণাল অধমে।”

তৃতীয় খণ্ড

প্রথম পরিচ্ছেদ : “উমি তোমার কে ?”

যে কুটারের নিকটস্থ বৃক্ষতলে বসিয়া হেমচন্দ্র বিশ্রাম করিতেছিলেন, সেই কুটারमध्ये এক পাটনী বাস করিত। কুটারमध्ये তিনটি ঘর। এক ঘরে পাটনীর পাকাদি সমাপন হইত। অপর ঘরে পাটনীর পত্নী শিশুসন্তানসকল লইয়া শয়ন করিত। তৃতীয় ঘরে পাটনীর যুবতী কণ্ঠা রত্নময়ী আর অপর দুইটি স্ত্রীলোক শয়ন করিয়াছিল। সেই দুইটি স্ত্রীলোক পাঠক মহাশয়ের নিকট পরিচিতা ; মৃগালিনী আর গিরিজায়া নবদ্বীপে অল্প আশ্রয় না পাইয়া এই স্থানে আশ্রয় লইয়াছিলেন।

একে একে তিনটি স্ত্রীলোক প্রভাবে জাগরিতা হইল। প্রথমে রত্নময়ী জাগিল। গিরিজায়াকে সম্বোধন করিয়া কহিল, “সই ?”

গি। কি সই ?

র। তুমি কোথায় সই ?

গি। বিছানাসই।

র। উঠ না সই !

গি। না সই।

র। গায়ে জল দিব সই।

গি। জলসই ? ভাল সই, তাও সই।

র। নহিলে ছাড়ি কই।

গি। ছাড়িবে কেন সই ? তুমি আমার প্রাণের সই—তোমার মত আছে কই ? তুমি পারঘাটার রসমই—তোমায় না কইলে আর কারে কই ?

র। কথায় সই তুমি চিরজই ; আমি তোমার কাছে বোবা হই, আর মিলাইতে পারি কই ?

গি। আরও মিল চাই ?

র। তোমার মুখে ছাই, আর মিলে কাজ নাই, আমি কাজে যাই।
এই বলিয়া রত্নময়ী গৃহকর্মে গেল। মৃগালিনী এ পর্য্যন্ত কোন
কথা কহেন নাই। এখন গিরিজায়া তাঁহাকে সম্বোধন করিয়া কহিল,
“ঠাকুরাণি, জাগিয়াছ’?”

মৃগালিনী কহিলেন, “জাগিয়াই আছি। জাগিয়াই থাকি।

গি। কি ভাবিতেছিলে ?

মৃ। যাহা ভাবি।

গিরিজায়া তখন গম্ভীরভাবে কহিল, “কি করিব ? আমার দোষ
নাই। আমি শুনিয়াছি, তিনি এই নগরমধ্যে আছেন ; এ পর্য্যন্ত
সন্ধান পাই নাই। কিন্তু আমরা ত সবে দুই তিন দিন আসিয়াছি :
শীঘ্র সন্ধান করিব।”

মৃ। গিরিজায়া, যদি এ নগরে সন্ধান না পাই ? তবে যে এই
পাটিনীর গৃহে মৃত্যু পর্য্যন্ত বাস করিতে হইবে। আমার যে যাইবার স্থান
নাই।

মৃগালিনী উপাধানে মুখ লুকাইলেন। গিরিজায়ারও গণ্ডে নীরবশ্রুত
অশ্রু বহিতে লাগিল।

এমন সময়ে রত্নময়ী শশব্যস্তে গৃহমধ্যে আসিয়া কহিল, “সই !
সই ! দেখিয়া যাও। আমাদিগের বটতলায় কে ঘুমাইতেছে। আশ্চর্য্য
পুরুষ !”

গিরিজায়া কুটারদ্বারে দেখিতে আসিল। মৃগালিনীও কুটারদ্বার
পর্য্যন্ত আসিয়া দেখিলেন। উভয়েই দৃষ্টিমাত্র চিনিল।

সাগর একেবারে উছলিয়া উঠিল। মৃগালিনী গিরিজায়াকে আলিঙ্গন
করিলেন। গিরিজায়া গায়িল,

“কণ্টকে গঠিল বিধি মৃগাল অধমে।”

সেই ঋনি স্বপ্নবৎ হেমচন্দ্রের কর্ণে প্রবেশ করিয়াছিল। মৃগালিনী
গিরিজায়ার কর্ণকণ্ঠয়ন দেখিয়া কহিলেন, “চূপ, রাক্ষসী, আমাদিগের দেখা
দেওয়া হইবে না, ঐ উনি জাগরিত হইতেছেন। এই অন্তরাল হইতে
দেখ, উনি কি করেন। উনি যেখানে যান, অদৃশ্যভাবে দূরে থাকিয়া

উহার সঙ্গে যাও।—এ কি! উহার অঙ্গ রক্তময় দেখিতেছি কেন? চল, তবে আমিও সঙ্গে চলিলাম।”

হেমচন্দ্রের ঘুম ভাঙ্গিয়াছিল। প্রাতঃকাল উপস্থিত দেখিয়া তিনি শূলদণ্ডে ভর করিয়া গাত্রোত্থান করিলেন এবং ধীরে ধীরে গৃহাভিমুখে চলিলেন।

হেমচন্দ্র কিয়দূর গেলে, মৃণালিনী আর গিরিজায়া তাঁহার অনুসরণার্থ গৃহ হইতে নিষ্কাশিত হইলেন। তখন রত্নময়ী জিজ্ঞাসা করিল, “ঠাকুরাণি, উনি তোমার কে?”

মৃণালিনী কহিলেন, “দেবতা জানেন।”

দ্বিতীয় পরিচ্ছেদ : প্রতিজ্ঞা—পর্বতো বহিমান্

বিশ্রাম করিয়া হেমচন্দ্র কিঞ্চিৎ সবল হইয়াছিলেন। শোণিতস্রাবও কতক মন্দীভূত হইয়াছিল। শূলে ভর করিয়া হেমচন্দ্র স্বচ্ছন্দে গৃহে প্রত্যাগমন করিলেন।

গৃহে আসিয়া দেখিলেন, মনোরমা দ্বারদেশে দাঁড়াইয়া আছেন।

মৃণালিনী ও গিরিজায়া অন্তরালে থাকিয়া মনোরমাকে দেখিলেন।

মনোরমা চিত্রার্পিত পুস্তলিকার আয় দাঁড়াইয়া রহিলেন। দেখিয়া মৃণালিনী মনে মনে ভাবিলেন, “আমার প্রভু যদি রূপে বশীভূত হইয়েন, তবে আমার শ্বখের নিশি প্রভাত হইয়াছে।” গিরিজায়া ভাবিল, “রাজপুত্র যদি রূপে মুগ্ধ হইয়েন, তবে আমার ঠাকুরাণীর কপাল ভাঙ্গিয়াছে।”

হেমচন্দ্র মনোরমার নিকট আসিয়া কহিলেন, “মনোরমা—এমন করিয়া দাঁড়াইয়া রহিয়াছ কেন?”

মনোরমা কোন কথা কহিলেন না। হেমচন্দ্র পুনরপি ডাকিলেন, “মনোরমা!”

তথাপি উত্তর নাই; হেমচন্দ্র দেখিলেন, আকাশমার্গে তাঁহার স্থির-গুপ্তি স্থাপিত হইয়াছে।

হেমচন্দ্র পুনরায় বলিলেন, “মনোরমা, কি হইয়াছে ?”

তখন মনোরমা ধীরে ধীরে আকাশ হইতে চক্ষু ফিরাইয়া হেমচন্দ্রের মুখমণ্ডলে স্থাপিত করিল এবং কিয়ৎকাল অনিমেষলোচনে তৎপ্রতি চাহিয়া রহিল। পরে হেমচন্দ্রের রুধিরাক্ত পরিচ্ছদে দৃষ্টিপাত হইল। তখন মনোরমা বিস্মিত হইয়া কহিল, “এ কি হেমচন্দ্র ! রক্ত কেন ? তোমার মুখ শুষ্ক ; তুমি কি আহত হইয়াছ ?”

হেমচন্দ্র অঙ্গুলি দ্বারা স্বক্কের ক্ষত দেখাইয়া দিলেন।

মনোরমা তখন হেমচন্দ্রের হস্ত ধারণ করিয়া গৃহমধ্যে পালঙ্কোপরি লইয়া গেল এবং পলকমধ্যে বারিপূর্ণ ভূঙ্গার আনীত করিয়া, একে একে হেমচন্দ্রের গাত্রবসন পরিত্যক্ত করাইয়া অঙ্গের রুধির সকল ধৌত করিল এবং গোজ্জাতিপ্রলোভন নবদুর্বাদল ভূমি হইতে ছিন্ন করিয়া আপন কুন্দনিন্দিত দস্তে চর্বিবত করিল। পরে তাহা ক্ষতমুখে প্রয়োগ করিয়া উপবীতাকারে বস্ত্র দ্বারা বাঁধিল। তখন কহিল, “হেমচন্দ্র ! আর কি করিব ? তুমি সমস্ত রাত্রি জাগরণ করিয়াছ, নিদ্রা যাইবে ?”

হেমচন্দ্র কহিলেন, “নিদ্রাভাবে নিতাস্ত কাতর হইতেছি।”

মৃগালিনী মনোরমার কার্য দেখিয়া চিস্তিতাস্তঃকরণে গিরিজায়াকে কহিলেন, “এ কে গিরিজায়া ?”

গি। নাম শুনিলাম মনোরমা।

মৃ। এ কি হেমচন্দ্রের মনোরমা ?

গি। তুমি কি বিবেচনা করিতেছ ?

মৃ। আমি ভাবিতেছি, মনোরমাই ভাগ্যবতী। আমি হেমচন্দ্রে সেবা করিতে পারিলাম না, সে করিল। যে কার্যের জন্তু আমা অস্তঃকরণ দক্ষ হইতেছিল—মনোরমা সে কার্য সম্পন্ন করিল—দেবতার উহাকে আশ্রয়িতী করুন। গিরিজায়া, আমি গৃহে চলিলাম আমার আর থাকা উচিত নহে। তুমি এই পল্লীতে থাক, হেমচন্দ্র কেমন থাকেন, সংবাদ লইয়া যাইও। মনোরমা যেই হউক, হেমচন্দ্র আমারই।

তৃতীয় পরিচ্ছেদ : হেতু—বুমাৎ

মনোরমা এবং হেমচন্দ্র গৃহমধ্যে প্রবেশ করিলে মৃণালিনীকে বিদায় দিয়া গিরিজায়া উপবনগৃহ প্রদক্ষিণ করিতে লাগিলেন। যেখানে যেখানে বাতায়ন-পথ মুক্ত দেখিলেন, সেইখানে সাবধানে মুখ উন্নত করিয়া গৃহমধ্যে দৃষ্টিপাত করিলেন। এক কক্ষে হেমচন্দ্রকে শয়নাবস্থায় দেখিতে পাইলেন; দেখিলেন, তাঁহার শয্যোপরি মনোরমা বসিয়া আছে। গিরিজায়া সেই বাতায়নতলে উপবেশন করিলেন। পূর্বরাত্রে সেই বাতায়ন-পথে যখন হেমচন্দ্রকে দেখা দিয়াছিল।

বাতায়ন-তলে উপবেশনে গিরিজায়ার অভিপ্রায় এই ছিল যে, হেমচন্দ্র-মনোরমায় কি কথোপকথন হয়, তাহা বিরলে থাকিয়া শ্রবণ করে। কিন্তু হেমচন্দ্র নিদ্রাগত, কোন কথোপকথনই ত হয় না। একাকী নীরবে সেই বাতায়ন-তলে বসিয়া গিরিজায়ার বড়ই কষ্ট হইল। কথা কহিতে পায় না, হাসিতে পায় না, ব্যঙ্গ করিতে পায় না, বড়ই কষ্ট—স্বীরসনা কণ্ঠস্থিত হইয়া উঠিল, মনে মনে ভাবিতে লাগিল—সেই পাপিষ্ঠ দিগ্বিজয়ই বা কোথায়? তাহাকে পাইলেও ত মুখ খুলিয়া বাঁচি। কিন্তু দিগ্বিজয় গৃহমধ্যে প্রভুর কার্যে নিযুক্ত ছিল—তাহারও সাক্ষাৎ পাইল না। তখন অণু পাত্রাভাবে গিরিজায়া আপনার সহিত মনে মনে কথোপকথন আরম্ভ করিল। সে কথোপকথন শুনিতে পাঠক মহাশয়ের কৌতূহল জন্মিয়া থাকিলে, প্রশ্নোত্তরচ্ছলে তাহা জানাইতে পারি। গিরিজায়াই প্রশ্নকর্ত্রী, গিরিজায়াই উত্তরদাত্রী।

প্র। ওলো, তুই বসিয়া কে লো ?

উ। গিরিজায়া লো।

প্র। এখানে কেন লো ?

উ। মৃণালিনীর জন্ম লো।

প্র। মৃণালিনী তোর কে ?

উ। কেউ না।

প্র। তবে তার জন্তে তোর এত মাথা ব্যথা কেন ?

উ। আমার আর কাজ কি ? বেড়াইয়া বেড়াইয়া কি করিব ?

প্র। মৃগালিনীর জন্তে এখানে কেন ?

উ। এখানে তার একটি শিকলীকাটা পাখী আছে।

প্র। পাখী ধরিয়া নিয়ে যাবি না কি ?

উ। শিকলী কেটে থাকে ত ধরিয়া কি করিব ? ধরিবই বা
কিরাপে ?

প্র। তবে বসিয়া কেন ?

উ। দেখি, শিকল কেটেছে কি না।

প্র। কেটেছে না কেটেছে, জেনে কি হইবে ?

উ। পাখীটির জন্তে মৃগালিনী প্রতিবাত্রী কত লুকিয়ে লুকিয়ে
কাঁদে—আজি না জানি কতই কাঁদবে। যদি ভাল সংবাদ লইয়া যাই,
তবে অনেক রক্ষা হইবে।

প্র। আর যদি শিকল কেটে থাকে ?

উ। মৃগালিনীকে বলিব যে, পাখী হাতছাড়া হয়েছে—রাধাকৃষ্ণ
নাম শুনিবে ত আবার বনের পাখী ধরিয়া আন। পড়া পাখীর আশা
ছাড়। পিঁজরা খালি রাখিও না।

প্র। মর্ ভিখারীর মেয়ে ! তুই আপনার মনের মত কথা বলিলি !
মৃগালিনী যদি রাগ করিয়া পিঁজরা ভাঙ্গিয়া ফেলে ?

উ। ঠিক বলেছি সই। তা সে পারে। বলা হবে না।

প্র। তবে এখানে বসিয়া রৌদ্রে পুড়িয়া মরিস্ কেন ?

উ। বড় মাথা ধরিয়াছে, তাই। এই যে মেয়েটা ঘরের ভিতর
বসিয়া আছে—এ মেয়েটা বোবা—নহিলে এখনও কথা কয় না কেন ?
মেয়েমানুষের মুখ এখনও বন্ধ ?

ক্ষণেক পরে গিরিজায়ার মনস্কাম সিদ্ধ হইল। হেমচন্দ্রের নিদ্রাভঙ্গ
হইল। তখন মনোরমা তাঁহাকে জিজ্ঞাসা করিলেন, “কেমন, তোমার
ঘুম হয়েছে ?”

হে। বেশ ঘুম হয়েছে।

ম। এখন বল, কি প্রকারে আঘাত পাইলে ?

তখন হেমচন্দ্র রাত্রির ঘটনা সংক্ষেপে বিবৃত করিলেন। শুনিয়া মনোরমা চিন্তা করিতে লাগিল।

হেমচন্দ্র কহিলেন, “তোমার জিজ্ঞাস্য শেষ হইল। এখন আমার কথার উত্তর দাও। কালি রাত্রিতে তুমি আমার সঙ্গ পরিত্যাগ করিয়া গেলে যাহা যাহা ঘটয়াছিল সকল বল।”

মনোরমা মূহু মূহু অশ্রুটস্বরে কি বলিল, গিরিজায়া তাহা শুনিতে পাইল না। বুঝিল, চুপি চুপি কি কথা হইল।

গিরিজায়া আর কোন কথা শুনিতে না পাইয়া গাত্রোথান করিল। তখন পুনর্বার প্রশ্নোত্তরমালা মনোমধ্যে গ্রথিত হইতে লাগিল।

প্র। কি বুঝিলে ?

উ। কয়েকটি লক্ষণ মাত্র।

প্র। কি কি লক্ষণ ?

গিরিজায়া অঙ্গুলিতে গণিতে লাগিল, এক—মেয়েটি আশ্চর্য্য সুন্দরী, আশুনের কাছে ঘি কি গাঢ় থাকে ? দুই—মনোরমা ত হেমচন্দ্রকে ভালবাসে, নহিলে এত যত্ন করিল কেন ? তিন— একত্রে বাস। চারি—একত্রে রাত বেড়ান। পাঁচ—চুপি চুপি কথা।

প্র। মনোরমা ভালবাসে ; হেমচন্দ্রের কি ?

উ। বাতাস না থাকিলে কি জলে ঢেউ হয় ? আমাকে যদি কেহ ভালবাসে, আমি তাহাকে ভালবাসিব সন্দেহ নাই।

প্র। কিন্তু মৃগালিনীও ত হেমচন্দ্রকে ভালবাসে। তবে ত হেমচন্দ্র মৃগালিনীকে ভালবাসিবেই।

উ। যথার্থ। কিন্তু মৃগালিনী অমুপস্থিত, মনোরমা উপস্থিত।

এই ভাবিয়া গিরিজায়া ধীরে ধীরে গৃহের দ্বারদেশে আসিয়া দাঁড়াইল। তথায় একটি গীত আরম্ভ করিয়া কহিল, “ভিক্ষা দাও গো।”

চতুর্থ পরিচ্ছেদ : উপনয়—বহিঃব্যাপ্যো ব্রহ্মবাদ্

গিরিজায়া গীত গায়িল,

“কাহে সেই জীয়াত মরত কি বিধান ?

ব্রজকি কিশোর সহই, কাঁহা গেল ভাগই,

ব্রজজন টুটায়ল পরাণ ।”

সঙ্গীতধ্বনি হেমচন্দ্রের কর্ণে প্রবেশ করিল । স্বপ্নশ্রুত শব্দের ত্রায় কর্ণে প্রবেশ করিল ।

গিরিজায়া আবার গায়িল,

“ব্রজকি কিশোর সহই, কাঁহা গেল ভাগই,

ব্রজবধু টুটায়ল পরাণ ।”

হেমচন্দ্র উন্মুখ হইয়া স্তম্ভিতে লাগিলেন ।

গিরিজায়া আবার গায়িল,

“মিলি গেই নগরী, ভুলি গেই মাধব,

রূপবিহীন গোপকুণ্ডারী ।

কো জানে পিয় সহই, রসময় প্রেমিক,

হেন বঁধু রূপকি ভিখারী ॥”

হেমচন্দ্র কহিলেন, “এ কি ! মনোরমা, এ যে গিরিজায়ার স্বর ! আমি চলিলাম ।” এই বলিয়া লক্ষ দিয়া হেমচন্দ্র শয্যা হইতে অবতরণ করিলেন । গিরিজায়া গায়িতে লাগিল,

“আগে নাহি বৃদ্ধু, রূপ দেখি ভুলু,

হৃদি বৈলু চরণ যুগল ।

যমুনা-সলিলে সহই, অব তলু ডারব,

আন সখি ভধিব গরল ॥”

হেমচন্দ্র গিরিজায়ার সম্মুখে উপস্থিত হইলেন । ব্যস্ত স্বরে কহিলেন, “গিরিজায়া ! এ কি, গিরিজায়া ! তুমি এখানে ? তুমি এখানে কেন ? তুমি এ দেশে কবে আসিলে ?”

গিরিজায়া কহিল, “আমি এখানে অনেক দিন আসিয়াছি।” এই
বলিয়া আবার গায়িতে লাগিল,

“কিবা কাননবল্লরী, গল বেঢ়ি বাঁধই,
নবীন তমালে দিব ফাঁস।”

হেমচন্দ্র কহিলেন, “তুমি এ দেশে কেন এলে?”

গিরিজায়া কহিল, “ভিক্ষা আমার উপজীবিকা। রাজধানীতে
অধিক ভিক্ষা পাইব বলিয়া আসিয়াছি—

কিবা কাননবল্লরী, গল বেঢ়ি বাঁধই,
নবীন তমালে দিব ফাঁস।”

হেমচন্দ্র গীতে কর্ণপাত না করিয়া কহিলেন, “মৃণালিনী কেমন
আছে; দেখিয়া আসিয়াছ?”

গিরিজায়া গায়িতে লাগিল,

“নহে—শ্যাম শ্যাম শ্যাম শ্যাম, শ্যাম নাম জপয়ি,
ছার তম্বু করব বিনাশ।”

হেমচন্দ্র কহিলেন, “তোমার গীত রাখ। আমার কথার উত্তর দাও।
মৃণালিনী কেমন আছে, দেখিয়া আসিয়াছ?”

গিরিজায়া কহিল, “মৃণালিনীকে আমি দেখিয়া আসি নাই। এ গীত
আপনার ভাল না লাগে, অগ্ন গীত গায়িতেছি—

“এ জনমের সঙ্গে কি সেই জনমের সাধ ফুরাইবে।

কিবা জন্ম জন্মান্তরে, এ সাধ মোর পুরাইবে ॥”

হেমচন্দ্র কহিলেন, “গিরিজায়া, তোমাকে মিনতি করিতেছি—গান
রাখ, মৃণালিনীর সংবাদ বল।”

গি। কি বলিব?

হে। মৃণালিনীকে কেন দেখিয়া আইস নাই?

গি। গৌড়নগরে তিনি নাই।

হে। কেন? কোথায় গিয়াছেন?

গি। মথুরায়।

হে। মথুরায়? মথুরায় কাহার সঙ্গে গেলেন? কি প্রকারে—

গেলেন ? কেন গেলেন ?

গি। তাঁহার পিতা কি প্রকারে সন্ধান পাইয়া লোক পাঠাইয়া লইয়া গিয়াছেন। বুঝি তাঁহার বিবাহ উপস্থিত। বুঝি বিবাহ দিতে লইয়া গিয়াছেন।

হে। কি ? কি করিতে ?

গি। মৃণালিনীর বিবাহ দিতে তাঁহার পিতা তাঁহাকে লইয়া গিয়াছেন।

হেমচন্দ্র মুখ ফিরাইলেন। গিরিজায়া সে মুখ দেখিতে পাইল না ; আর যে হেমচন্দ্রের স্বক্ৰমস্থ ক্ষতমুখ ছুটিয়া বন্ধনবস্ত্র রক্তে প্লাবিত হইতেছিল, তাহাও দেখিতে পাইল না। সে পূর্বমত গায়িল,

“বিধি তোরে সাধি শুন, জন্ম যদি দিবে পুন,
আমারে আবার যেন, রমণী জনম দিবে।

লাজ ভয় তেয়াগিব, এ সাধ মোর পুরাইব,
সাগর হেঁচে রতন নিব, কণ্ঠে রাখিব নিশি দিবে ॥”

হেমচন্দ্র মুখ ফিরাইলেন। বলিলেন, “গিরিজায়া, তোমার সংবাদ শুভ। উত্তম হইয়াছে।”

এই বলিয়া হেমচন্দ্র গৃহমধ্যে পুনঃ প্রবেশ করিলেন। গিরিজায়ার মাথায় আকাশ ভাঙ্গিয়া পড়িল। গিরিজায়া মনে করিয়াছিল, মিছা করিয়া মৃণালিনীর বিবাহের কথা বলিয়া সে হেমচন্দ্রের পরীক্ষা করিয়া দেখিবে। মনে করিয়াছিল যে, মৃণালিনীর বিবাহ উপস্থিত শুনিয়া হেমচন্দ্র বড় কাতর হইবে, বড় রাগ করিবে। কৈ, তা ত কিছুই হইল না। তখন গিরিজায়া কপালে করাঘাত করিয়া ভাবিল, “হায় কি করিলাম ! কেন অনর্থক এ মিথ্যা রটনা করিলাম ! হেমচন্দ্র ত সুখী হইল দেখিতেছি—বলিয়া গেল—সংবাদ শুভ। এখন ঠাকুরাণীর দশা কি হইবে ?” হেমচন্দ্র যে কেন গিরিজায়াকে বলিলেন, তোমার সংবাদ শুভ, তাহা গিরিজায়া, ভিখারিণী বৈ ত নয়—কি বুঝিবে ? যে ক্রোধভরে, হেমচন্দ্র, এই মৃণালিনীর জন্ত গুরুদেবের প্রতি শরসন্ধানে উদ্ভূত হইয়াছিলেন, সেই দুর্ভয় ক্রোধ হৃদয়মধ্যে সমুদিত হইল।

অভিমানাধিক্যে, ছুর্দম ক্রোধাবেগে, হেমচন্দ্র গিরিজায়াকে বলিলেন,
“তোমার সংবাদ শুভ !”

গিরিজায়া তাহা বুঝিতে পারিল না। মনে করিল, এই ষষ্ঠ লক্ষণ।
কেহ তাহাকে ভিক্ষা দিল না; সেও ভিক্ষার প্রতীক্ষা করিল না;
“শিকলী কাটিয়াছে” সিদ্ধান্ত করিয়া গৃহাভিমুখে চলিল।

পঞ্চম পরিচ্ছেদ : আর একটি সংবাদ

সেই দিন মাধবাচার্যের পর্যটন সমাপ্ত হইল। তিনি নবদ্বীপে
উপস্থিত হইলেন। তথায় প্রিয় শিষ্য হেমচন্দ্রকে দর্শনদান করিয়া
চরিতার্থ করিলেন এবং আশীর্ব্বাদ, আলিঙ্গন, কুশলপ্রশ্নাদির পরে
বিরলে উভয়ে উদ্দেশ্য সাধনের কথোপকথন করিতে লাগিলেন।

আপন ভ্রমণবৃত্তান্ত সবিস্তারে বিবৃত করিয়া মাধবাচার্য্য কহিলেন,
“এত শ্রম করিয়া কতক দূর কৃতকার্য্য হইয়াছি। এতদ্দেশে অধীন
রাজগণের মধ্যে অনেকেই রণক্ষেত্রে সসৈন্যে সেন রাজার সহায়তা করিতে
স্বীকৃত হইয়াছেন। অচিরাৎ সকলে আসিয়া নবদ্বীপে সমবেত হইবেন।”

হেমচন্দ্র কহিলেন, তাঁহার। অতঃপর এ স্থলে না আসিলে সকলই বিফল
হইবে। যখনসেনা আসিয়াছে, মহাবনে অবস্থিতি করিতেছে। আজি
কালি নগর আক্রমণ করিবে।”

মাধবাচার্য্য শুনিয়া শিহরিয়া উঠিলেন। কহিলেন, “গৌড়েশ্বরের
পক্ষ হইতে কি উত্তম হইয়াছে ?”

হে। কিছুই না। বোধ হয়, রাজসন্নিধানে এ সংবাদ পর্য্যন্ত প্রচার
হয় নাই। আমি দৈবাৎ কালি এ সংবাদ প্রাপ্ত হইয়াছি।

মা। এ বিষয় তুমি রাজগোচর করিয়া সংপরামর্শ দাও নাই কেন ?

হে। সংবাদপ্রাপ্তির পরেই পার্থমধ্যে দস্যু কর্তৃক আহত হইয়া
রাজপথে পড়িয়াছিলাম। এই মাত্র গৃহে আসিয়া কিঞ্চিৎ বিশ্রাম
করিতেছি। বলহানিপ্রযুক্ত রাজসমক্ষে যাইতে পারি নাই। এখনই
যাইতেছি।

মা। তুমি এখন বিশ্রাম কর। আমি রাজার নিকট যাইতেছি।
পশ্চাৎ যেরূপ হয় তোমাকে জানাইব।

এই বলিয়া মাধবাচার্য্য গাত্রোথান করিলেন।

তখন হেমচন্দ্র বলিলেন, “প্রভু! আপনি গৌড় পর্য্যন্ত গমন করিয়া-
ছিলেন শুনিলাম—”

মাধবাচার্য্য অভিপ্রায় বুঝিয়া কহিলেন, “গিয়াছিলাম। তুমি
মৃগালিনীর সংবাদ কামনা করিয়া জিজ্ঞাসা করিতেছ? মৃগালিনী তথায়
নাই।”

হে। কোথায় গিয়াছে?

মা। তাহা আমি অবগত নহি, কেহ সংবাদ দিতে পারিল না।

হে। কেন গিয়াছে?

মা। বৎস! সে সকল পরিচয় যুদ্ধান্তে দিব।

হেমচন্দ্র ঙ্গকুটি করিয়া কহিলেন, “স্বরূপ বৃত্তান্ত আমাকে জানাইলে,
আমি যে মর্শ্মপীড়ায় কাতর হইব, সে আশঙ্কা করিবেন না। আমিও
কিয়দংশ শ্রবণ করিয়াছি। যাহা অবগত আছেন, তাহা নিঃসঙ্কোচে
আমার নিকট প্রকাশ করুন।”

মাধবাচার্য্য গৌড়নগরে গমন করিলে হ্রষীকেশ তাঁহাকে আপন
জ্ঞানমত মৃগালিনীর বৃত্তান্ত জ্ঞাত করিয়াছিলেন। তাহাই প্রকৃত বৃত্তান্ত
বলিয়া মাধবাচার্য্যেরও বোধ হইয়াছিল। মাধবাচার্য্য কশ্মিন্ কালে
স্ত্রীজাতির অমুরাগী নহেন—সুতরাং স্ত্রীচরিত্র বুঝিতেন না। এক্ষণে
হেমচন্দ্রের কথা শুনিয়া তাঁহার বোধ হইল যে, হেমচন্দ্র সেই বৃত্তান্তই
কতক কতক শ্রবণ করিয়া মৃগালিনীর কামনা পরিত্যাগ করিয়াছেন—
অতএব কোন নূতন মনঃপীড়ার সম্ভাবনা নাই বুঝিয়া, পুনর্ব্বার আসনগ্রহণ-
পূর্ব্বক হ্রষীকেশের কথিত বিবরণ হেমচন্দ্রকে শুনাইতে লাগিলেন।

হেমচন্দ্র অধোমুখে করতলোপরি ঙ্গকুটিকুটিল ললাট সংস্থাপিত
করিয়া নিঃশব্দে সমুদয় বৃত্তান্ত শ্রবণ করিলেন। মাধবাচার্য্যের কথা
সমাপ্ত হইলেও বাঙ্‌নিষ্পত্তি করিলেন না। সেই অবস্থাতেই রহিলেন।
মাধবাচার্য্য ডাকিলেন, “হেমচন্দ্র!” কোন উত্তর পাইলেন না। পুনরপি

ডাকিলেন, “হেমচন্দ্র !” তথাপি নিরুত্তর ।

তখন মাধবাচার্য্য গাত্রোথান করিয়া হেমচন্দ্রের হস্ত ধারণ করিলেন ; অতি কোমল, স্নেহময় স্বরে কহিলেন, “বৎস ! তাত ! মুখ তোল, আমার সঙ্গে কথা কও !”

হেমচন্দ্র মুখ তুলিলেন । মুখ দেখিয়া মাধবাচার্য্যও ভীত হইলেন । মাধবাচার্য্য কহিলেন, “আমার সহিত আলাপ কর । ক্রোধ হইয়া থাকে, তাহা ব্যক্ত কর ।”

হেমচন্দ্র কহিলেন, “কাহার কথায় বিশ্বাস করিব ? হৃষীকেশ একরূপ কহিয়াছে । ভিখারিণী আর এক প্রকার বলিল ।”

মাধবাচার্য্য কহিলেন, “ভিখারিণী কে ? সে কি বলিয়াছে ?”

হেমচন্দ্র অতি সংক্ষেপে উত্তর দিলেন ।

মাধবাচার্য্য সঙ্কুচিত স্বরে কহিলেন, হৃষীকেশেরই কথা মিথ্যা বোধ হয় ।”

হেমচন্দ্র কহিলেন, “হৃষীকেশের প্রত্যক্ষ ।”

তিনি উঠিয়া দাঁড়াইলেন । পিতৃদত্ত শূল হস্তে লইলেন । কম্পিত কলেবরে গৃহমধ্যে নিঃশব্দে পাদচারণ করিতে লাগিলেন ।

আচার্য্য জিজ্ঞাসা করিলেন, “কি ভাবিতেছ ?”

হেমচন্দ্র করস্ব শূল দেখাইয়া কহিলেন, “মৃণালিনীকে এই শূলে বিদ্ধ করিব ।”

মাধবাচার্য্য তাঁহার মুখকান্তি দেখিয়া ভীত হইয়া অপমৃত হইলেন ।

প্রাতে মৃণালিনী বলিয়া গিয়াছিলেন, “হেমচন্দ্র আমারই ।”

ষষ্ঠ পরিচ্ছেদ : “আমি ত উন্মাদিনী”

অপরাত্নে মাধবাচার্য্য প্রত্যাবর্তন করিলেন । তিনি সংবাদ আনিলেন যে, ধর্ম্মাধিকার প্রকাশ করিয়াছেন, যবনসেনা আসিয়াছে বটে, কিন্তু পূর্ব্বজিত রাজ্যে বিদ্রোহের সম্ভাবনা শুনিয়া যবনসেনাপতি সন্ধিসংস্থাপনে ইচ্ছুক হইয়াছেন । আগামী কল্য তাঁহারা দূত প্রেরণ করিবেন । দূতের আগমন অপেক্ষা করিয়া কোন যুদ্ধোৎসাহ হইতেছে না । এই

সংবাদ দিয়া মাধবাচার্য্য কহিলেন, “এই কুলাঙ্গার রাজা ধর্মাধিকারের বুদ্ধিতে নষ্ট হইবে।”

কথা হেমচন্দ্রের কর্ণে প্রবেশলাভ করিল কি না সন্দেহ। তাঁহাকে বিমনা দেখিয়া মাধবাচার্য্য বিদায় হইলেন।

সন্ধ্যার প্রাক্কালে মনোরমা হেমচন্দ্রের গৃহে প্রবেশ করিল। হেমচন্দ্রকে দেখিয়া মনোরমা কহিল, “ভাই! আজ তুমি অমন কেন?”

হেম। কেমন আমি?

মনে। তোমার মুখখানা শ্রাবণের আকাশের মত অন্ধকার; ভাঙ্গ মাসের গঙ্গার মত রাগে ভরা; অত ঙ্গকুটি করিতেছ কেন? চক্ষের পলক নাই কেন—আর দেখি—তাই ত, চোখে জল; তুমি কেঁদেছ?

হেমচন্দ্র মনোরমার মুখপ্রতি চাহিয়া দেখিলেন; আবার চক্ষু অবনত করিলেন; পুনর্ব্বার উন্নত গবাঙ্কপথে দৃষ্টি করিলেন; আবার মনোরমার মুখপ্রতি চাহিয়া রহিলেন। মনোরমা বুঝিল যে, দৃষ্টির এইরূপ গতির কোন উদ্দেশ্য নাই। যখন কথা কণ্ঠাগত, অথচ বলিবার নহে, তখনই দৃষ্টি এইরূপ হয়। মনোরমা কহিল, “হেমচন্দ্র, তুমি কেন কাতর হইয়াছ? কি হইয়াছে?” হেমচন্দ্র কহিলেন, “কিছু না।”

মনোরমা প্রথমে কিছু বলিল না—পরে আপনা আপনি মুছ মুছ কথা কহিতে লাগিল, “কিছু না—বলিবে না! ছি! ছি! বৃকের ভিতর বিছা পুষিবে!” বলিতে বলিতে মনোরমার চক্ষু দিয়া এক বিন্দু বারি বহিল;—পরে অকস্মাৎ হেমচন্দ্রের মুখপ্রতি চাহিয়া কহিল, “আমাকে বলিবে না কেন? আমি যে তোমার ভগিনী।”

মনোরমার মুখের ভাবে, শাস্তদৃষ্টিতে এত যত্ন, এত মৃদুতা, এত সহৃদয়তা প্রকাশ পাইল যে, হেমচন্দ্রের অন্তঃকরণ দ্রবীভূত হইল। তিনি কহিলেন, “আমার যে যত্না, তাহা ভগিনীর নিকট কখনীয় নহে।”

মনোরমা কহিল, “তবে আমি ভগিনী নহি।”

হেমচন্দ্র কিছুতেই উত্তর করিলেন না। তথাপি প্রত্যাশাপন্ন হইয়া মনোরমা তাঁহার মুখপ্রতি চাহিয়া রহিল। কহিল, “আমি তোমার কেহ নাহি।”

হেম । আমার দুঃখ ভগিনীর অশ্রাব্য—অপরেরও অশ্রাব্য ।

হেমচন্দ্রের কণ্ঠস্বর করুণাময়—নিতান্ত আধিব্যক্তিপরিপূর্ণ ; তাহা মনোরমার প্রাণের ভিতর গিয়া বাজিল । তখনই সে স্বর পরিবর্তন হইল, নয়নে অগ্নিস্ফুলিঙ্গ নির্গত হইল—অধর দংশন করিয়া হেমচন্দ্র কহিলেন, “আমার দুঃখ কি ? দুঃখ কিছুই না । আমি মণি ভ্রমে কালসাপ কণ্ঠে ধরিয়া ছলাম, এখন তাহা ফেলিয়া দিয়াছি ।”

মনোরমা আবার পূর্ববৎ হেমচন্দ্রের প্রতি অনিমেঘলোচনে চাহিয়া রহিল । ক্রমে তাহার মুখমণ্ডলে অতি মধুর, অতি সসুন্দর হাস্য প্রকটিত হইল । বালিকা প্রগল্ভতাপ্রাপ্ত হইল । সূর্য্যরশ্মির অপেক্ষা যে রশ্মি সমুজ্জ্বল, তাহার কিরীট পরিয়া প্রতিভাদেবী দেখা দিলেন । মনোরমা কহিল, “বুঝিয়াছি । তুমি না বুঝিয়া ভালবাস, তাহার পরিণাম ঘটয়াছে ।”

হেম । ভালবাসিতাম ।

হেমচন্দ্র বর্তমানের পরিবর্তে অতীতকাল ব্যবহার কহিলেন । অমনি নীরবে নিঃশ্রুত অশ্রুজলে তাঁহার মুখমণ্ডল ভাসিয়া গেল ।

মনোরমা বিরক্ত হইল । বলিল, “ছি ! ছি ! প্রতারণা ! যে পরকে প্রতারণা করে, সে বঞ্চক মাত্র । যে আত্মপ্রতারণা করে, তাহার সর্বনাশ ঘটে ।” মনোরমা বিরক্তিবশতঃ আপন অলকদাম চম্পকাস্থলিতে জড়িত করিয়া টানিতে লাগিল ।

হেমচন্দ্র বিস্মিত হইলেন, কহিলেন, “কি প্রতারণা করিলাম ?”

মনোরমা কহিল, “ভালবাসিতাম কি ? তুমি ভালবাস । নহিলে কাঁদিলে কেন ? কি ? আজি তোমার স্নেহের পাত্র অপরাধা হইয়াছে বলিয়া তোমার ভালবাসা গিয়াছে ? কে তোমায় এমন প্রবোধ দিয়াছে ?” বলিতে বলিতে মনোরমার শ্রোত্রভাবাপন্ন মুখকান্তি সহসা প্রফুল্ল পদ্মবৎ অধিকতর ভাবব্যঞ্জক হইতে লাগিল ; চক্ষু অধিক জ্যোতিঃফুরৎ হইতে লাগিল, কণ্ঠস্বর অধিকতর পরিষ্কৃত, আগ্রহকম্পিত হইতে লাগিল ; বলিতে লাগিল, “এ কেবল বীরদম্ভকারী পুরুষদের দর্প মাত্র । অহঙ্কার করিয়া আশুন নিবান যায় ? তুমি বালির বাঁধ দিয়া এই কুলপরিপ্লাবনী

গঙ্গার বেগ রোধ করিতে পারিবে, তথাপি তুমি প্রণয়িনীকে পাপিষ্ঠা মনে করিয়া কখনও প্রণয়ের বেগ রোধ করিতে পারিবে না। হা কৃষ্ণ ! মানুষ সকলেই প্রতারক !”

হেমচন্দ্র বিস্মিত হইয়া ভাবিলেন, “আমি ইহাকে এক দিন বালিকা মনে করিয়াছিলাম !”

মনোরমা কহিতে লাগিল, “তুমি পুরাণ শুনিয়াছ ? আমি পশুভেদ নিকট তাহার গুণার্থ সহিত শুনিয়াছি। লেখা আছে, ভগীরথ গঙ্গা আনিয়াছিলেন ; এক দাস্তিক মন্ত হস্তী তাহার বেগ সংবরণ করিতে গিয়া ভাসিয়া গিয়াছিল। ইহার অর্থ কি ? গঙ্গা প্রেমপ্রবাহস্বরূপ ; ইহা জগদীশ্বর-পাদ-পদ্ম-নিঃসৃত, ইহা জগতে পবিত্র,—যে ইহাতে অবগাহন করে, সেই পুণ্যময় হয়। ইনি মৃত্যুঞ্জয়-জটা-বিহারিণী ; যে মৃত্যুকে জয় করিতে পারে, সেও প্রণয়কে মস্তকে ধারণ করে। আমি যেমন শুনিয়াছি, ঠিক সেইরূপ বলিতেছি। দাস্তিক হস্তী দন্তের অবতারস্বরূপ। সে প্রণয়বেগে ভাসিয়া যায়। প্রণয় প্রথমে একমাত্র পথ অবলম্বন করিয়া উপযুক্ত সময়ে শতমুখী হয় ; প্রণয় স্বভাবসিদ্ধ হইলে, শত পাত্রে গুস্ত হয়—পারিশেষে সাগবসঙ্গমে লয়প্রাপ্ত হয়—সংসারস্থ সর্বজীবে বিলীন হয়।”

হে। তোমার উপদেষ্টা কি বলিয়াছেন, প্রণয়ের পাত্রাপাত্র নাই ? পাপাসক্তকে কি ভালবাসিতে হইবে ?

ম। পাপাসক্তকে ভালবাসিতে হইবে। প্রণয়ের পাত্রাপাত্র নাই। সকলকেই ভালবাসিবে, প্রণয় জন্মিলেই তাহাকে যত্নে স্থান দিবে ; কেন না, প্রণয় অমূল্য। ভাই, যে ভাল, তাকে কে না ভালবাসে ? যে মন্দ, তাকে যে আপনা ভুলিয়া ভালবাসে, আমি তাকে বড় ভালবাসি। কিন্তু আমি ত উন্মাদিনী।

হেমচন্দ্র বিস্মিত হইয়া কহিলেন, “মনোরমা, এ সকল তোমায় কে শিখাইল ? তোমার উপদেষ্টা অলৌকিক ব্যক্তি।”

মনোরমা মুখাবনত করিয়া কহিলেন, “তিনি সর্বজ্ঞানী, কিন্তু—”

হে। কিন্তু কি ?

ম। তিনি আগ্নৈশ্বর্যরূপ—আলো করেন, কিন্তু দন্ধও করেন।

মনোরমা ক্ষণেক মুখাবনত করিয়া নীরব হইয়া রহিল।

হেমচন্দ্র বলিলেন, “মনোরমা, তোমার মুখ দেখিয়া, আর তোমার কথা শুনিয়া, আমার বোধ হইতেছে, তুমিও ভালবাসিয়াছ। বোধ হয়, যঁাহাকে তুমি অগ্নির সহিত তুলনা করিলে, তিনিই তোমার প্রণয়াধিকারী।”

মনোরমা পূর্ববর্তত নীরবে রহিল। হেমচন্দ্র পুনরপি বলিতে লাগিলেন, “যদি ইহা সত্য হয়, তবে আমার একটি কথা শুন। স্ত্রীলোকের সতীত্বের অধিক আর ধর্ম নাই; যে স্ত্রীর সতীত্ব নাই, সে শৃকরীর অপেক্ষাও অধম। সতীত্বের হানি কেবল কার্য্যেই ঘটে, এমন নহে; স্বামী ভিন্ন অণ্ড পুরুষের চিন্তামাত্রও সতীত্বের বিঘ্ন। তুমি বিধবা, যদি স্বামী ভিন্ন অপরকে মনেও ভাব, তবে তুমি ইহলোকে পরলোকে স্ত্রীজাতির অধম হইয়া থাকিবে। অতএব সাবধান হও। যদি কাহারও প্রতি চিত্ত নিবিষ্ট থাকে, তবে তাহাকে বিস্মৃত হও।”

মনোরমা উচ্চ হাস্য করিয়া উঠিল; পরে মুখে অঞ্চল দিয়া হাসিতে লাগিল, হাসি বন্ধ হয় না। হেমচন্দ্র কিঞ্চিং অপ্রসন্ন হইলেন, কহিলেন, “হাসিতেছ কেন?”

মনোরমা কহিলেন, “ভাই, এই গঙ্গাতীরে গিয়া দাঁড়াও; গঙ্গাকে ডাকিয়া কহ, গঙ্গে; তুমি পর্ব্বতে ফিরে যাও।”

হে। কেন?

ম। স্মৃতি কি আপন ইচ্ছাধীন? রাজপুত্র, কালসর্পকে মনে করিয়া কি সুখ? কিন্তু তথাপি তুমি তাহাকে ভুলিতেছ না কেন?

হে। তাহার দংশনের জ্বালায়।

ম। আর, সে যদি দংশন না করিত? তবে কি তাহাকে ভুলিতে?

হেমচন্দ্র উত্তর করিলেন না। মনোরমা বলিতে লাগিল, “তোমার ফুলের মালা কালসাপ হইয়াছে, তবু তুমি ভুলিতে পারিতেছ না; আমি, আমি ত পাগল—আমি আমার পুষ্পহার কেন ছিঁড়িব?”

হেমচন্দ্র কহিলেন, “তুমি এক প্রকার অগ্নায় বলিতেছ না।

প্রতি যে সকল উপদেশ করে, তন্মধ্যে ‘বিস্মৃত হও’ এই উপদেশের অপেক্ষা হাশ্যাম্পদ আর কিছুই নাই। কেহ কাহাকে বলে না, অর্থচিন্তা ছাড় ; যশের ইচ্ছা ছাড় ; জ্ঞানচিন্তা ছাড় ; ক্ষুধানিবারণেচ্ছা ত্যাগ কর ; তৃষ্ণানিবারণেচ্ছা ত্যাগ কর ; নিজা ছাড় ; তবে কেন বলিবে, ভালবাসা ছাড় ? ভালবাশা কি এ সকল অপেক্ষা ছোট ? এ সকল অপেক্ষা শ্রণয় নূন নহে—কিন্তু ধর্মের অপেক্ষা নূন বটে। ধর্মের জগ্ন প্রেমকে সংহার করিবে। স্ত্রীর পরম ধর্ম সতীত্ব। সেই জগ্ন বলিতেছি, যদি পার, প্রেম সংহার কর।”

ম। আমি অবলা ; জ্ঞানহানা ; বিবশা ; আমি ধর্মাধর্ম কাহাকে বলে, তাহা জানি না। আমি এইমাত্র জানি, ধর্ম ভিন্ন প্রেম জন্মে না।

হে। সাবধান, মনোরমা ! বাসনা হইতে ভ্রাস্তি জন্মে ; ভ্রাস্তি হইতে অধর্ম জন্মে। তোমার ভ্রাস্তি পর্য্যন্ত হইয়াছে। তুমি বিবেচনা করিয়া বল দেখি, তুমি যদি ধর্মে একের পত্নী, মনে অন্যের পত্নী হইলে, তবে তুমি দ্বিচারিণী হইলে কি না ?

গৃহমধ্যে হেমচন্দ্রের অসিচর্ম্য বুলিতেছিল ; মনোরমা চর্ম্য হস্তে লইয়া কহিল, “ভাই, হেমচন্দ্র, তোমার এ ঢাল কিসের চামড়া ?”

হেমচন্দ্র হাশ্ব করিলেন। মনোরমার মুখপ্রতি চাহিয়া দেখিলেন, বালিকা।

সপ্তম পরিচ্ছেদ : গিরিজায়ার সংবাদ

গিরিজায়া যখন পাটনার গৃহে প্রত্যাবর্তন করে, তখন প্রাণান্তে হেমচন্দ্রের নবান্নরাগের কথা মৃণালিনীর সাক্ষাতে ব্যক্ত করিবে না স্থির করিয়াছিল। মৃণালিনী তাহার আগমন প্রতীক্ষায় পিঞ্জরে বদ্ধ বিহঙ্গীর ঞায় চঞ্চলা হইয়া রহিয়াছিলেন ; গিরিজায়াকে দেখিবামাত্র কহিলেন, “বল গিরিজায়া, কি দেখিলে ? হেমচন্দ্র কেমন আছেন ?”

গিরিজায়া কহিল, “ভাল আছেন।”

মু। কেন অমন করিয়া বলিলে কেন ? তোমার কথায় উৎসাহ

নাই কেন ? যেন দুঃখিত হইয়া বলিতেছ ; কেন ?

গি। সে কি ?

মু। গিরিজায়া, আমাকে প্রতারণা করিও না ; হেমচন্দ্র কি ভাল হয়েন নাই ? তাহা হইলে আমাকে স্পষ্ট করিয়া বল । সন্দেহের অপেক্ষা প্রতীতি ভাল ।

গিরিজায়া এবার সহাস্ত্রে কহিল, “তুমি কেন অনর্থক ব্যস্ত হও ? আমি নিশ্চিত বলিতেছি, তাঁহার শরীরে কিছুই ক্লেস নাই ! তিনি উঠিয়া বেড়াইতেছেন ।”

মৃগালিনী ক্ষণেক চিন্তা করিয়া কহিলেন, “মনোরমার সহিত তাঁহার কোন কথাবার্তা শুনিলে ?”

গি। শুনিলাম ।

মু। কি শুনিলে ?

গিরিজায়া তখন হেমচন্দ্র যাহা বলিয়াছেন, তাহা কহিলেন । কেবল হেমচন্দ্রের সঙ্গে যে মনোরমা নিশা পর্যটন করিয়াছিলেন ও কাণে কাণে কথা বার্লিয়াছিলেন, এহ দুইটি বিষয় গোপন করিলেন । মৃগালিনী জিজ্ঞাসা করিলেন, “তুমি হেমচন্দ্রের সহিত সাক্ষাৎ করিয়াছ ?”

গিরিজায়া কিছু ইতস্ততঃ করিয়া কহিল, “করিয়াছি ।”

মু। তিনি কি কহিলেন ?

গি। তোমার কথা জিজ্ঞাসা করিলেন ।

মু। তুমি কি বলিলে ?

গি। আমি বলিলাম, তুমি ভাল আছ ।

মু। আমি এখানে আসিয়াছি, তাহা বলিয়াছ ?

গি। না ।

মু। গিরিজায়া, তুমি ইতস্ততঃ করিয়া উত্তর দিতেছ, তোমার মুখ শুক্ন । তুমি আমার মুখপানে চাহিতে পারিতেছ না । আমি নিশ্চিত বুঝিতেছি, তুমি কোন অমঙ্গল সংবাদ আমার নিকট লুকাইতেছ । আমি তোমার কথায় বিশ্বাস করিতে পারিতেছি না । যাহা থাকে অদৃষ্টে, আমি স্বয়ং হেমচন্দ্রকে দেখিতে যাইব । পার, আমার সঙ্গে

আইস, নচেং আমি একাকিনী যাইব ।

এই বলিয়া মৃণালিনী অবগুষ্ঠনে মুখাবৃত করিয়া বেগে রাজপথ অতিবাহন করিয়া চলিলেন ।

গিরিজায়া তাঁহার পশ্চাদ্ধাবিতা হইল । কিছু দূর আসিয়া তাঁহার হস্ত ধরিয়া কহিল, “ঠাকুরাণি, ফের ; আমি যাহা লুকাইয়াছি, তাহা প্রকাশ করিতেছি ।”

মৃণালিনী গিরিজায়ার সঙ্গে সঙ্গে গৃহে ফিরিয়া আসিলেন । তখন গিরিজায়া যাহা যাহা গোপন করিয়াছিল, তাহা সবিস্তারে প্রকাশিত করিল ।

গিরিজায়া হেমচন্দ্রকে ঠকাইয়াছিল ; কিন্তু মৃণালিনীকে ঠকাইতে পারিল না ।

অষ্টম পরিচ্ছেদ : মৃণালিনীর লিপি

মৃণালিনী কহিলেন, “গিরিজায়া, তিনি রাগ করিয়া বলিয়া থাকিবেন, ‘উত্তম হইয়াছে’ ; ইহা শুনিয়া তিনি কেনই বা রাগ না করিবেন ?”

গিরিজায়ারও তখন সংশয় জন্মিল । সে কহিল, “ইহা সম্ভব বটে ।”

তখন মৃণালিনী কহিলেন, “তুমি একথা বলিয়া ভাল কর নাই । এর বিহিত করা উচিত ; তুমি আহালাদি করিতে যাও । আমি ততক্ষণ একখানি পত্র লিখিয়া রাখিব । তুমি খাইবার পর, সেইখানি লইয়া তাঁহার নিকট যাইবে ।”

গিরিজায়া স্বীকৃতা হইয়া সত্বরে আহালাদির জন্ম গমন করিল । মৃণালিনী সংক্ষেপে পত্র লিখিলেন ।

লিখিলেন,

“গিরিজায়া মিথ্যাবাদিনী । যে কারণে সে তোমার নিকট মৎসম্বন্ধে মিথ্যা বলিয়াছে, তাহা জিজ্ঞাসা করিলে, সে স্বয়ং বিস্তারিত করিয়া কহিবে । আমি মথুরায় যাই নাই । যে রাত্রিতে তোমার অঙ্গুরীয় দেখিয়া যমুনাতটে আসিয়াছিলাম, সেই রাত্রি অবধি আমার পক্ষে মথুরার পথ রুদ্ধ হইয়াছে । আমি মথুরায় না গিয়া তোমাকে দেখিতে নবদ্বীপে

আসিয়াছি। নবদ্বীপে আসিয়াও যে এ পর্য্যন্ত তোমার সহিত সাক্ষাৎ করি নাই, তাহার এক কারণ এই, আমার সহিত সাক্ষাৎ করিলে তোমার প্রতিজ্ঞাভঙ্গ হইবে। আমার অভিনাষ, তোমাকে দেখিব, তৎসিদ্ধিপক্ষে তোমাকে দেখা দেওয়ার আবশ্যিক কি ?”

গিরিজায়া এই লিপি লইয়া পুনরপি হেমচন্দ্রের গৃহাভিমুখে যাত্রা করিল। সন্ধ্যাকালে, মনোরমার সহিত কথোপকথন সমাপ্তির পরে, হেমচন্দ্র গঙ্গাদর্শনে যাইতেছিলেন, পথে গিরিজায়ার সহিত সাক্ষাৎ হইল। গিরিজায়া তাঁহার হস্তে লিপি দিল।

হেমচন্দ্র কহিলেন, “তুমি আবার কেন ?”

গি। পত্র লইয়া আসিয়াছি।

হে। পত্র কাহার ?

গি। মৃণালিনীর পত্র।

হেমচন্দ্র বিস্মিত হইলেন, “এ পত্র কি প্রকারে তোমার নিকট আসিল ?”

গি। মৃণালিনী নবদ্বীপে আছেন। আমি মথুরার কথা আপনার নিকট মিথ্যা বলিয়াছি।

হে। এই পত্র তাঁহার ?

গি। হাঁ, তাঁহার স্বহস্তলিখিত।

হেমচন্দ্র লিপিখানি না পড়িয়া তাহা খণ্ড খণ্ড করিয়া ছিন্ন ভিন্ন করিলেন। ছিন্নখণ্ড সকল বনমধ্যে নিক্ষিপ্ত করিয়া কহিলেন, “তুমি যে মিথ্যাবাদিনী, তাহা আমি ইতিপূর্বেই শুনিতে পাইয়াছি। তুমি যে ছুষ্টার পত্র লইয়া আসিয়াছ, সে যে বিবাহ করিতে যায় নাই, হৃষীকেশ তাহাকে তাড়াইয়া দিয়াছে, তাহা আমি ইতিপূর্বেই শুনিয়াছি। আমি কুলটার পত্র পড়িব না। তুই আমার সম্মুখ হইতে দূর হ।”

গিরিজায়া চমৎকৃত হইয়া নিরুত্তরে হেমচন্দ্রের মুখপানে চাহিয়া রহিল।

হেমচন্দ্র পথিপার্শ্বস্থ এক ক্ষুদ্র-বৃক্ষের শাখা ভগ্ন করিয়া হস্তে লইয়া কহিলেন, “দূর হ নচেৎ বেত্রাঘাত করিব।”

গিরিজায়ার আর সহ্য হইল না। ধীরে ধীরে বলিল, “বীর পুরুষ বটে! এই রকম বীরত্ব প্রকাশ করিতে বুঝি নদীয়ায় এসেছ? কিছু প্রয়োজন ছিল না—এ বীরত্ব মগধে বসিয়াও দেখিহিতে পারিতে। মুসলমানের জুতা বহিতে, আর গরিবত্বঃখীর মেয়ে দেখিলে বেত মারিতে।”

হেমচন্দ্র অপ্রতিভ হইয়া বেত ফেলিয়া দিলেন। কিন্তু গিরিজায়ার রাগ গেল না। বলিল, “তুমি মৃগালিনীকে বিবাহ করিবে? মৃগালিনী দূরে থাক, তুমি আমাবও যোগ্য নও।”

এই বলিয়া গিবিজায়া, সদর্পে গজেন্দ্রগমনে চলিয়া গেল। হেমচন্দ্র ভিখারিণীব গর্ব্ব দেখিয়া অবাক হইয়া রহিলেন।

গিরিজায়া প্রত্যাগতা হইয়া হেমচন্দ্রের আচরণ মৃগালিনীর নিকট সবিশেষ বিবৃত করিল। এবার কিছু লুকাইল না। মৃগালিনী শুনিয়া কোন উত্তর করিল না। রোদনও করিলেন না। যেরূপ অবস্থায় শ্রবণ করিতেছিলেন, সেইরূপ অবস্থাতেই রহিলেন। দেখিয়া গিরিজায়া শঙ্কান্বিত হইল—তখন মৃগালিনীর কথোপকথনের সময় নহে বুঝিয়া তথা হইতে সরিয়া গেল।

পাটনীর গৃহের অনতিদূরে যে এক সোপানবিশিষ্ট পুষ্করিণী ছিল, তথায় গিয়া গিরিজায়া সোপানোপরি উপবেশন করিল। শারদীয়া পূর্ণিমার প্রদীপ্ত কৌমুদীতে পুষ্করিণীর স্বচ্ছ নীলাষু অধিকতর নীলোজ্জ্বল হইয়া প্রভাসিত হইতেছিল। তদুপরি স্পন্দনরহিত কুমুমশ্রেণী অর্ধ প্রাফুটিত হইয়া নীল জলে প্রাতিবিস্তিত হইয়াছিল; চারি দিকে বৃক্ষমালা নিঃশব্দে পরস্পরাগ্নিষ্ট হইয়া আকাশের সোমা নির্দেশ করিতেছিল; কচিং ছুই একটি দীর্ঘ শাখা উর্ধ্বোন্মিত হইয়া আকাশপটে চিত্রিত হইয়া রহিয়াছিল। তলস্থ অঙ্ককারপুঞ্জমধ্য হইতে নবফুটকুমুমসৌরভ আসিতেছিল। গিবিজায়া সোপানোপরি উপবেশন করিল।

গিরিজায়া প্রথমে ধীরে ধীরে, মুছ মুছ গীত আরম্ভ করিল—যেন নবশিক্ষিতা বিহঙ্গা প্রথমোচ্চমে স্পষ্ট গান করিতে পারিতেছে না। ক্রমে তাহার স্বর স্পষ্টতালভ করিতে লাগিল—ক্রমে ক্রমে উচ্চতর হইতে লাগিল, শেষে সেই সর্ব্বাঙ্গসম্পূর্ণ তানলয়বিশিষ্ট কমনীয় কণ্ঠধ্বনি

পুষ্করিণী, উপবন, আকাশ বিপ্লুত করিয়া স্বর্গচ্যুত স্বরসরিত্তরঙ্গস্বরূপ
মৃণালিনীর কর্ণে প্রবেশ করিতে লাগিল। গিরিজায়া গায়িল ;—

“পরাগ না গেলো।

যো দিন পেখনু সই যমুনাকি তীরে,
গায়ত নাচত সুন্দর ধীরে ধীরে,
ওঁহি পর পিয় সই, কাহে কালো নীরে,
জীবন না গেলো ?

ফিরি ঘর আয়নু, না কহনু বোলি,
তিতায়নু আঁখিনীবে আপনা আঁচোলি,
রোই রোই পিয় সই কাহে লো পরাগি,
তুইখন না গেলো ?

শুননু শ্রবণ-পথে মধুর বাজে,
রাধে রাধে রাধে রাধে বিপিন মাঝে,
যব শুননু লাগি সই, সো মধুর বোলি,
জীবন না গেলো ?

ধায়নু পিয় সই, সোহি উপকূলে,
লুটায়নু কাঁদি সই শ্যামপদমূলে,
সোহি পদমূলে রই, কাহে লো হামারি,
মরণ না ভেল ?”

গিরিজায়া গায়িতে গায়িতে দেখিলেন, তাঁহার সম্মুখে চন্দ্রের
কিরণোপরি মনুস্মের ছায়া পড়িয়াছে। ফিরিয়া দেখিলেন, মৃণালিনী
দাঁড়াইয়া আছেন। তাঁহার মুখপ্রতি চাহিয়া দেখিলেন, মৃণালিনী
কাঁদিতেছেন।

গিরিজায়া দেখিয়া হর্ষাঘিত হইলেন—‘তিনি বুঝিতে পারিলেন যে,
যখন মৃণালিনীর চক্ষুতে জল আসিয়াছে—তখন তাঁহার ক্রেশের কিছু
শমতা হইয়াছে। ইহা সকলে বুঝে না—মনে করে, “কই, ইহার চক্ষুতে
ত জল দেখিলাম না, তবে ইহার বিসের ছুঃখ ?” যদি ইহা সকলে
বুঝিত, সংসারের কত মর্শ্বপীড়াই না জানি নিবারণ হইত।

কিয়ৎক্ষণ উভয়েই নীরব হইয়া রহিল। মৃগালিনী কিছু বলিতে পারেন না ; গিরিজায়াও কিছু জিজ্ঞাসা করিতে পারে না। পরে মৃগালিনী কহিলেন, “গিরিজায়া, আর একবার তোমাকে যাইতে হইবে।”

গি। আবার সে পাষণ্ডের নিকট যাইব কেন ?

মৃ। পাষণ্ড বলিও না। হেমচন্দ্র ভ্রান্ত হইয়া থাকিবেন—এ সংসারে অভ্রান্ত কে ? কিন্তু হেমচন্দ্র পাষণ্ড নহেন। আমি স্বয়ং তাঁহার নিকট এখনই যাইব—তুমি সঙ্গে চল। তুমি আমাকে ভগিনীর অধিক স্নেহ কর—তুমি আমার জ্ঞান না করিয়াছ কি ? তুমি কখনও আমাকে অকারণে মনঃপীড়া দিবে না—কখনও আমার নিকট এসকল কথা মিথ্যা করিয়া বলিবে না, ইহা আমি নিশ্চিত জানি। কিন্তু তাই বলিয়া, আমার হেমচন্দ্র আমাকে বিনাপরাধে ত্যাগ করিলেন, ইহা তাঁহার মুখে না শুনিয়া কি প্রকারে অন্তঃকরণকে স্থির করিতে পারি ? যদি তাঁহার নিজ মুখে শুনি যে, তিনি মৃগালিনীকে কুলটা ভাবিয়া ত্যাগ করিলেন, তবে এ প্রাণ বিসর্জন করিতে পারিব।

গি। প্রাণবিসর্জন ! সে কি মৃগালিনী ?

মৃগালিনী কোন উত্তর করিলেন না। গিরিজায়ার স্বন্ধে বাহুস্থাপন করিয়া রোদন করিতে লাগিলেন। গিরিজায়াও রোদন করিল।

নবম পরিচ্ছেদ : অমৃত্তে গরল—গরলামৃত

হেমচন্দ্র আচার্য্যের কথায় বিশ্বাস করিয়া মৃগালিনীকে দুঃসচিত্রা বিবেচনা করিয়াছিলেন ; মৃগালিনীর পত্র পাঠ না করিয়া তাহা ছিন্ন ভিন্ন করিয়াছিলেন, তাঁহার দূতীকে বেত্রাঘাত করিতে প্রস্তুত হইয়াছিলেন। কিন্তু ইহা বলিয়া তিনি মৃগালিনীকে ভালবাসিতেন না, তাহা নহে। মৃগালিনীর জ্ঞান তিনি রাজ্যত্যাগ করিয়া মথুরাবাসী হইয়াছিলেন। এই মৃগালিনীর জ্ঞান গুরুর প্রতি শরসন্ধান করিতে প্রস্তুত হইয়াছিলেন, মৃগালিনীর জ্ঞান গোড়ে নিজ ব্রত বিন্মুত হইয়া ভিখারিণীর তোষামোদ করিয়াছিলেন। আর এখন ? এখন হেমচন্দ্র মাধবাচার্য্যকে শূল দেখাইয়া বলিয়াছিলেন, “মৃগালিনীকে এই শূলে বিদ্ধ করিব !” কিন্তু তাই

বলিয়া কি এখন তাঁহার স্নেহ একেবারে ধ্বংস প্রাপ্ত হইয়াছিল ? স্নেহ কি একদিনে ধ্বংস হইয়া থাকে ? বহুদিন অবধি পার্শ্ববর্তী বারি পৃথিবী-হৃদয়ে বিচরণ করিয়া আপন গতিপথ নিখাত করে, একদিনের সূর্য্যোত্তাপে কি সে নদী শুকায় ? জলের যে পথ নিখাত হইয়াছে, জল সেই পথেই যাইবে, সে পথ রোধ কর, পৃথিবী ভাসিয়া যাইবে। হেমচন্দ্র সেই রাত্রিতে নিজ শয়নকক্ষে, শয্যোপরি শয়ন করিয়া সেই মুক্ত বাতায়ন-সন্নিধানে মস্তক রাখিয়া, বাতায়ন-পথে দৃষ্টি করিতেছিলেন—তিনি কি নৈশ শোভা দৃষ্টি করিতেছিলেন ? যদি তাঁহাকে সে সময় কেহ জিজ্ঞাসা করিত যে, রাত্রি সজ্যোৎস্না কি অন্ধকার, তাহা তিনি তখন সহসা বলিতে পারিতেন না। তাঁহার হৃদয়মধ্যে যে রজনীর উদয় হইয়াছিল, তিনি কেবল তাহাই দেখিতেছিলেন। সে রাত্রি ত তখনও সজ্যোৎস্না ! নহিলে তাঁহার উপাধান আর্দ্র কেন ? কেবল মেঘোদয় মাত্র। যাহার হৃদয়-আকাশে অন্ধকার বিরাজ করে, সে রোদন করে না।

যে কখনও রোদন করে নাই, সে মনুশ্যমধ্যে অধম। তাহাকে কখনও বিশ্বাস করিও না। নিশ্চিত জানিও, সে পৃথিবীর সুখ কখনও ভোগ করে নাই—পরের সুখও কখনও তাহার সহ্য হয় না। এমন হইতে পারে যে, কোন আত্মচিন্তাবিজয়ী মহাত্মা বিনা বাষ্পমোচনে গুরুতর মনঃপীড়া সকল সহ্য করিতেছেন এবং করিয়া থাকেন ; কিন্তু তিনি যদি কশ্মিন্ কালে, এক দিন বিরলে একবিন্দু অশ্রুজলে পৃথিবী সিক্ত না করিয়া থাকেন, তবে তিনি চিন্তাজয়ী মহাত্মা হইলে হইতে পারেন, কিন্তু আমি বরং চোরের সহিত প্রণয় করিব, তথাপি তাঁহার সঙ্গে নহে।

হেমচন্দ্র রোদন করিতেছিলেন,—যাহাকে পাপিষ্ঠা, মনে স্থান দিবার অযোগ্য বলিয়া জানিয়াছিলেন, তাহার জগ্ন রোদন করিতেছিলেন। মৃগালিনীর কি তিনি দোষ আলোচনা করিতেছিলেন ? তাহা করিতে-ছিলেন বটে, কিন্তু কেবল তাহাই নহে। এক একবার মৃগালিনীর প্রেমপরিপূর্ণ মুখমণ্ডল, প্রেমপরিপূর্ণ কথা, প্রেমপরিপূর্ণ কার্য্য সকল মনে করিতেছিলেন। সেই মৃগালিনী কি অবিশ্বাসিনী ? একদিন মথুরায় হেমচন্দ্র মৃগালিনীর নিকট একখানি লিপি প্রেরণ করিবার জগ্ন ব্যস্ত

হইয়াছিলেন, উপযুক্ত বাহক পাইলেন না ; কিন্তু মৃগালিনীকে গবাক্ষপথে দেখিতে পাইলেন । তখন হেমচন্দ্র একটি আত্মফলের উপরে আবশ্যিক কথা লিখিয়া মৃগালিনীর ক্রোড় লক্ষ্য করিয়া বাতায়নপথে প্রেরণ করিলেন ; আত্ম ধরিবার জন্ত মৃগালিনী কিঞ্চিৎ অগ্রসর হইয়া আসাতে আত্ম মৃগালিনীর ক্রোড়ে না পড়িয়া তাঁহার কর্ণে লাগিল, অমনি তদাঘাতে কর্ণবিলম্বী রত্নকুণ্ডল কর্ণ ছিন্নভিন্ন করিয়া কাটিয়া পড়িল ; কর্ণশ্রুত রুধিরে মৃগালিনীর গ্রীবা ভাসিয়া গেল । মৃগালিনী আক্ষেপও করিলেন না ; কর্ণে হস্তও দিলেন না ; হাসিয়া আত্ম তুলিয়া লিপি পাঠপূর্বক, তখনই তৎপৃষ্ঠে প্রত্যুত্তর লিখিয়া আত্ম প্রতিপ্রেরণ করিলেন এবং যতক্ষণ হেমচন্দ্র দৃষ্টিপথে রহিলেন, ততক্ষণ বাতায়নে থাকিয়া হস্তমুখে দেখিতে লাগিলেন । হেমচন্দ্রের তাহা মনে পড়িল । সেই মৃগালিনী কি অবিশ্বাসিনী ? ইহা সম্ভব নহে । আর একদিন মৃগালিনীকে বৃশ্চিক দংশন করিয়াছিল । তাহার যন্ত্রণায় মৃগালিনী মুমূর্ষু বৎ কাতর হইয়াছিলেন । তাঁহার একজন পরিচারিকা তাঁহার উত্তম ঔষধ জানিত ; তৎপ্রয়োগমাত্র যন্ত্রণা একেবারে শীতল হয় ; দাসী শীঘ্র ঔষধ আনিতে গেল । ইত্যবসরে হেমচন্দ্রের দূতী গিয়া কহিল যে, হেমচন্দ্র উপবনে তাঁহার প্রতীক্ষা করিতেছেন । মুহূর্তমধ্যে ঔষধ আসিত, কিন্তু মৃগালিনী তাহার অপেক্ষা করেন নাই ; অমনি সেই মরণাধিক যন্ত্রণা বিস্মৃত হইয়া উপবনে উপস্থিত হইলেন । আর ঔষধ প্রয়োগ হইল না । হেমচন্দ্রের তাহা স্মরণ হইল । সেই মৃগালিনী ব্রাহ্মণকুলকলঙ্ক বোয়ামকেশের জন্ত হেমচন্দ্রের কাছে অবিশ্বাসিনী হইবে ? না, তা কখনই হইতে পারে না । আর একদিন হেমচন্দ্র মথুরা হইতে গুরুদর্শনে যাইতেছিলেন ; মথুরা হইতে এক গ্রহরের পথ আসিয়া হেমচন্দ্রের পীড়া হইল । তিনি এক পান্থনিবাসে পড়িয়া রহিলেন ; কোন প্রকারে এ সংবাদ অন্তঃপুরে মৃগালিনীর কর্ণে প্রবেশ করিল । মৃগালিনী সেই রাত্রিতে এক ধাত্রীমাত্র সঙ্গে লইয়া রাত্রিকালে সেই এক যোজন পথ পদব্রজে অতিক্রম করিয়া হেমচন্দ্রকে দেখিতে আসিলেন । যখন মৃগালিনী পান্থনিবাসে আসিয়া উপস্থিত হইলেন, তখন তিনি পথশ্রান্তিতে প্রায় নির্জীব ; চরণ ক্ষত-

বিস্কৃত,—রুধির বহিতেছিল। সেই রাত্রিতেই মৃণালিনী পিতার ভয়ে প্রত্যাঘর্ষন করিলেন। গৃহে আসিয়া তিনি স্বয়ং পীড়িতা হইলেন। হেমচন্দ্রের তাহাও মনে পড়িল। সেই মৃণালিনী নরাদম ব্যোমকেশের জ্ঞাত্য তাঁহাকে ত্যাগ করিবে? সে কি অবিশ্বাসিনী হইতে পারে? যে এমন কথায় বিশ্বাস করে, সেই অবিশ্বাসী—সে নরাদম, সে গণ্ডমূর্খ। হেমচন্দ্র শতবার ভাবিতেছিলেন, “কেন আমি মৃণালিনীর পত্র পড়িলাম না? নবদ্বীপে কেন আসিয়াছে, তাহাই বা কেন জানিলাম না?” পত্রখণ্ড-গুলি যে বনে নিক্ষিপ্ত করিয়াছিলেন, তাহা যদি সেখানে পাওয়া যায়, তবে তাহা যুক্ত করিয়া যতদূর পারেন, ততদূর মর্শ্বাবগত হইবেন, এইরূপ প্রত্যাশা করিয়া একবার সেই বন পর্য্যন্ত গিয়াছিলেন; কিন্তু সেখানে বনতলস্থ অন্ধকারে কিছুই দেখিতে পায়েন নাই। বায়ু লিপিকণ্ডসকল উড়াইয়া লইয়া গিয়াছে। যদি তখন আপন দক্ষিণ বাহু ছেদন করিয়া দিলে হেমচন্দ্র সেই লিপিকণ্ডগুলি পাইতেন, তবে হেমচন্দ্র তাহাও দিতেন।

আবার ভাবিতেছিলেন, “আচার্য্য কেন মিথ্যা কথা বলিবেন? আচার্য্য অত্যন্ত সত্যনিষ্ঠ—কখনও মিথ্যা বলিবেন না। বিশেষ আমাকে পুত্রাধিক স্নেহ করেন—জানেন, এ সংবাদে আমার মরণাধিক যন্ত্রণা হইবে, কেন আমাকে তিনি মিথ্যা কথা বলিয়া এত যন্ত্রণা দিবেন? আর তিনিও স্বেচ্ছাক্রমে এ কথা বলেন নাই। আমি সদর্পে তাঁহার নিকট কথা বাহির করিয়া লইলাম—যখন আমি বলিলাম যে, আমি সকলই অবগত আছি—তখনই তিনি কথা বলিলেন। মিথ্যা বলিবার উদ্দেশ্য থাকিলে, বলিতে অনিচ্ছুক হইবেন কেন? তবে হইতে পারে, হ্রস্বকেশ তাঁহার নিকট মিথ্যা বলিয়া থাকিবে। কিন্তু হ্রস্বকেশই বা অकारणे গুরুর নিকট মিথ্যা বলিবে কেন? আর মৃণালিনীই বা তাহার গৃহ ত্যাগ করিয়া নবদ্বীপে আসিবে কেন?”

যখন এইরূপ ভাবেন, তখন হেমচন্দ্রের মুখ কালিমাময় হয়, ললাট ঘর্ম্মসিক্ত হয়; তিনি শয়ন ত্যাগ করিয়া উঠিয়া বসেন; দস্তে অধর দংশন করেন, লোচন আরক্ত এবং বিস্ফারিত হয়; শূলধারণ জ্ঞাত হস্ত

মুষ্টিবদ্ধ হয়। আবার মৃণালিনীর প্রেমময় মুখমণ্ডল মনে পড়ে। অমনি ছিন্নমূল বৃক্ষের স্থায় শয্যায় পতিত হয়েন; উপাধানে মুখ লুক্কায়িত করিয়া শিশুর স্থায় রোদন করেন। হেমচন্দ্র ঐরূপ রোদন করিতেছিলেন, এমন সময়ে তাঁহার শয়নগৃহের দ্বার উদ্ঘাটিত হইল। গিরিজায়া প্রবেশ করিল।

হেমচন্দ্র প্রথমে মনে করিলেন, মনোরমা। তখনই দেখিলেন, সে কুসুমময়ী মূর্তি নহে। পরে চিনিলেন যে, গিরিজায়া। প্রথমে বিস্মিত, পরে আত্মলাদিত, শেষে কৌতূহলাক্রান্ত হইলেন। বলিলেন, “তুমি আবার কেন?”

গিরিজায়া কহিল, “আমি মৃণালিনীর দাসী। মৃণালিনীকে আপনি ত্যাগ করিয়াছেন। কিন্তু আপনি মৃণালিনীর ত্যাজ্য নহেন। স্মৃতরাং আমাকে আবার আসিতে হইয়াছে। আমাকে বেত্রাঘাত করিতে সাধ থাকে, করুন। ঠাকুরাণীর জন্ত এবার তাহা সহিব, স্থির সঙ্কল্প করিয়াছি।”

এ তিরস্কারে হেমচন্দ্র অত্যন্ত অপ্রতিভ হইলেন। বলিলেন, “তোমার কোন শঙ্কা নাই। জ্বালোককে আমি মারিব না। তুমি কেন আসিয়াছ? মৃণালিনী কোথায়? বৈকালে তুমি বলিয়াছিলে, তিনি নবদ্বীপে আসিয়াছেন; নবদ্বীপে আসিয়াছেন কেন? আমি তাঁহার পত্র না পড়িয়া ভাল করি নাই।”

গি। মৃণালিনী নবদ্বীপে আপনাকে দেখিতে আসিয়াছেন।

হেমচন্দ্রের শরীর কণ্টকিত হইল। এই মৃণালিনীকে কুলটা বলিয়া অবমানিত করিয়াছেন? তিনি পুনরপি গিরিজায়াকে কহিলেন, “মৃণালিনী কোথায় আছেন?”

গি। তিনি আপনার নিকট জন্মের শোধ বিদায় লইতে আসিয়াছেন। সরোবরতীরে দাঁড়াইয়া আছেন। আপনি আসুন।

এই বলিয়া গিরিজায়া চলিয়া গেল। হেমচন্দ্র তাহার পশ্চাৎ পশ্চাৎ ধাবিত হইলেন।

গিরিজায়া বাপীতীরে, যথায় মৃণালিনী সোপানোপরি বসিয়া ছিলেন, তথায় উপনীত হইল। হেমচন্দ্রও তথায় আসিলেন। গিরিজায়া

কছিল, “ঠাকুরাণী ! উঠ । রাজপুত্র আসিয়াছেন ।”

মৃগালিনী উঠিয়া দাঁড়াইলেন । উভয়ে উভয়ের মুখ নিরীক্ষণ করিলেন । মৃগালিনীর দৃষ্টিলোপ হইল ; অশ্রুজলে চক্ষু পুরিয়া গেল । অবলম্বনশাখা ছিন্ন হইলে যেমন শাখা-বিলম্বিনী লতা ভূতলে পড়িয়া যায়, মৃগালিনী সেইরূপ হেমচন্দ্রের পদমূলে পতিত হইলেন । গিরিজায় আস্তুরে গেল ।

দশম পরিচ্ছেদ : এত দিনের পর !

হেমচন্দ্র মৃগালিনীকে হস্তে ধরিয়া তুলিলেন । উভয়ে উভয়ের সম্মুখীন হইয়া দাঁড়াইলেন । এত কাল পরে ছুঁজনের সাক্ষাৎ হইল । যে দিন প্রদোষকালে, যমুনার উপকূলে নৈদাঘানিলসম্ভাড়িত বকুলমূলে দাঁড়াইয়া, নীলাধ্বময়ীর চঞ্চল-তরঙ্গ-শিরে নক্ষত্ররশ্মির প্রতিবিম্ব নিরীক্ষণ করিতে করিতে উভয়ে উভয়ের নিকট সজলনয়নে বিদায় গ্রহণ করিয়াছিলেন, তাহার পর এই সাক্ষাৎ হইল । নিদাঘের পর বর্ষা গিয়াছে, বর্ষার পর শরৎ যায়, কিন্তু ইহাদিগের হৃদয়মধ্যে যে কত দিন গিয়াছে, তাহা কি ঋতুগণনায় গণিত হইতে পারে ?

সেই নিশীথ সময়ে স্বচ্ছসলিলা বাপীতীরে, দুই জনে পরস্পর সম্মুখীন হইয়া দাঁড়াইলেন । চারি দিকে সেই নিবিড় বন, ঘনবিগ্ৰহস্ত লতাশ্রগ্বেশোভী বিশাল বিটপীসকল দৃষ্টিপথ রুদ্ধ করিয়া দাঁড়াইয়াছিল ; সম্মুখে নীলনীরদখণ্ডবৎ দীর্ঘিকা শৈবাল-কুমুদ-কহ্লার সহিত বিস্তৃত রহিয়াছিল । মাথার উপরে চন্দ্রনক্ষত্রজলদ সহিত আকাশ আলোকে হাসিতেছিল । চন্দ্রালোক আকাশে, বৃক্ষশিরে, লতাপল্লবে, বাপীসোপানে, নীলজলে—সর্বত্র হাসিতেছিল । প্রকৃতি স্পন্দহীনা, ধৈর্যময়ী । সেই ধৈর্যময়ী প্রকৃতির প্রাসাদমধ্যে মৃগালিনী হেমচন্দ্র মুখে মুখে দাঁড়াইলেন ।

ভাষায় কি শব্দ ছিল না ? তাঁহাদিগের মনে কি বলিবার কথা ছিল না ? যদি মনে বলিবার কথা ছিল, ভাষায় শব্দ ছিল, তবে কেন ইহারা কথা কহে না ? তখন চক্ষুর দেখাতেই মন উদ্গত—কথা কহিবে

কি প্রকারে ? এ সময় কেবলমাত্র প্রণয়ীর নিকটে অবস্থিতিতে এত সুখ যে, হৃদয়মধ্যে অণু সুখের স্থান থাকে না। যে সে সুখভোগ করিতে থাকে, সে আর কথার সুখ বাসনা করে না।

সে সময়ে এত কথা বলিবার থাকে যে, কোন কথা আগে বলিব, তাহা স্থির করিতে পারে না।

মনুষ্যভাষায় এমন কোন শব্দ আছে যে, সে সময়ে প্রযুক্ত হইতে পারে।

তঁাহারা পরস্পরের মুখ নিরীক্ষণ করিতে লাগিলেন। হেমচন্দ্র মৃগালিনীর সেই প্রেমময় মুখ আবার দেখিলেন—হ্রবীকেশবাক্যে প্রত্যয় দূর হইতে লাগিল। সে গ্রন্থের ছত্রে ছত্রে ত পবিত্রতা লেখা আছে। হেমচন্দ্র তঁাহার লোচনপ্রতি চাহিয়া রহিলেন ; সেই অপূর্ব্ব আয়তন-শালী, ইন্দীবর-নিন্দী, অন্তঃকরণের দর্পণরূপ চক্ষুপ্রতি চাহিয়া রহিলেন— তাহা হইতে কেবল প্রেমাশ্রু বহিতেছে ! সে চক্ষু যাহার, সে কি অবিশ্বাসিনী !

হেমচন্দ্র প্রথমে কথা কহিলেন। জিজ্ঞাসা করিলেন, “মৃগালিনি ! কেমন আছ ?”

মৃগালিনী উত্তর করিতে পারিলেন না। এখনও তঁাহার চিত্ত শাস্ত হয় নাই ; উত্তরের উপক্রম করিলেন, কিন্তু আবার চক্ষু জলে ভাসিয়া গেল। কণ্ঠ রুদ্ধ হইল, কথা সরিল না।

হেমচন্দ্র আবার জিজ্ঞাসা করিলেন, “তুমি কেন আসিয়াছ ?”

মৃগালিনী তথাপি উত্তর করিতে পারিলেন না। হেমচন্দ্র তঁাহার হস্ত ধারণ করিয়া সোপানোপরি বসাইলেন, স্বয়ং নিকটে বসিলেন, মৃগালিনীর যে কিছু চিত্তের স্থিরতা ছিল, এই আদরে তাহার লোপ হইল। ক্রমে ক্রমে তঁাহার মস্তক আপনি আসিয়া হেমচন্দ্রের স্কন্ধে স্থাপিত হইল, মৃগালিনী তাহা জানিয়াও জানিতে পারিলেন না। মৃগালিনী আবার রোদন করিলেন—তঁাহার অশ্রুজলে হেমচন্দ্রের স্কন্ধ, বক্ষঃ প্লাবিত হইল। এ সংসারে মৃগালিনী যত সুখ অন্মভূত করিয়াছিলেন, তন্মধ্যে কোন সুখই এই রোদনের তুল্য নহে !

হেমচন্দ্র আবার কথা कहিলেন, “মৃগালিনী ! আমি তোমার নিকট গুরুতর অপরাধ করিয়াছি। সে অপরাধ আমার ক্ষমা করিও। আমি তোমার নামে কলঙ্ক রটনা শুনিয়া তাহা বিশ্বাস করিয়াছিলাম। বিশ্বাস করিবার কতক কারণও ঘটয়াছিল—তাহা তুমি দূর করিতে পারিবে। যাহা আমি জিজ্ঞাসা করি, তাহার পরিষ্কার উত্তর দাও।”

মৃগালিনী হেমচন্দ্রের স্বন্ধ হইতে মস্তক না তুলিয়া कहিলেন, “কি ?”

হেমচন্দ্র বলিলেন, “তুমি হ্রষীকেশের গৃহ ত্যাগ করিলে কেন ?”

ঐ নাম শ্রবণমাত্র কুপিতা ফণিনীর শ্রায় মৃগালিনী মাথা তুলিল। कहিল, “হ্রষীকেশ আমাকে গৃহ হইতে বিদায় করিয়া দিয়াছে।

হেমচন্দ্র ব্যথিত হইলেন—অল্প সন্দিহান হইলেন—কিঞ্চিৎ চিন্তা করিলেন। এই অবকাশে মৃগালিনী পুনরপি হেমচন্দ্রের স্বন্ধে মস্তক রাখিলেন। সে সুখাসনে শিরোরক্ষা এত সুখ যে, মৃগালিনী তাহাতে বঞ্চিত হইয়া থাকিতে পারিলেন না।

হেমচন্দ্র জিজ্ঞাসা করিলেন, “কেন তোমাকে হ্রষীকেশ গৃহবহিষ্কৃত করিয়া দিল ?”

মৃগালিনী হেমচন্দ্রের হৃদয়মধ্যে মুখ লুকাইলেন। অতি মুহূরবে कहিলেন, “তোমাকে কি বলিব ? হ্রষীকেশ আমাকে কুলটা বলিয়া তাড়াইয়া দিয়াছে।”

শ্রুতমাত্র তীরের শ্রায় হেমচন্দ্র দাঁড়াইয়া উঠিলেন। মৃগালিনীর মস্তক তাঁহার বক্ষশ্চ্যুত হইয়া সোপানে আহত হইল।

“পাপীরসি—নিজমুখে স্বীকৃতা হইলি !” এই কথা দম্ভমধ্য হইতে ব্যক্ত করিয়া হেমচন্দ্র বেগে প্রস্থান করিলেন। পথে গিরিজয়াকে দেখিলেন ; গিরিজয়া তাঁহার সজলজলদভৌম মূর্ত্তি দেখিয়া চমকিয়া দাঁড়াইল। লিখিতে লজ্জা করিতেছে—কিন্তু না লিখিলে নয়—হেমচন্দ্র পদাঘাতে গিরিজয়াকে পথ হইতে অপসৃত্তা করিলেন। বলিলেন, “তুমি যাহার দৃত্তী, তাহাকে পদাঘাত করিলে আমার চরণ কলঙ্কিত হইত।” এই বলিয়া হেমচন্দ্র চলিয়া গেলেন।

যাহার ধৈর্য্য নাই, যে ক্রোধের জন্মমাত্র অন্ধ হয়, সে সংসারের সকল

সুখে বঞ্চিত। কবি করুণা করিয়াছেন যে, কেবল অধৈর্য্য মাত্র দোষে
বীরশ্রেষ্ঠ জোণাচার্য্যের নিপাত হইয়াছিল। “অশ্বখামা হতঃ” এই শব্দ
শুনিয়া তিনি ধনুর্ধ্বাণ ত্যাগ করিলেন। প্রশান্তর দ্বারা সবিশেষ তত্ত্ব
লইলেন না। হেমচন্দ্রের কেবল অধৈর্য্য নহে—অধৈর্য্য, অভিমান,
ক্রোধ।

শীতল সমীরণময়ী উষার পিঙ্গল মূর্ত্তি বাপীতীর-বনে উদয় হইল।
তখনও মৃগালিনী আহত মস্তক ধারণ করিয়া সোপানে বসিয়া আছেন।
গিরিজয়া জিজ্ঞাসা করিল, “ঠাকুরাণী, আঘাত কি গুরুতর বোধ
হইতেছে?”

মৃগালিনী কহিলেন, “কিসের আঘাত?”

গি। মাথায়।

ম। মাথায় আঘাত? আমার মনে হয় না।

চতুর্থ খণ্ড

প্রথম পরিচ্ছেদ : উর্নাত

যতক্ষণ মৃগালিনীর সুখের তার। ডুবিতেছিল, ততক্ষণ গোড়দেশের সৌভাগ্যশশীও সেই পথে যাঠিতেছিল। যে ব্যক্তি রাখিলে গোড় রাখিতে পারিত, সে উর্নাতের ছায় বিরলে বসিয়া অভাগা জন্মভূমিকে বন্ধ করিবার জন্য জাল পাতিতেছিল। নিশীথ সময়ে নিভূতে বসিয়া ধর্মাধিকার পশুপতি নিজ দক্ষিণহস্তস্বরূপ শাস্ত্রশীলকে ভৎসনা করিতে-ছিলেন, “শাস্ত্রশীল! প্রাতে যে সংবাদ দিয়াছ, তাহা কেবল তোমার অদক্ষতার পরিচয় মাত্র। তোমার প্রতি আর কোন ভার দিবার ইচ্ছা নাই।”

শাস্ত্রশীল কহিল, “যাহা অসাধ্য, তাহা পারি নাই। অল্প কার্যে পরিচয় গ্রহণ করুন।”

প। সৈনিকদিগকে কি উপদেশ দেওয়া হইতেছে ?

শা। এই যে, আমাদিগের আজ্ঞা না পাইলে কেহ না সাজে।

প। প্রাঙ্গপাল ও কোঠপালদিগকে কি উপদেশ দেওয়া হইয়াছে ?

শা। এই বলিয়া দিয়াছি যে, অচিরাৎ যবন-সম্রাটের নিকট হইতে কর লইয়া কয় জন যবন দূতস্বরূপ আসিতেছে, তাহাদিগের গতিরোধ না করে।

প। দামোদর শর্মা উপদেশানুযায়ী কার্য্য করিয়াছেন কি না ?

শা। তিনি বড় চতুরের ছায় কার্য্য নির্বাহ করিয়াছেন।

প। সে কি প্রকার ?

শা। তিনি একখানি পুরাতন গ্রন্থের একখানি পত্র পরিবর্তন করিয়া তাহাতে আপনার রচিত কবিতাগুলি বসাইয়াছিলেন। তাহা লইয়া অল্প প্রাতে রাজাকে শ্রবণ করাইয়াছেন এবং মাধবাচার্য্যের অনেক নিন্দা করিয়াছেন।

প। কবিতায় ভবিষ্যৎ গোড়বিজেতার রূপবর্ণনা সবিস্তারে লিখিত আছে। সে বিষয়ে মহারাজ কোন অনুসন্ধান করিয়াছিলেন ?

শ। করিয়াছিলেন। মদনসেন সম্প্রতি কাশীধাম হইতে প্রত্যাগমন করিয়াছেন, এ সংবাদ মহারাজ অবগত আছেন। মহারাজ কবিতায় ভবিষ্যৎ গোড়বিজেতার অবয়ব বর্ণনা শুনিয়া তাঁহাকে ডাকিতে পাঠাইলেন। মদনসেন উপস্থিত হইলে মহারাজ জিজ্ঞাসা করিলেন, “কেমন, তুমি মগধে যবন-রাজ-প্রতিনিধিকে দেখিয়া আসিয়াছ ?” সে কহিল, “আসিয়াছি।” মহারাজ তখন আজ্ঞা করিলেন, “সে দেখিতে কি প্রকার, বিবৃত কর।” তখন মদনসেন বখতিয়ার খিলজির যথার্থ যে রূপ দেখিয়াছেন, তাহাই বিবৃত করিলেন। কবিতাতেও সেইরূপ বর্ণিত ছিল। স্মরণ্য গোড়জয় ও তাঁহার রাজ্যনাশ নিশ্চিত বলিয়া বুঝিলেন।

প। তাহার পর ?

শ। রাজা তখন রোদন করিতে লাগিলেন। কহিলেন, “আমি এ বৃদ্ধ বয়সে কি করিব ? সপরিবারে যবনহস্তে প্রাণে নষ্ট হইব দেখিতেছি !” তখন দামোদর শিক্ষামত কহিলেন, “মহারাজ ! ইহাঃ সত্বপায় এই যে, অবসর থাকিতে থাকিতে আপনি সপরিবারে তীর্থযাত্রা করুন। ধর্ম্মাধিকারের প্রতি রাজকার্যের ভার দিয়া যাউন। তাহ হইলে আপনার শরীর রক্ষা হইবে। পরে শাস্ত্র মিথ্যা হয়, রাজ পুনঃপ্রাপ্ত হইবেন।” রাজা এ পরামর্শে সন্তুষ্ট হইয়া নৌকাসজ্জা করিতে আদেশ করিয়াছেন। অচিরাৎ সপরিবারে তীর্থযাত্রা করিবেন।

প। দামোদর সাধু। তুমিও সাধু। এখন আমার মনস্কাম সিদ্ধির সম্ভাবনা দেখিতেছি। নিতান্ত পক্ষে স্বাধীন রাজা না হই, যবন রাজ প্রতিনিধি হইব। কার্য্যসিদ্ধি হইলে, তোমাদিগকে সাধ্যম পুরস্কৃত করিতে ক্রটি করিব না, তাহা ত জান। এক্ষণে বিদায় হও কাল প্রাতেই যেন তীর্থযাত্রার জন্ত নৌকা প্রস্তুত থাকে।

শাস্ত্রশীল বিদায় হইল।

দ্বিতীয় পরিচ্ছেদ : বিনা সূতার হার

পশুপতি উচ্চ অট্টালিকায় বহু ভৃত্য সমভিব্যাহারে বাস করিতেন বটে, কিন্তু তাঁহার পুরী কানন হইতেও অন্ধকার। গৃহ যাহাতে আলো হয়, স্ত্রী পুত্র পরিবার—এ সকলই তাঁহার গৃহে ছিল না।

অগ্ন শাস্ত্রশীলের সহিত কথোপকথনের পর, পশুপতির সেই সকল কথা মনে পড়িল। মনে ভাবিলেন, “এত কালের পর বুঝি এ অন্ধকার পুরী আলো হইল—যদি জগদম্বা অন্বুকূলা হয়েন, তবে মনোরমা এ অন্ধকার ঘুচাইবে।”

এইরূপ ভাবিতে ভাবিতে পশুপতি, শয়নের পূর্বে অষ্টভুজাকে নিয়মিত প্রণাম-বন্দনাদির জগ্ন দেবীমন্দিরে প্রবেশ করিলেন। প্রবেশ করিয়া দেখিলেন যে, তথায় মনোরমা বসিয়া আছে।

পশুপতি কহিলেন, “মনোরমা, কখন আসিলে?”

মনোরমা পূজাবশিষ্ট পুষ্পগুলি লইয়া বিনাসূত্রে মালা গাঁথিতেছিল। কথার কোন উত্তর দিল না। পশুপতি কহিলেন, “আমার সঙ্গে কথা কও যতক্ষণ তুমি থাক, ততক্ষণ সকল যন্ত্রণা বিন্মৃত হই।”

মনোরমা মুখ তুলিয়া চাহিয়া দেখিল। পশুপতির মুখপ্রতি চাহিয়া রহিল, ক্ষণেক পরে কহিল, “আমি তোমাকে কি বলিতে আসিয়াছিলাম, কিন্তু তাহা আমার মনে হইতেছে না।”

পশুপতি কহিলেন, “তুমি মনে কর। আমি অপেক্ষা করিতেছি।”

পশুপতি বসিয়া রহিলেন, “মনোরমা মালা গাঁথিতে লাগিল।

অনেকক্ষণ পরে পশুপতি কহিলেন, “আমারও কিছু বলিবার আছে, মনোযোগ দিয়া শুন। আমি এ বয়স পর্য্যন্ত কেবল বিজ্ঞা উপার্জন করিয়াছি—বিষয়ালোচনা করিয়াছি, অর্থোপার্জন করিয়াছি। সংসারধর্ম হরি নাই। যাহাতে অনুরাগ, তাহাই করিয়াছি, দারপরিগ্রহে অনুরাগ, াই, এজগ্ন তাহা করি নাই। কিন্তু সে পর্য্যন্ত তুমি আমার নয়নপথে মাসিলাছ, সেই পর্য্যন্ত মনোরমালাভ আমার একমাত্র ধ্যান হইয়াছে।

সেই লাভের জন্ম এই নিদারুণ ব্রতে প্রবৃত্ত হইয়াছি। যদি জগদীশ্বরী
অনুগ্রহ করেন, তবে দুই চারি দিনের মধ্যে রাজ্যলাভ করিব এবং
তোমাকে বিবাহ করিব। ইহাতে তুমি বিধবা বলিয়া যে বিষ্ম, শাস্ত্রীয়
প্রমাণের দ্বারা আমি তাহার খণ্ডন করিতে পারিব। কিন্তু তাহাতে দ্বিতীয়
বিষ্ম এই যে, তুমি কুলীনকন্যা, জনার্দন শর্মা কুলীনশ্রেষ্ঠ, আমি
শ্রোত্রিয়।”

মনোরমা এ সকল কথায় কর্ণপাত করিতেছিল কি না সন্দেহ।
পশুপতি দেখিলেন যে, মনোরমা চিত্ত হারাইয়াছে। পশুপতি, সরলা
অবিকৃতা বালিকা মনোরমাকে ভালবাসিতেন,—প্রোঢ়া তীক্ষ্ণবুদ্ধিশালিনী
মনোরমাকে ভয় করিতেন। কিন্তু অণু ভাবান্তরে সম্ভট্ট হইলেন না।
তথাপি পুনরুত্তম করিয়া পশুপতি কহিলেন, “কিন্তু কুলরীতি ও শাস্ত্রমূলক
নহে, কুলনাশে ধর্মনাশ বা জাতিভ্রংশ হয় না। তাঁহার অজ্ঞাতে যদি
তোমাকে বিবাহ করিতে পারি, তবে ক্ষতি কি? তুমি সম্মত হইলেই,
তাহা পারি। পরে তোমার পিতামহ জানিতে পারিলে বিবাহ ভ
ফিরিবে না।”

মনোরমা কোন উত্তর করিল না। সে সকল শ্রবণ করিয়াছিল কি
না সন্দেহ। একটি কৃষ্ণবর্ণ মার্জ্জার তাহার নিকটে আসিয়া বসিয়াছিল,
সে সেই বিনাসূত্রের মালা তাহার গলদেশে পরাইতেছিল। পরাইতে
মালা খুলিয়া গেল। মনোরমা তখন আপন মস্তক হইতে কেশগুচ্ছ ছিন্ন
করিয়া, তৎসূত্রে আবার মালা গাঁথিতে লাগিল।

পশুপতি উত্তর না পাইয়া নিঃশব্দে মালাকুশুমমধ্যে মনোরমার অনুপম
অঙ্গুলির গতি মুঞ্চলোচনে দেখিতে লাগিলেন।

তৃতীয় পরিচ্ছেদ : বিহঙ্গী পিঞ্জরে

পশুপতি মনোরমার বুদ্ধিপ্রদীপ জ্বালিবার অনেক যত্ন করিতে
লাগিলেন, কিন্তু ফলোৎপত্তি কহিন হইল। পরিশেষে বলিলেন,
“মনোরমা, রাত্রি অধিক হইয়াছে। আমি শয়নে যাই।”

মনোরমা অগ্নানবদে কহিলেন, “যাও ।”

পশুপতি শয়নে গেলেন না । বসিয়া মালা গাঁথা দেখিতে লাগিলেন । আবার উপায়ান্তর স্বরূপ, ভয়সূচক চিন্তার আবির্ভাবে কার্য্য সিদ্ধ হইবেক ভাবিয়া, মনোরমাকে ভীতা করিবার জন্ত পশুপতি কহিলেন, “মনোরমা, যদি ইতিমধ্যে যবন আইসে, তবে তুমি কোথায় যাইবে ?”

মনোরমা মালা হইতে মুখ না তুলিয়া কহিল, “বাটীতে থাকিব ।”

পশুপতি কহিলেন, “বাটীতে তোমাকে কে রক্ষা করিবে ?”

মনোরমা পূর্ব্ববৎ অগ্ন মনে কহিল, “জানি না ; নিরুপায় ।”

পশুপতি আবার জিজ্ঞাসা করিলেন, “তুমি আমাকে কি বলিতে মন্দিরে আসিয়াছ ?”

ম । দেবতা প্রণাম করিতে ।

পশুপতি বিরক্ত হইলেন । কহিলেন, “তোমাকে মিনতি করিতেছি, মনোরমা, এইবার যাহা বলিতেছি, তাহা মনোযোগ দিয়া শুন—তুমি অজিও বল, আমাকে বিবাহ করিবে কি না ?”

মনোরমার মালা গাঁথা সম্পন্ন হইয়াছিল—সে তাহা একটা কৃষ্ণবর্ণ মার্জ্জারের গলায় পরাইতেছিল । পশুপতির কথা কর্ণে গেল না । মার্জ্জার মালা পরিধানে বিশেষ অনিচ্ছা প্রকাশ করিতেছিল—যতবার মনোরমা মালা তাহার গলায় দিতেছিল, ততবার সে মালার ভিতর হইতে মস্তক বাহির করিয়া লইতেছিল—মনোরমা কুন্দনিন্দিত দশ্বে অধর দংশন করিয়া ঈষৎ হাসিতেছিল, আর আবার মালা তাহার গলায় দিতেছিল । পশুপতি অধিকতর বিরক্ত হইয়া বিড়ালকে এক চপেটাঘাত করিলেন—বিড়াল উর্দ্ধলাঙ্গুল হইয়া দূরে পলায়ন করিল । মনোরমা সেইরূপ দংশিতাধরে হাসিতে হাসিতে করস্থ মালা পশুপতিরই মস্তকে পরাইয়া দিল ।

মার্জ্জার-প্রসাদ মস্তকে পাইয়া রাজপ্রাসাদভোগী ধর্মাধিকার হতবুদ্ধি হইয়া রহিলেন । অগ্ন ক্রোধ হইল—কিন্তু দংশিতাধরা হাশ্বময়ী তৎকালীন অল্পমম রূপমাধুরী দেখিয়া তাঁহার মস্তক ঘুরিয়া গেল । তিনি মনোরমাকে আলিঙ্গন করিবার জন্ত বাহ প্রসারণ করিলেন—

অমনি মনোরমা লক্ষ দিয়া দূরে দাঁড়াইল—পশ্চিমধ্যে উন্নতকণা কালসর্প দেখিয়া পশ্চিক যেমন দূরে দাঁড়ায়, সেইরূপ দাঁড়াইল ।

পশুপতি অপ্রতিভ হইলেন ; ক্ষণেক মনোরমার মুখপ্রতি চাহিতে পারিলেন না—পরে চাহিয়া দেখিলেন—মানারমা শ্রৌচবয়ঃপ্রফুল্লমুখী মহিমাময়ী সুন্দরী ।

পশুপতি কহিলেন, “মনোরমা, দোষ ভাবিও না । তুমি আমার পত্নী—আমাকে বিবাহ কর ।” মনোরমা পশুপতির মুখপ্রতি তীব্র কটাক্ষ কবিয়া কহিল, “পশুপতি ! কেশবের কন্যা কোথায় ?”

পশুপতি কহিলেন, “কেশবের মেয়ে কোথায় জানি না—জানিতেও চাহি না । তুমি আমাব একমাত্র পত্নী ।”

ম । আমি জানি কেশবের মেয়ে কোথায়—বলিব ?

পশুপতি অবাঞ্ছিত হইয়া মনোরমার মুখপ্রতি চাহিয়া রহিলেন । মনোরমা বলিতে নাগিল, “একজন জ্যোতির্বিদ গণনা করিয়া বলিয়াছিলেন যে, কেশবের মেয়ে অল্পবয়সে বিধবা হইয়া স্বামীর অনুমৃত্য হইবে । কেশব এই কথায় অল্পকালে মেয়েকে হারাইবার ভয়ে বড়ই দুঃখিত হইয়াছিলেন । তিনি ধর্মানাশের ভয়ে মেয়েকে পাত্রস্থ করিলেন, কিন্তু বিধিলিপি খণ্ডাইবার ভরসায় বিবাহের রাত্রেই মেয়ে লইয়া প্রয়াগে পলায়ন করিলেন । তাঁহার অভিপ্রায় এই ছিল যে, তাঁহার মেয়ে স্বামীর মৃত্যুসংবাদ কশ্মিন্ কালে না পাইতে পারেন । দৈবাবধি কিছুকাল পরে প্রয়াগে কেশবের মৃত্যু হইল । তাঁহার মেয়ে পূর্বেই মাতৃহীনা হইয়াছিল—এখন মৃত্যুকালে কেশব হৈমবতীকে আচার্য্যের হাতে সমর্পণ করিয়া গেলেন । মৃত্যুকালে কেশব আচার্য্যকে এই কথা বলিয়া গেলেন, ‘এই অনাথা মেয়েটিকে আপনার গৃহে রাখিয়া প্রতিপালন করিবেন । ইহার স্বামী পশুপতি—কিন্তু জ্যোতির্বিদদেরা বলিয়া গিয়াছেন যে, ইনি অল্পবয়সে স্বামীর অনুমৃত্য হইবেন । অতএব আপনি আমার নিকট স্বীকার করুন যে, এই মেয়েকে কখনও বলিবেন না যে, পশুপতি ইহার স্বামী । অথবা পশুপতিকে কখনও জানাইবেন না যে, ইনি তাঁহার স্ত্রী ।’

“আচার্য্য সেইরূপ অঙ্গীকার করিলেন। সেই পর্য্যন্ত তিনি তাহাকে পরিবারস্থ করিয়া, প্রতিপালন করিয়া, তোমার সঙ্গে বিবাহের কথা লুকাইয়াছেন।”

প। এখন সে কণ্ঠা কোথায় ?

ম। আমিই কেশবের মেয়ে—জনার্দন তাঁহার আচার্য্য।

পশুপতি চিত্ত হারাইলেন ; তাঁহার মস্তক ঘুরিতে লাগিল। তিনি বাঙ্‌নিষ্পত্তি না করিয়া প্রাতিমাসমীপে সাষ্টাঙ্গ প্রণিপাত করিলেন। পরে গাত্রোত্থান করিয়া মনোরমাকে বক্ষে ধারণ করিতে গেলেন। মনোরমা পূর্ববৎ সরিয়া দাঁড়াইল। কহিল, “এখন নয়—আরও কথা আছে।”

প। মনোরমা—রাক্ষসী ! এতদিন কেন আমাকে এ অন্ধকারে রাখিয়াছিলেন ?

ম। কেন ! তুমি কি আমার কথায় বিশ্বাস করিতে ?

প। মনোরমা, তোমার কথায় কবে আমি অবিশ্বাস করিয়াছি ? আর যদিই আমার অপ্রত্যয় জন্মিত, তবে আমি জনার্দন শর্মাকে জিজ্ঞাসা করিতে পারিতাম।

ম। জনার্দন কি তাহা প্রকাশ করিতেন ? তিনি শিশুর নিকট সত্যে বদ্ধ আছেন।

প। তবে তোমার কাছে প্রকাশ করিলেন কেন ?

ম। তিনি আমার নিকট প্রকাশ করেন নাই। একদিন গোপনে ব্রাহ্মণীর নিকট প্রকাশ করিতেছিলেন। আমি দৈবাৎ গোপনে শুনিয়াছিলাম। আরও আমি বিধবা বলিয়া পরিচিতা। তুমি আমার কথায় প্রত্যয় করিলে লোকে প্রত্যয় করিবে কেন ? তুমি লোকের কাছে নিন্দনীয় না হইয়া কি প্রকারে আমাকে গ্রহণ করিতে ?

প। আমি সকল লোককে একত্র করিয়া তাঁহাদিগকে বুঝাইয়া বলিতাম।

ম। ভাল, তাহাই হউক,—জ্যোতির্বিদদের গণনা ?

প। আমি গ্রহশাস্ত্র করাইতাম। ভাল, যাহা হইবার তাহা হইয়া গিয়াছে। এক্ষণে আমি রত্ন পাইয়াছি, তবে আর তাহা গলা হইতে

নামাইব না। তুমি আর আমার ঘর ছাড়িয়া যাইতে পারিবে না।

মনোরমা কহিল, “এ ঘর ছাড়িতে হইবে। পশুপতি ! আমি যাহা আঞ্জ বলিতে আসিয়াছিলাম, তাহা বলি শুন। এ ঘর ছাড়। তোমার রাজ্যলাভের, ছুরাশা ছাড়। প্রভুর অহিত চেষ্টা ছাড়। এ দেশ ছাড়িয়া চল, আমরা কাশীধামে যাত্রা করি। সেইখানে আমি তোমার চরণসেবা করিয়া জন্ম সার্থক করিব। যে দিন আমাদিগের আয়ুঃশেষ হইবে, একত্রে পরমধামে যাত্রা করিব। যদি ইহা স্বীকার কর—আমার ভক্তি অচলা থাকিবে। নহিলে—”

প। নহিলে কি ?

মনোরমা তখন উন্নতমুখে, সবাঙ্গলোচনে, দেবীপ্রতিমার সম্মুখে দাঁড়াইয়া, যুক্তকরে গদগদকণ্ঠে কহিল, “নহিলে, দেবীসমক্ষে শপথ করিতেছি, তোমায় আমায় এই সাক্ষাৎ, এ জন্মে আর সাক্ষাৎ হইবে না।”

পশুপতিও দেবীর সমক্ষে বদ্ধাঞ্জলি হইয়া দাঁড়াইলেন। বলিলেন, “মনোরমা—আমিও শপথ করিতেছি, আমার জীবন থাকিতে তুমি আমার বাড়ী ছাড়িয়া যাইতে পারিবে না। মনোরমা, আমি যে পথে পদার্পণ করিয়াছি, সে পথ হইতে ফিরিবার উপায় থাকিলে আমি ফিরিতাম—তোমাকে লইয়া সর্বভ্যাগী হইয়া কাশীযাত্রা করিতাম। কিন্তু অনেক দূর গিয়াছি, আর ফিরিবার উপায় নাই—যে গ্রন্থি বাঁধিয়াছি, তাহা আর খুলিতে পারি না—শ্রোতে ভেলা ভাসাইয়া আর ফিরাইতে পারি না। যাহা ঘটবার তাহা ঘটিয়াছে। তাই বলিয়া কি আমার পরমমুখে আমি বঞ্চিত হইব ? তুমি আমার স্ত্রী, আমার কপালে যাই থাকুক, আমি তোমাকে গৃহিণী করিব। তুমি ক্ষণেক অপেক্ষা কর—আমি শীঘ্র আসিতেছি।” এই বলিয়া পশুপতি মন্দির হইতে নিষ্ক্রান্ত হইয়া গেলেন। মনোরমার চিন্তে সংশয় জন্মিল। সে চিন্তিতান্তঃকরণে কিয়ৎক্ষণ মন্দিরমধ্যে দাঁড়াইয়া রহিল। আর একবার পশুপতির নিকট বিদায় না লইয়া যাইতে পারিল না।

অল্পকাল পরেই পশুপতি ফিরিয়া আসিলেন। বলিলেন, “প্রাণাধিকে ! আঞ্জি আর তুমি আমাকে ভ্যাগ করিয়া যাইতে পারিবে না। আমি:

সকল দ্বার রুদ্ধ করিয়া আসিয়াছি ।”

মনোরমা বিহঙ্গী পিঞ্জরে বন্ধ হইল ।

চতুর্থ পরিচ্ছেদ : যবনদূত—যমদূত বা

বেলা প্রহরেকের সময় নগরবাসীরা বিশ্বতলোচনে দেখিল, কোন অপরিচিতজাতীয় সপ্তদশ অশ্বারোহী পুরুষ রাজপথ অতিবাহিত করিয়া রাজভবনাভিমুখে যাইতেছিল । তাহাদিগের আকার ইঙ্গিত দেখিয়া নবদ্বীপবাসীরা ধগ্ধবাদ করিতে লাগিল । তাহাদিগের শরীর আয়ত, দীর্ঘ অথচ পুষ্ট ; তাহাদিগের বর্ণ তপ্তকাক্ষনসন্নিভ ; তাহাদিগের মুখমণ্ডল বিস্মৃত, ঘনকৃষ্ণশুক্ররাজবিভূষিত ; নয়ন প্রশস্ত, জ্বালাবিশিষ্ট । তাহাদিগের পরিচ্ছদ অনর্থক চাক্চিক্যবিবর্জিত ; তাহাদিগের যোদ্ধবেশ ; সর্বদাঙ্গ প্রহরণজালমণ্ডিত, লোচনে দৃঢ় প্রতিজ্ঞ । আর যে সকল সিদ্ধপার-জাত অশ্বপৃষ্ঠে তাহারা আরোহণ করিয়া যাইতেছিল, তাহারা ই বা কি মনোহর ! পর্বতশিলাখণ্ডের স্তায় বৃহদাকার, বিমার্জিতদেহ, বক্রগ্রীব, বন্যা-রোধ-অসহিষ্ণু, তেজোগর্বে নৃত্যশীল ! আরোহীরা কিবা তচ্চালন-কৌশলী—অবলীলাক্রমে সেই রুদ্ধবায়ুতুল্য তেজঃপ্রখর অশ্বসকল দমিত করিতেছে । দেখিয়া গোড়বাসীরা বহুতর প্রশংসা করিল ।

সপ্তদশ অশ্বারোহী দৃঢ় প্রতিজ্ঞায় অধরোষ্ঠ সংলিষ্ট করিয়া নীরবে রাজপুরাভিমুখে চলিল । কোতূহলবশতঃ কোন নগরবাসী কিছু জিজ্ঞাসা করিলে, সমভিব্যাহারী একজন ভাষাজ্ঞ ব্যক্তি বলিয়া দিতে লাগিল, “ইহার যবন রাজার দূত ।” এই বলিয়া ইহার প্রাপ্তপাল ও কোষ্ঠ-পালদিগের নিকট পরিচয় দিয়াছিল—এবং পশুপতির আঙ্গাক্রমে সেই পরিচয়ে নির্বিঘ্নে নগরমধ্যে প্রবেশ লাভ করিল ।

সপ্তদশ অশ্বারোহী রাজদ্বারে উপনীত হইল । বৃদ্ধ রাজার শৈথিল্যে আর পশুপতির কৌশলে রাজপুরী প্রায় রক্ষকহীন । রাজসভা ভঙ্গ হইয়াছিল—পুরীমধ্যে কেবল পোরজন ছিল মাত্র—অল্পসংখ্যক দৌবারিক দ্বার রক্ষা করিতেছিল । একজন দৌবারিক জিজ্ঞাসা করিল, “তোমরা কি জন্ত আসিয়াছ ?”

যবনেরা উত্তর করিল, “আমরা যবন-রাজপ্রতিনিধির দূত ; গোড়-রাজের সহিত সাক্ষাৎ করিব।”

দৌবারিক কহিল, “মহারাজাধিরাজ গোড়েশ্বর এক্ষণে অন্তঃপুরে গমন করিয়াছেন—এখন সাক্ষাৎ হইবে না।”

যবনেরা নিষেধ না শুনিয়া মুক্ত দ্বারপথে প্রবেশ করিতে উত্তর হইল। সর্বাপ্তে একজন খর্বকায়, দীর্ঘবাহু, কুরূপ যবন। দুর্ভাগ্যবশতঃ দৌবারিক তাহার গতিরোধজন্য শূলহস্তে তাহার সম্মুখে দাঁড়াইল। কহিল, “ফের—নচেৎ এখনই মারিব।”

“আপনিই তবে মর!” এই বলিয়া ক্ষুদ্রাকার যবন দৌবারিককে নিজকরস্থিত তরবারে ছিন্ন করিল। দৌবারিক প্রাণত্যাগ করিল। তখন আপন সঙ্গাদিগের মুখাবলোকন করিয়া ক্ষুদ্রকায় যবন কহিল, “এক্ষণে আপন আপন কার্য কর।” অমনি বাক্যহীন ষোড়শ অশ্বারোহীদিগের মধ্য হইতে ভীষণ জয়ধ্বনি সমুথিত হইল। তখন সেই ষোড়শ যবনের কটিবন্ধ হইতে ষোড়শ অসিফলক নিষ্কোষিত হইল এবং অশনিসম্পাত-সদৃশ তাহারা দৌবারিকদিগকে আক্রমণ করিল। দৌবারিকেরা রণ-সজ্জায় ছিল না—অকস্মাৎ নিরুছোঁগে আক্রান্ত হইয়া আত্মরক্ষার কোন চেষ্টা করিতে পারিল না—মুহূর্ত্তমধ্যে সকলেই নিহত হইল।

ক্ষুদ্রকায় যবন কহিল, “যেখানে যাহাকে পাও, বধ কর। পুরী অরক্ষিতা—বুদ্ধ রাজাকে বধ কর।”

তখন যবনেরা পুরমধ্যে তড়িতের স্থায় প্রবেশ করিয়া বালবৃদ্ধবনিতা পৌরজন যেখানে যাহাকে দেখিল, তাহাকে অসি দ্বারা ছিন্নমস্তক, অথবা শূলাগ্রে বিদ্ধ করিল।

পৌরজন তুমুল আর্তনাদ করিয়া ইতস্ততঃ পলায়ন করিতে লাগিল। সেই ঘোর আর্তনাদ, অন্তঃপুরে যথা বৃদ্ধ রাজা ভোজন করিতেছিলেন, তথা প্রবেশ করিল। তাঁহার মুখ শুকাইল। জিজ্ঞাসা করিলেন, “কি ঘটিয়াছে—যবন আসিয়াছে?”

পলায়নতৎপর পৌরজনেরা কহিল, “যবন সকলকে বধ করিয়া আপনাকে বধ করিতে আসিতেছে।”

কবলিত অন্নগ্রাস রাজার মুখ হইতে পড়িয়া গেল। তাঁহার শুষ্কশরীর জলশ্রোতঃপ্রহত বেতসের শ্রায় কাঁপিতে লাগিল। নিকটে রাজমহিষী ছিলেন—রাজা ভোজনপাত্রে উপর পড়িয়া যান দেখিয়া, মহিষী তাঁহার হস্ত ধরিলেন; কহিলেন, “চিন্তা নাই—আপনি উঠুন।” এই বলিয়া তাঁহার হস্ত ধরিয়া তুলিলেন। রাজা কলেব পুত্তলিকার শ্রায় উঠিয়া দাঁড়াইলেন।

মহিষী কহিলেন, “চিন্তা কি? নোকায় সকল ভ্রব্য গিয়াছে: চলুন, আমরা খিড়কী দ্বার দিয়া সোণারগাঁ যাত্রা করি।”

এই বলিয়া মহিষী রাজার অধোত হস্ত ধারণ করিয়া খিড়কিদ্বারপথে সুবর্ণগ্রাম যাত্রা করিলেন। সেই রাজকুলকলঙ্ক, অসমর্থ রাজার সঙ্গে গোড়বাজের রাজলক্ষ্মীও যাত্রা করিলেন।

ষোড়শ সহস্র লইয়া মৰ্কটাকার বখতিয়ার খিলিজি গোড়েশ্বরের রাজপুরী অধিকার করিল।

ষষ্টি বৎসর পরে যবন-ইতিহাসবেত্তা মিন্‌হাজ উদ্দীন এইরূপ লিখিয়া-ছিলেন। ইহার কতদূর সত্য, কতদূর মিথ্যা, তাহা কে জানে? যখন মনুশ্যের লিখিত চিত্রে সিংহ পরাজিত, মনুশ্য সিংহের অপমানকর্তা স্বরূপ চিত্রিত হইয়াছিল, তখন সিংহেব হস্তে চিত্রফলক দিলে কিরূপ চিত্র লিখিত হইত? মনুশ্য মূষিকতুল্য প্রতীয়মান হইত সন্দেহ নাই। মন্দভাগিনী বঙ্গভূমি সহজেই ছর্ব্বলা, আবার তাহাতে শত্রুহস্তে চিত্রফলক!

পঞ্চম পরিচ্ছেদ : জাল ছিঁড়িল

গোড়েশ্বরপুরে অধিষ্ঠিত হইয়াই বখতিয়ার খিলিজি ধর্মাধিকারের নিকট দূত প্রেরণ করিলেন। ধর্মাধিকারের সহিত সাক্ষাতের অভিলাষ জানাইলেন। তাঁহার সহিত যবনের সন্ধিনিবন্ধন হইয়াছিল, তাহার ফলোৎপাদনের সময় উপস্থিত!

পশুপতি ইষ্টদেবীকে প্রণাম করিয়া, কুপিতা মনোরমার নিকট বিদায় লইয়া, কদাচিৎ উল্লসিত—কদাচিৎ শঙ্কিত চিন্তে যবনসমীপে উপস্থিত হইলেন। বখতিয়ার খিলিজি গাত্রোথান করিয়া সাদরে তাঁহার

‘অভিবাদন করিলেন এবং কুশল জিজ্ঞাসা করিলেন । পশুপতি রাজ-
ভৃত্যবর্গের রক্তনদীতে চরণ প্রক্ষালন করিয়া আসিয়াছেন, সহসা কোন
উত্তর দিতে পারিলেন না । বখ্‌তিয়ার খিলিজি তাঁহার চিন্তের ভাব
বুঝিতে পারিয়া কহিলেন, “পশুপতিবর ! রাজসিংহাসনে আরোহণের পথ
কুসুমাবৃত নহে । এ পথ চলিতে গেলে, বন্ধুবর্গের অস্থিমুণ্ড সর্বদা পদে
বিদ্ধ হয় ।”

পশুপতি কহিলেন, “সত্য । কিন্তু যাহারা বিরোধী, তাহাদিগেরই
বধ আবশ্যিক । ইহারা নির্বিবরোধী ।”

বখ্‌তিয়ার কহিলেন, “আপনি শোণিতপ্রবাহ দেখিয়া, নিজ অঙ্গীকার
স্মরণে অসুখী হইতেছেন ?”

পশুপতি কহিলেন, “যাহা স্বীকার করিয়াছি, তাহা অবশ্য করিব ।
মহাশয়ও যে তদ্রূপ করিবেন, তাহাতে আমার কোন সংশয় নাই ।”

বখ্‌ । কিছুমাত্র সংশয় নাই । কেবলমাত্র আমাদিগের এক
যাজ্ঞা আছে ।

প । আজ্ঞা করুন ।

ব । কুতব্‌উদ্দীন গৌড়-শাসনভার আপনার প্রতি অর্পণ করিলেন ।
আজ হইতে আপনি বঙ্গে রাজপ্রতিনিধি হইলেন । কিন্তু যবন-সম্রাটের
সঙ্কল্প এই যে, ইসলামধর্মাবলম্বী ব্যতীত কেহ তাঁহার রাজকার্য্যে সংলিপ্ত
হইতে পারিবে না । আপনাকে ইসলামধর্ম অবলম্বন করিতে হইবে ।

পশুপতির মুখ শুকাইল । তিনি কহিলেন, “সন্ধির সময়ে এরূপ
কোন কথা হয় নাই ।”

ব । যদি না হইয়া থাকে, তবে সেটা ভ্রান্তিমাত্র । আর এ কথা
উত্থাপিত না হইলেও আপনায় স্থায় বুদ্ধিমান ব্যক্তি দ্বারা অনায়াসেই
অনুমিত হইয়া থাকিবে । কেন না, এমন কখনও সম্ভবে না যে,
মুসলমানেরা বাঙ্গালা জয় করিয়াই আবার হিন্দুকে রাজ্য দিবে ।

প । আমি বুদ্ধিমান বলিয়া আপনার নিকট পরিচিত হইতে
পারিলাম না ।

ব । না বুঝিয়া থাকেন, এখন বুঝিলেন ; আপনি যবনধর্ম

অবলম্বনে স্থিরসঙ্কল্প হইল ।

প । (সদর্পে) আমি স্থিরসঙ্কল্প হইয়াছি যে, যবন-সম্রাটের সাম্রাজ্যের জগুও সনাতনধর্ম ছাড়িয়া নরকগামী হইব না ।

ব । ইহা আপনার ভ্রম । যাহাকে সনাতন ধর্ম বলিতেছেন, সে ভূতের পূজা মাত্র । কোরাণ-উক্ত ধর্মই সত্য ধর্ম । মহম্মদ ভজিয়া ইহকাল পরকালের মঙ্গলসাধন করুন ।

পশুপতি যবনের শঠতা বুঝিলেন । তাহার অভিপ্রায় এই মাত্র যে, কার্যাসিদ্ধি করিয়া নিবন্ধ সাক্ষ ছিলক্রমে ভঙ্গ করিব । আরও বুঝিলেন, ছিলক্রমে না পারিলে, বলক্রমে কারবে । অতএব কপটের সহিত কাপটা অবলম্বন না করিয়া দর্প করিয়া ভাল করেন নাই । তিনি ক্ষণেক চিন্তা করিয়া কহিলেন, “যে আজ্ঞা । আমি আজ্ঞানুবর্তী হইব ।”

বখ্তিয়ারও তাঁহার মনের ভাব বুঝিলেন । বখ্তিয়ার যদি পশুপতির অপেক্ষা চতুর না হইতেন, তবে এত সহজে গোড়জয় করিতে পারিতেন না । বঙ্গভূমির অদৃষ্টলিপি এই যে, এ ভূমি যুদ্ধে জিত হইবে না ; চাতুর্য্যেই ইহার জয় । চতুর ক্লাইব সাহেব ইহার দ্বিতীয় পরিচয়স্থান ।

বখ্তিয়ার কহিলেন, “ভাল, ভাল । আজ আমাদের শুভ দিন । এরূপ কার্য্যে বিলম্বের প্রয়োজন নাই । আমাদের পুরোহিত উপস্থিত, এখনই আপনাকে ইসলামের ধর্মে দীক্ষিত করিবেন ।”

পশুপতি দেখিলেন, সর্বনাশ ! বলিলেন, “একবার মাত্র অবকাশ দিউন, পরিবারগণকে লইয়া আসি, সপরিবারে একেবারে দীক্ষিত হইব ।”

বখ্তিয়ার কহিলেন, “আমি তাঁহাদিগকে আনিতে লোক পাঠাইতেছি । আপনি এই প্রহরীর সঙ্গে গিয়া বিশ্রাম করুন ।”

প্রহরী আসিয়া পশুপতিকে ধরিল । পশুপতি ক্রুদ্ধ হইয়া কহিলেন, “সে কি ? আমি কি বন্দী হইলাম ?”

বখ্তিয়ার কহিলেন, “আপাততঃ তাহাই বটে !”

পশুপতি রাজপুরীমধ্যে নিরুদ্ধ হইলেন । উর্নাতের জাল ছিঁড়িল — সে জালে কেবল সে স্বয়ং জড়িত হইল ।

আমরা পাঠক মহাশয়ের নিকট পশুপতিকে বুদ্ধিমান বলিয়া পরিচিত

করিয়াছি। পাঠক মহাশয় বলিবেন, যে ব্যক্তি শত্রুকে এতদূর বিশ্বাস করিল, সহায়হীন হইয়া তাহাদিগের অধিকৃত পুরীমধ্যে প্রবেশ করিল, তাহার চতুরতা কোথায়? কিন্তু বিশ্বাস না করিয়া কি করেন। এ বিশ্বাস না করিলে যুদ্ধ করিতে হয়। উর্নভ জাল পাতে, যুদ্ধ করে না।

সেই দিন রাত্রিকালে মহাবন হইতে বিংশতি সহস্র যবন আসিয়া নবদ্বীপ প্লাবিত করিল। নবদ্বীপ-জয় সম্পন্ন হইল। যে সূর্য্য সেই দিন অস্তে গিয়াছে, আর তাহার উদয় হইল না। আর কি উদয় হইবে না? উদয় অস্ত উভয়ই ত স্বাভাবিক নিয়ম!

ষষ্ঠ পরিচ্ছেদ : পিঞ্জর ভাঙ্গিল

যতক্ষণ পশুপতি গৃহে ছিলেন, ততক্ষণ তিনি মনোরমাকে নয়নে নয়নে রাখিয়াছিলেন। যখন তিনি যবনদর্শনে গেলেন, তখন তিনি গৃহের সকল দ্বার রুদ্ধ করিয়া শাস্ত্রশীলকে গৃহরক্ষায় রাখিয়া গেলেন।

পশুপতি যাইবামাত্র, মনোরমা পলায়নের উদ্যোগ করিতে লাগিল। গৃহের কক্ষে কক্ষে অনুসন্ধান করিতে লাগিল। পলায়নের উপযুক্ত কোন পথ মুক্ত দেখিল না। অতি উর্ধ্বে কতকগুলি গবাক ছিল; কিন্তু তাহা ছুরারোহণীয়; তাহার মধ্য দিয়া মনুশ্যশরীর নির্গত হইবার সম্ভাবনা ছিল না; আর তাহা ভূমি হইতে এত উচ্চ যে, তথা হইতে লক্ষ দিয়া ভূমিতে পড়িলে অস্থি চূর্ণ হইবার সম্ভাবনা। মনোরমা উন্মাদিনী; সেই গবাকপথেই নিষ্ক্রান্ত হইবার মানস করিল।

অতএব পশুপতি যাইবার ক্ষণকাল পরেই মনোরমা পশুপতির শয়্যাগৃহে পালঙ্কের উপর আরোহণ করিল। পালঙ্ক হইতে গবাক্কারোহণ সুলভ হইল। পালঙ্ক হইতে গবাক্ অবলম্বন করিয়া, মনোরমা গবাক্-রন্ধ্র দিয়া প্রথমে ছুই হস্ত, পশ্চাৎ মস্তক, পরে বক্ষ পর্য্যন্ত বাহির করিয়া দিল। গবাক্‌নিকটে উদ্ভানস্থ একটি আত্মবৃক্ষের ক্ষুদ্র শাখা দেখিল। মনোরমা তাহা ধারণ করিল; এবং তখন পশ্চাৎগ গবাক্ হইতে বহিষ্কৃত করিয়া, শাখাবলম্বনে ঝুলিতে লাগিল। কোমল শাখা তাহার ভরে নমিত হইল; তখন ভূমি তাহার চরণ হইতে অনতিদূরবর্তী হইল। মনোরমা

শাখা ত্যাগ করিয়া অবলীলাক্রমে ভূতলে পড়িল এবং তিলমাত্র অপেক্ষা না করিয়া জনার্দনের গৃহাভিমুখে চলিল ।

সপ্তম পরিচ্ছেদ : যবনবিপ্লব

সেই নিশীথে নবদ্বীপ নগর বিজয়োন্নত যবনসেনার নিষ্পীড়নে বাতাসস্থাড়িত তরঙ্গোৎক্ষেপী সাগর সদৃশ চঞ্চল হইয়া উঠিল । রাজপথ, ভূরি ভূরি অস্বারোহিগণে, ভূরি ভূরি পদাতিদলে, ভূরি ভূরি খড়্গী, ধামুকী, শূলিসমূহসমারোহে আচ্ছন্ন হইয়া গেল । সেনাবলহীন রাজধানীর নাগরিকেবা ভীত হইয়া গৃহমধ্যে প্রবেশ করিল ; দ্বার রুদ্ধ করিয়া সভয়ে ইষ্টনাম জপ করিতে লাগিল ।

যবনেরা রাজপথে যে ছুই একজন হতভাগ্য আশ্রয়হীন ব্যক্তিকে প্রাপ্ত হইল, তাহাদিগকে শূলবিদ্ধ করিয়া রুদ্ধদ্বার ভবন সকল আক্রমণ করিতে লাগিল । কোথায়ও বা দ্বার ভগ্ন করিয়া, কোথায়ও বা প্রাচীর উল্লঙ্ঘন করিয়া, কোথায়ও বা শঠতাপূর্বক ভীত গৃহস্থকে জীবনাশা দিয়া গৃহপ্রবেশ করিতে লাগিল । গৃহপ্রবেশ করিয়া, গৃহস্থের সর্বস্বাপহরণ, পশ্চাৎ স্ত্রীপুরুষ, বৃদ্ধ, বনিতা, বালক সকলেরই শিরশ্চেদ, ইহাই নিয়মপূর্বক করিতে লাগিল । কেবল যুবতীর পক্ষে দ্বিতীয় নিয়ম ।

শোণিতে গৃহস্থের গৃহ সকল প্লাবিত হইতে লাগিল । শোণিতে রাজপথ পঙ্কিল হইল । শোণিতে যবনসেনা রক্তচিত্রময় হইল । অপহৃত দ্রব্যজাতের ভারে অশ্বের পৃষ্ঠ এবং মনুষ্যের স্কন্ধ পীড়িত হইতে লাগিল । শূলাগ্রে বিদ্ধ হইয়া ব্রাহ্মণের মুণ্ড সকল ভীষণভাবে ব্যক্ত করিতে লাগিল । ব্রাহ্মণের যজ্ঞোপবীত অশ্বের গলদেশে ছুলিতে লাগিল । সিংহাসনস্থ শালগ্রামশিলাসকল যবন-পদাঘাতে গড়াইতে লাগিল ।

ভয়ানক শব্দে নৈশাকাশ পরিপূর্ণ হইতে লাগিল । অশ্বের পদধ্বনি, সৈনিকের কোলাহল, হস্তীর ঝংহিত, যবনের জয়শব্দ, তছুপরি পীড়িতের আর্দ্রনাদ । মাতার রোদন, শিশুর রোদন ; বৃদ্ধের করুণাকাঙ্ক্ষা, যুবতীর কণ্ঠবিদার ।

যে বীরপুরুষকে মাধবাচার্য্য এত যত্নে যবনদমনার্থ নবদ্বীপে লইয়া

আসিয়াছিলেন, এ সময়ে তিনি কোথা ?

এই ভয়ানক যবনপ্রলয়কালে, হেমচন্দ্র রণোন্মুখ নহেন। একাকী রণোন্মুখ হইয়া কি করিবেন ?

হেমচন্দ্র তখন আপন গৃহেব শয়নমন্দিরে, শয্যোপরি শয়ন করিয়া ছিলেন। নগরাতক্রমণের কোলাহল তাহার কর্ণে প্রবেশ করিল। তিনি দিগ্বিজয়কে জিজ্ঞাসা করিলেন, “কিসের শব্দ ?”

দিগ্বিজয় কহিল, “যবনসেনা নগর আক্রমণ করিয়াছে।”

হেমচন্দ্র চমৎকৃত হইলেন। তিনি এ পর্য্যন্ত বস্তুতিরাকর্ষক রাজপুত্রাধিদাব এবং রাজার পলায়নের বৃত্তান্ত শুনে নাই। দিগ্বিজয় তদ্বিষয়ে হেমচন্দ্রকে শুনাইল।

হেমচন্দ্র কহিলেন, “নাগরিকেরা কি করিতেছে ?”

দি। যে পারিতেছে পলায়ন করিতেছে, যে না পারিতেছে সে প্রাণ হারাইতেছে।

হে। আর গোড়ীয় সেনা ?

দি। কাহার জন্ত যুদ্ধ করবে ? রাজা ত পলাতক। সুতরাং তাহারা আপন আপন পথ দেখিতেছে।

হে। আমার অশ্বসজ্জা কব।

দিগ্বিজয় বিস্মিত হইল, জিজ্ঞাসা করিল, “কোথায় যাইবেন ?”

হে। নগরে।

দি। একাকী ?

হেমচন্দ্র ক্রকুটি করিলেন। ক্রকুটি দেখিয়া দিগ্বিজয় ভীত হইয়া অশ্বসজ্জা করিতে গেল।

হেমচন্দ্র তখন মহামূল্য রণসজ্জায় সজ্জিত হইয়া সুন্দর অশ্বপৃষ্ঠে আরোহণ করিলেন এবং ভীষণ শূলহস্তে নিৰ্বরিণীপ্রেরিত জলবিম্ববৎ সেই অসীম যবন-সেনা-সমুদ্রে বাঁপ দিলেন।

হেমচন্দ্র দেখিলেন, যবনসেনা যুদ্ধ করিতেছে না, কেবল অপহরণ করিতেছে। যুদ্ধজন্ত কেহই তাহাদিগের সম্মুখীন হয় নাই, সুতরাং যুদ্ধে তাহাদিগেরও মন ছিল না। তাহাদিগের অপহরণ করিতেছিল,

তাহাদিগকেই অপহরণকালে বিনা যুদ্ধে মারিতেছিল। সুতরাং যবনেরা দলবদ্ধ হইয়া হেমচন্দ্রকে নষ্ট করিবার কোন উদ্যোগ করিল না। যে কোন যবন তৎকর্তৃক আক্রান্ত হইয়া তাঁহার সহিত একা যুদ্ধোত্তম করিল, সে তৎক্ষণাৎ মবিল।

হেমচন্দ্র বিবল হইলেন। তিনি যুদ্ধাঙ্গণায় আসিয়াছিলেন, কিন্তু যবনেবা পূর্বেই বিজয়লাভ কবিয়াছে, অর্থাৎগ্রহে তাগ করিয়া তাঁহার সহিত বাতমত যুদ্ধ কবিল না। তিনি মনে মনে ভাবিলেন, “একটি একটি করিয়া গাছের পাতা ছিঁড়িয়া কে অরণ্যকে নিম্পত্র কবিত্তে পাবে? একটি একটি যবন মারিয়া কি কবিব? যবন যুদ্ধ করিতেছে না— যবনবধেই বা কি সুখ। ববং গৃহীদেব বক্ষ্যে সাহায্যে মন দেওয়া ভাল।” হেমচন্দ্র তাহাই কবিত্তে লাগিলেন, কিন্তু বিশেষ কৃতকার্য্য হইতে পারিলেন না। ছুইজন যবন তাঁহার সহিত যুদ্ধ কবে, অপর যবনে সেই অবসরে গৃহস্থদিগেব সর্ব্বশাস্ত কবিয়া চলিয়া যায়। যাহাই হউক, হেমচন্দ্র যথাসাধ্য পীড়িতের উপকার করিতে লাগিলেন। পথদার্শ্বে এক কুটারমধ্য হইতে হেমচন্দ্র আর্দ্রনাদ শ্রবণ করিলেন। যবনকর্তৃক আক্রান্ত ব্যক্তির আর্দ্রনাদ বিবেচনা করিয়া হেমচন্দ্র গৃহমধ্যে প্রবেশ করিলেন।

দেখিলেন গৃহমধ্যে যবন নাই। কিন্তু গৃহমধ্যে যবনদৌরাশ্রয়ার চিহ্নসকল বিদ্যমান রহিয়াছে। দ্রব্যাদি প্রায় কিছুই নাই, যাহা আছে তাহার ভগ্নাবস্থা; আর, এক ব্রাহ্মণ আহত অবস্থায় ভূমে পড়িয়া আর্দ্রনাদ করিতেছে। সে এ প্রকার গুরুতর আঘাত প্রাপ্ত হইয়াছে যে, মৃত্যু আসন্ন। হেমচন্দ্রকে দেখিয়া সে যবনভ্রমে কহিতে লাগিল, “আইস—প্রহার কর—শীঘ্র মরিব—মার—আমার মাথা লইয়া সেই রাক্ষসীকে দিও—আঃ—প্রাণ যায়—জল! জল! কে জল দিবে!”

হেমচন্দ্র কহিলেন, “তোমার ঘরে জল আছে?”

ব্রাহ্মণ কাতরোক্তিতে কহিতে লাগিল, “জানি না—মনে হয় না— জল! জল! পিশাচী!—সেই পিশাচীর জন্ত প্রাণ গেল!”

হেমচন্দ্র কুটারমধ্যে অন্বেষণ করিয়া দেখিলেন, এক কলসে জল আছে। পাত্রাভাবে পত্রপুটে তাহাকে জলদান করিলেন। ব্রাহ্মণ

কহিল, “না!—না! জল খাইব না! যবনের জল খাইব না!”
হেমচন্দ্র কহিলেন, “আমি যবন নহি, আমি হিন্দু, আমার হাতের জল
পান করিতে পার। আমার কথায় বুঝিতে পারিতেছ না?”

ব্রাহ্মণ জল পান করিল। হেমচন্দ্র কহিলেন, “তোমার আর কি
উপকার করিব?”

ব্রাহ্মণ কহিল, “আর কি করিবে? আর কি? আমি মরি! মরি!
যে মরে তাহার কি করিবে?”

হেমচন্দ্র কহিলেন, “তোমার কেহ আছে? তাহাকে তোমার নিকট
রাখিয়া যাইব?”

ব্রাহ্মণ কহিল, “আর কে—কে আছে? ঢের আছে। তার মধ্যে
সেই রাক্ষসী! সেই রাক্ষসী—তাহাকে—বলিও—বলিও আমার অপ—
অপরাধের প্রতিশোধ হইয়াছে।”

হেমচন্দ্র। কে সে? কাহাকে বলিব?

ব্রাহ্মণ কহিতে লাগিল, “কে সে পিশাচী! পিশাচী চেন না?
পিশাচী মৃগালিনী—মৃগালিনী! মৃগালিনী—পিশাচী!”

ব্রাহ্মণ অধিকতর আর্জুনাদ করিতে লাগিল। হেমচন্দ্র মৃগালিনীর
নাম শুনিয়া চমকিত হইলেন। জিজ্ঞাসা করিলেন, “মৃগালিনী তোমার
কে হয়?”

ব্রাহ্মণ কহিলেন, “মৃগালিনী কে হয়? কেহ না—আমার যম।”

হেমচন্দ্র। মৃগালিনী তোমার কি করিয়াছে?

ব্রাহ্মণ। কি করিয়াছে?—কিছু না—আমি—আমি তার হৃদশা
করিয়াছি, তাহার প্রতিশোধ হইল—

হেমচন্দ্র। কি হৃদশা করিয়াছ?

ব্রাহ্মণ। আর কথা কহিতে পারি না, জল দাও।

হেমচন্দ্র পুনর্বার তাহাকে জলপান করাইলেন। ব্রাহ্মণ জলপান করিয়া
স্থির হইলে হেমচন্দ্র তাহাকে জিজ্ঞাসা করিলেন, “তোমার নাম কি?”

ব্রা। ব্যোমকেশ।

হেমচন্দ্রের চক্ষু হইতে অগ্নিস্ফুলিঙ্গ নির্গত হইল। দস্তে অধর দংশন

করিলেন। করস্থ শূল দৃঢ়তর মুষ্টিবদ্ধ করিয়া ধারলেন। আবার তখনহ
শাস্ত হইয়া কহিলেন, “তোমার নিবাস কোথা ?”

ব্রা। গোড়—গোড় জ্ঞান না? মৃগালিনী আমাদের বাড়ীতে
ধাক্কিত।

হে। তার পর ?

ব্রা। তার পর—তার পর আর কি ? তার পর আমাব এই দশা
—মৃগালিনী পাপিষ্ঠা ; বড় নির্দয়—আমার প্রতি ফিরিয়াও চাহিল না।
রাগ করিয়া আমার পিতার নিকট আমি তাহার নামে মিছা কলঙ্ক
রটাইলাম, পিতা তাহাকে বিনাদোষে তাড়াইয়া দিলেন। রাক্ষসী—
রাক্ষসী আমাদের ছেড়ে গেল।

হে। তবে তুমি তাহাকে গালি দিতেছ কেন ?

ব্রা। কেন ?—কেন ? গালি—গালি দিই ? মৃগালিনী আমাকে
ফিরিয়া দেখিত না—আমি—আমি তাহাকে দেখিয়া জীবন—জীবন
ধারণ কবিতাম। সে চলিয়া আসিল, সেই—সেই অবধি আমার সর্বস্ব
ত্যাগ, তাহার জন্ম কোন্ দেশে—কোন্ দেশে না গিয়াছি—কোথায়
পিশাচীর সন্ধান না করিয়াছি ? গিরিজায়া—ভিখারীর মেয়ে—তার
আয়ি বলিয়া দিল—নবদ্বীপে আসিয়াছে—নবদ্বীপে আসিলাম, সন্ধান
নাই। যবন—যবন-হস্তে মরিলাম, রাক্ষসীর জন্ম মরিলাম—দেখা হইলে
বলিও—আমাব পাপেব ফল ফলিল।

আর ব্যোমকেশের কথা সরিল না। সে পরিশ্রমে একেবারে
নিজ্জীব হইয়া পড়িল। নির্বাকোন্মুখ দীপ নিবিল ! ক্ষণপবে বিকট
মুখভঙ্গী করিয়া ব্যোমকেশ প্রাণত্যাগ করিল।

হেমচন্দ্র আর দাঁড়াইলেন না। আর যবন বধ করিলেন না—কোন
মতে পথ করিয়া গৃহাভিমুখে চলিলেন।

অষ্টম পরিচ্ছেদ : মৃগালিনীর স্মৃতি কি ?

যেখানে হেমচন্দ্র তাঁহাকে সোপানপ্রস্তরাঘাতে ব্যথিত করিয়া রাখিয়া
গিয়াছিলেন—মৃগালিনী এখনও সেইখানে। পৃথিবীতে যাইবার আর

ছন্দাছন্দা না—সবত্র সমান হঠয়াঁছিল। নিশা প্রভাত হইল, গিরিজায়া যত কিছু বলিলেন—মৃগালিনী কোন উত্তর দিলেন না, অখোবদনে বসিয়া রহিলেন। স্নানাহারের সময় উপস্থিত হইল—গিরিজায়া তাঁহাকে জলে নামাইয়া স্নান করাইল। স্নান করিয়া মৃগালিনী আর্দ্রবসনে সেই স্থানে বসিয়া রহিলেন। গিরিজায়া স্বয়ং ক্ষুধাতুরা হইল—কিন্তু গিরিজায়া মৃগালিনীকে উঠাইতে পারিল না—সাহস করিয়া বার বার বলিতেও পারিল না। সুতরাং নিকটস্থ বন হইতে কিঞ্চিৎ ফলমূল সংগ্রহ করিয়া ভোজনজন্তু মৃগালিনীকে দিল। মৃগালিনী তাহা স্পর্শ করিলেন মাত্র। প্রসাদ গিরিজায়া ভোজন করিল—ক্ষুধার অনুরোধে মৃগালিনীকে ত্যাগ করিল না।

এইরূপে পূর্বাচলের সূর্য্য মধ্যাকাশে, মধ্যাকাশের সূর্য্য পশ্চিমে গেলেন। সন্ধ্যা হইল। গিরিজায়া দেখিলেন যে, তখনও মৃগালিনী গৃহে প্রত্যাগমন করিবার লক্ষণ প্রকাশ করিতেছেন না। গিরিজায়া বিশেষ চঞ্চলা হইলেন। পূর্ব্বরাত্রে জাগরণ গিয়াছে—এ রাত্রেও জাগরণের আকার। গিরিজায়া কিছু বলিল না—বৃক্ষপল্লব সংগ্রহ করিয়া সোপানোপরি আপন শয্যা রচনা করিল। মৃগালিনী তাহার অভিপ্ৰায় বুঝিয়া কহিলেন, “তুমি ঘরে গিয়া শোও।”

গিরিজায়া মৃগালিনীর কথা শুনিয়া আনন্দিত হইল। বলিল, “একত্র যাইব।”

মৃগালিনী বলিলেন, “আমি যাঈতেছি।”

গি। আমি তত্তক্ষণ অপেক্ষা করিব। ভিখারিণী ছুই দণ্ড পাতা পাতিয়া শুইলে ক্ষতি কি? কিন্তু সাহস পাঠ ত বলি—রাজপুত্রের সহিত এ জন্মের মত সম্বন্ধ ঘুচিল—তবে আর কার্ত্তিকের হিমে আমরা কষ্ট পাঠ কেন?

মৃ। গিরিজায়া—হেমচন্দ্রের সহিত এ জন্মে আমার সম্বন্ধ ঘুচিবে না। আমি কালিও হেমচন্দ্রের দাসী ছিলাম—আজিও তাঁহার দাসী।

গিরিজায়ার বড় রাগ হইল—সে উঠিয়া বসিল। বলিল, “কি ঠাকুরাণী! তুমি এখনও বল—তুমি সেই পাষণ্ডের দাসী! তুমি যদি

তঁাহার দাসী—তবে আমি চলিলাম—আমার এখানে আর প্রয়োজন
নাই ।”

যু। গিরিজায়া—যদি হেমচন্দ্র তোমাকে পীড়ন করিয়া থাকেন,
তুমি স্থানান্তরে তঁার নিন্দা করিও । হেমচন্দ্র আমার প্রতি কোন
অত্যাচার করেন নাই—আমি কেন তঁাহার নিন্দা সহিব ? তিনি রাজপুত্র
—আমার স্বামী ; তঁাহাকে পাষণ্ড বলিও না ।

গিবিজায়া আবও রাগ কবিল । বহুযত্নবচিত পৰ্ণশয্যা ছিন্ন ভিন্ন
করিয়া ফেলিয়া দিতে লাগিল । কহিল, “পাষণ্ড বলিব না ?—একবার
বলিব ?” (বলিয়াই কতকগুলি শয্যাবিছাসের পল্লব সদর্পে জলে
ফেলিয়া দিল) “একবার বলিব ?—দশবার বলিব” (আবার পল্লব
নিষ্ক্ষেপ)—“শতবার বলিব” (পল্লব নিষ্ক্ষেপ)—“হাজ্জাববার বলিব ।”
এইরূপে সকল পল্লব জলে গেল । গিবিজায়া বলিতে লাগিল, “পাষণ্ড
বলিব না ? কি দোষে তোমাকে তিনি এত ভিবস্কাব কবিলেন ?”

যু। সে আমারই দোষ—আমি গুছাইয়া সকল কথা তঁাহাকে
বলিতে পারি নাই—কি বলিতে কি বলিলাম ।

গি। ঠাকুরাণী ! আমার কপাল টিপিয়া দেখ ।

মৃণালিনী ললাট স্পর্শ করিলেন ।

গি। কি দেখিলে ?

যু। বেদনা ।

গি। কেন হইল ?

যু। মনে নাই ।

গি। তুমি হেমচন্দ্রের অঙ্গে মাথা বাখিয়াছিলে—তিনি ফেলিয়া দিয়া
গিয়াছেন । পাতবে পড়িয়া তোমাব মাথায় লাগিয়াছে ।

মৃণালিনী ক্ষণেক চিন্তা করিয়া দেখিলেন—কিছু মনে পড়িল না ।
বলিলেন, “মনে হয় না ; বোধ হয়, আমি আপনি পড়িয়া গিয়া থাকিব ।”

গিরিজায়া বিস্মৃত হইল । বলিল, “ঠাকুরাণী ! এ সংসারে আপনি
সুখী ।”

যু। কেন ?

লাগিলেন। দেখিলেন যে, হেমচন্দ্র একাকী সর্বসময়ে বিজয়ী হইয়াছেন। মুণালিনী যেন বিজয়ী বীরকে দেখিতে রাজপথে দাঁড়াইয়াছিলেন। রাজপথে হেমচন্দ্রের অগ্রে, পশ্চাৎ, কত হস্তী, অশ্ব, পদাতি যাইতেছে। মুণালিনীকে যেন সেই সেনাতরঙ্গ ফেলিয়া দিয়া চরণদলিত করিয়া চলিয়া গেল—তখন হেমচন্দ্র নিজ সৈন্যবী তুরঙ্গী হইতে অবতরণ করিয়া তাঁহাকে হস্ত ধরিয়া উঠাইলেন। তিনি যেন হেমচন্দ্রকে বলিলেন, “প্রভু! অনেক যন্ত্রণা পাঠিয়াছি; দাসীকে আর ত্যাগ করিও না।” হেমচন্দ্র যেন বলিলেন, “আর কখন তোমায় ত্যাগ করিব না।” সেই কণ্ঠস্ববে যেন—

তাঁহার নিদ্রাভঙ্গ হইল, “আব কখনও তোমায় ত্যাগ করিব না” জাগ্রতেও এই কথা শুনিলেন। চক্ষু উন্মীলন করিলেন—কি দেখিলেন? যাহা দেখিলেন, তাহা বিশ্বাস হইল না। আবার দেখিলেন, সত্য। হেমচন্দ্র সম্মুখে—হেমচন্দ্র বলিতেছেন—“আর একবার ক্ষমা কর—আর কখনও তোমায় ত্যাগ করিব না।

নিরভিমানিনী, নির্লজ্জা মুণালিনী আবার তাঁহার কণ্ঠলগ্না হইয়া স্কন্ধে মস্তক রক্ষা কবিলেন।

দশম পরিচ্ছেদ : প্রেম—মায়া প্রকার

আনন্দাশ্রুপ্লাবিত-বদনা মুণালিনীকে হেমচন্দ্র হস্তে ধরিয়া উপবন-গৃহাভিমুখে লইয়া চলিলেন। হেমচন্দ্র মুণালিনীকে একবার অপমানিতা, তিরস্কৃত, ব্যথিতা করিয়া ত্যাগ করিয়া গিয়াছিলেন, আবার আপনি আসিয়াই তাঁহাকে হৃদয়ে গ্রহণ করিলেন,—ইহা দেখিয়া গিরিজায়া বিশ্বিতা হইল, কিন্তু মুণালিনী একটি কথাও জিজ্ঞাসা করিলেন না, একটি কথাও কহিলেন না। আনন্দপরিপ্লববিবশা হইয়া বসনে অশ্রুস্রুতি আবৃত করিয়া চলিলেন। গিরিজায়াকে ডাকিতে হইল না—সে স্বয়ং অন্তরে থাকিয়া সঙ্গে সঙ্গে চলিল।

উপবনবাটিকায় মুণালিনী আসিলে, তখন উভয়ে বহুদিনের হৃদয়ের কথা সকল ব্যক্ত করিতে লাগিলেন। তখন হেমচন্দ্র, যে যে ঘটনায়

মৃগালিনীর প্রতি তাঁহার চিন্তের বিরাগ হইয়াছিল আর যে যে কারণে সেই বিরাগের ধ্বংস হইয়াছিল, তাহা বলিলেন। তখন মৃগালিনী যে প্রকারে হৃদয়বিশেষের গৃহ ত্যাগ করিয়াছিলেন, যে প্রকারে নবদ্বীপে আসিয়াছিলেন, সেই সকল বলিলেন। তখন উভয়েই হৃদয়ের পূর্বেদিত কত ভাব পরস্পরের নিকট ব্যক্ত করিতে লাগিলেন। তখন উভয়েই কত ভবিষ্যৎসম্বন্ধে কল্পনা করিতে লাগিলেন ; তখন কতই নূতন নূতন প্রতিজ্ঞায় বদ্ধ হইতে লাগিলেন। তখন উভয়ে নিতান্ত নিস্প্রয়োজন কত কথাই অতি প্রয়োজনীয় কথার স্থায় আগ্রহ সহকারে ব্যক্ত করিতে লাগিলেন। তখন কতবার উভয়ে মোক্ষানুখ অশ্রুজল কষ্টে নিবারিত করিলেন। তখন কতবার উভয়ের মুখপ্রতি চাহিয়া অনর্থক মধুর হাসি হাসিলেন ; সে হাসির অর্থ “আমি এখন কত সুখী !” পরে যখন প্রভাতোদয়সূচক পক্ষিগণ রব করিয়া উঠিল, তখন কতবার উভয়েই বিস্মিত হইয়া ভাবিলেন যে, আজি এখনই রাত্রি পোহাইল কেন ? —আর সেই নগরमध्ये যবনবিপ্লবের যে কোলাহল উচ্ছ্বসিত সমুদ্রের বীচি-রববৎ উঠিতেছিল—আজ হৃদয়সাগরের তরঙ্গরবে সে রব ডুবিয়া গেল।

উপবন-গৃহে আর এক স্থানে আর একটা কাণ্ড হইয়াছিল। দিগ্বিজয় প্রভুব আজ্ঞামত রাত্রি জাগরণ করিয়া গৃহরক্ষা করিতেছিল, মৃগালিনীকে লইয়া যখন হেমচন্দ্র আইসেন, তখন সে দেখিয়া চিনিল। মৃগালিনী তাহার নিকট অপরিচিতা ছিলেন না—যে কারণে পরিচিতা ছিলেন, তাহা ক্রমে প্রকাশ পাইতেছে। মৃগালিনীকে দেখিয়া দিগ্বিজয় কিছু বিস্মিত হইল, কিন্তু জিজ্ঞাসা সম্ভাবনা নাই, কি করে ? ক্ষণেক পরে গিরিজায়াও আসিল দেখিয়া দিগ্বিজয় মনে ভাবিল, “বুঝিয়াছি—ইহারা দুই জন গোড় হইতে আমাদের গর দুই জনকে দেখিতে আসিয়াছে। ঠাকুরাণী যুবরাজকে দেখিতে আসিয়াছেন, আর এটা আমাকে দেখিতে আসিয়াছে সন্দেহ নাই।” এই ভাবিয়া দিগ্বিজয় একবার আপনার গৌপদাড়ি চুমরিয়া লইল এবং ভাবিল, “না হবে কেন ?” আবার ভাবিল, “এটা কিন্তু বড়ই নষ্ট—এক দিনের তরে কই আমাকে ভাল:

কথা বলে নাই—কেবল আমাকে গালিই দেয়—তবে ও আমাকে দেখিতে আসিবে, তাহার সম্ভাবনা কি ? যাহা হউক, একটা পরীক্ষা করিয়া দেখা যাউক । রাত্রি ত শেষ হইল—প্রভুও ফিরিয়া আসিয়াছেন ; এখন আমি পাশ কাটিয়া একটুকু শুই । দোখ, পিয়ারী আমাকে খুঁজিয়া নেয় কি না ?” ইহা ভাবিয়া দিগ্বিজয় এক নিভৃত স্থানে গিয়া শয়ন করিল । গিরিজায়া তাহা দেখিল ।

গিরিজায়া তখন মনে মনে বলিতে লাগিল, “আমি ত মৃণালিনীর দাসী—মৃণালিনী এ গৃহেব কর্ত্রী হইলেন অথবা হইবেন—তবে ত বাড়ীর গৃহকৰ্ম্ম করিবার অধিকার আমারই ।” এইরূপ মনকে প্রবোধ দিয়া গিরিজায়া একগাছা ঝাঁটা সংগ্রহ কবিল এবং যে ঘরে দিগ্বিজয় শয়ন করিয়া আছে, সেই ঘরে প্রবেশ করিল । দিগ্বিজয় চক্ষু বুজিয়া আছে, পদধ্বনিতে বুঝিল যে, গিরিজায়া আসিল—মনে বড় আনন্দ হইল—তবে ত গিরিজায়া তাহাকে ভালবাসে । দেখি, গিরিজায়া কি বলে ? এই ভাবিয়া দিগ্বিজয় চক্ষু বুজিয়াই রহিল । অকস্মাৎ তাহার পৃষ্ঠে ছুম্ দাম্ করিয়া ঝাঁটার ঘা পড়িতে লাগিল । গিরিজায়া গলা ছাড়িয়া বলিতে লাগিল, “আঃ মলো, ঘরগুলোয় ময়লা জমিয়া রহিয়াছে দেখ—একি ? এক মিলে ! চোর না কি ? মলো মিলে, রাজার ঘরে চুরি !” এই বলিয়া আবার সম্মার্জ্জনীর আঘাত । দিগ্বিজয়ের পিট ফাটিয়া গেল ।

“ও গিরিজায়া, আমি ! আমি !”

“আমি ! আরে তুই বলিয়াই ত খাঙ্গরা দিয়া বিছাইয়া দিতেছি ।” এই বলিবার পর আবার বিরালী সিক্কা ওজনে ঝাঁটা পাড়তে লাগিল ।

“দোহাই ! দোহাই ! গিরিজায়া ! আমি দিগ্বিজয় !”

“আবার চুবি করিতে এসে—আমি দিগ্বিজয় ! দিগ্বিজয় কে রে মিলে !”—ঝাঁটার বেগ আর থামে না ।

দিগ্বিজয় এবার সকাতরে কহিল, “গিরিজায়া, আমাকে ভুলিয়া গেলে ?”

গিরিজায়া বলিল, “তোমার আমার সঙ্গে কোন্ পুরুষে আলাপ রে মিলে ?”

দিঘিজয় দেখিল নিস্তার নাই—রণে ভঙ্গ দেওয়াই পরামর্শ ।
 দিঘিজয় তখন অনুপায় দেখিয়া উর্দ্ধন্বাসে গৃহ হইতে পলায়ন করিল ।
 গিরিজায়া সম্ভার্জনী হস্তে তাহার পশ্চাৎ পশ্চাৎ ধাবিত হইল ।

একাংশ পরিচ্ছেদ : পূর্ব পরিচয়

প্রভাতে হেমচন্দ্র মাধবাচার্য্যের অনুসন্ধানে যাত্রা করিলেন ।
 গিরিজায়া আসিয়া মৃগালিনীর নিকট বসিল ।

গিরিজায়া মৃগালিনীর দুঃখের ভাগিনী হইয়াছিল, সহৃদয় হইয়া
 দুঃখের সময় দুঃখের কাহিনী সকল শুনিয়াছিল । আজি সুখের দিনে সে
 কেন সুখের ভাগিনী না হইবে ? আজি সেইরূপ সহৃদয়তার সহিত
 সুখের কথা কেন না শুনিবে ? গিরিজায়া ভিখারিণী, মৃগালিনী মহাধনী
 কন্যা—উভয়ে এতদূর সামাজিক প্রভেদ । কিন্তু দুঃখের দিনে গিরিজায়া
 মৃগালিনীর একমাত্র সুহৃৎ, সে সময়ে ভিখারিণী আর রাজপুরুষভূতে প্রভেদ
 থাকে না ; আজি সেই বলে গিরিজায়া মৃগালিনীর হৃদয়ের সুখের
 অংশাধিকারিণী হইল ।

যে আলাপ হইতেছিল, তাহাতে গিরিজায়া বিস্মিত ও প্রীত
 হইতেছিল । সে মৃগালিনীকে জিজ্ঞাসা করিল, “তা এত দিন এমন কথা
 প্রকাশ কর নাই কি জন্ম ?”

মৃ । এত দিন রাজপুত্রের নিষেধ ছিল, এজন্ম প্রকাশ করি নাই ।
 এক্ষণে তিনি প্রকাশের অনুমতি করিয়াছেন, এজন্ম প্রকাশ করিতেছি ।

গি । ঠাকুরাণী ! সকল কথা বল না ? আমার শুনিয়া বড়
 তৃপ্তি হবে ।

তখন মৃগালিনী বলিতে আরম্ভ করিলেন, “আমার পিতা একজন
 বৌদ্ধমতাবলম্বী শ্রেষ্ঠী । তিনি অত্যন্ত ধনী ও মথুরারাজের প্রিয়পাত্র
 ছিলেন—মথুরার রাজকন্যার সহিত আমার সখিত্ব ছিল ।

“আমি একদিন মথুরায় রাজকন্যার সঙ্গে নৌকায় যমুনার জল-
 বিহারে গিয়াছিলাম । তথায় অকস্মাৎ প্রবল ঝড়বৃষ্টি আরম্ভ হওয়ায়,
 নৌকা জলমধ্যে ডুবিল । রাজকন্যা প্রভৃতি অনেকেই রক্ষক ও নাবিকদের

হাতে রক্ষা পাইলেন। আমি ভাসিয়া গেলাম। দৈবযোগে এক রাজপুত্র সেই সময়ে নৌকায় বেড়াইতেছিলেন। তাঁহাকে তখন চিনিতাম না— তিনিই হেমচন্দ্র। তিনিও বাতাসেব ভয়ে নৌকা তীরে লইতেছিলেন। জলমধ্যে আমার চুল দেখিতে পাইয়া স্বয়ং জলে পড়িয়া আমাকে উঠাইলেন। আমি তখন অজ্ঞান! হেমচন্দ্র আমার পরিচয় জানিতেন না। তিনি তখন তীর্থদর্শনে মথুরায় আসিয়াছিলেন। তাঁহার বাসায় আমায় লইয়া গিয়া শুশ্রূষা করিলেন। আমি জ্ঞান পাইলে, তিনি আমার পরিচয় লইয়া আমাকে আমার বাপের বাড়ী পাঠাইবার উত্তোগ করিলেন। কিন্তু তিন দিবস পর্য্যন্ত ঝড়বৃষ্টি থামিল না। একরূপ ছুঁদিন হইল যে, কেহ বাড়ীর বাহির হইতে পারে না। স্মৃতরাং তিন দিন আমাদিগের উভয়কে এক বাড়ীতে থাকিতে হইল। উভয়ে উভয়ের পরিচয় পাইলাম। কেবল কুল-পরিচয় নহে—উভয়েব অন্তঃকরণের পরিচয় পাইলাম। তখন আমার বয়স পনের বৎসর মাত্র। কিন্তু সেই বয়সেই আমি তাঁহার দাসী হইলাম। সে কোমল বয়সে সকল বুঝিতাম না। হেমচন্দ্রকে দেবতার স্তায় দেখিতে লাগিলেন। তিনি যাহা বলিতেন, তাহা পূবাণ বলিয়া বোধ হইতে লাগিল। তিনি বলিলেন, বিবাহ কর। স্মৃতরাং আমারও বোধ হইল, ইহা অবশ্য কর্তব্য। চতুর্থ দিবসে, ছুঁযোগের উপশম দেখিয়া উপবাস করিলাম; দিগ্বিজয় উত্তোগ করিয়া দিল। তীর্থপর্য্যটনে রাজপুত্রের কুলপুরোহিত সঙ্গে ছিলেন, তিনি আমাদিগের বিবাহ দিলেন।”

গি। কন্যা সম্প্রদান করিল কে ?

মৃ। অরুন্ধতী নামে আমার এক প্রাচীন কুটুম্ব ছিলেন। তিনি সম্বন্ধে মার ভাগিনী হইতেন। আমাকে বালককাল হইতে লালনপালন করিয়াছিলেন। তিনি আমাকে অত্যন্ত স্নেহ করিতেন; আমার সকল দোরাত্ম্য সহ করিতেন। আমি তাঁহার নাম করিলাম। দিগ্বিজয় কোন ছলে পুরমধ্যে তাঁহাকে সংবাদ পাঠাইয়া দিয়া ছলক্রমে হেমচন্দ্রের গৃহে তাঁহাকে ডাকিয়া আনিল। অরুন্ধতী মনে জানিতেন, আমি যমুনায় ডুবিয়া মরিয়াছি। তিনি আমাকে জীবিত দেখিয়া এতই আহলাদিভ

হইলেন যে, আর কোন কথাতেই অসন্তুষ্ট হইলেন না। আমি যাহা বলিলাম, তাহাতেই স্বীকৃত হইলেন। তিনিই কন্যা সম্প্রদান করিলেন। বিবাহের পর মাসীর সঙ্গে বাপের বাড়ী গেলাম। সকল সত্য বলিয়া কেবল বিবাহের কথা লুকাইলাম। আমি, হেমচন্দ্র, দিগ্বিজয়, কুল-পুরোহিত আর অরুন্ধতা মাসী ভিন্ন এ বিবাহ আর কেহ জানিত না। অল্প তুর্মা জ্ঞানিলে।

গি। মাধবাচার্য্য জানেন না ?

মু। না, তিনি জানিলে সর্বনাশ হইত। মগধরাজ তাহা হইলে অবশ্য শুনিতেন। আমার বাপ বৌদ্ধ, মগধরাজ বৌদ্ধের বিষম শত্রু।

গি। ভাল তোমার বাপ যদি তোমাকে এ পর্য্যন্ত কুমারী বলিয়া জানিতেন, তবে এত বয়সেও তোমার বিবাহ দেন নাই কেন ?

মু। বাপের দোষ নাই। তিনি অনেক যত্ন করিয়াছেন, কিন্তু বৌদ্ধ সুপাত্র পাওয়া সুকঠিন; কেন না, বৌদ্ধধর্ম্ম প্রায় লোপ হইয়াছে। পিতা বৌদ্ধ জামাতা চাহেন, অথচ সুপাত্রও চাহেন। এরূপ একটি পাওয়া গিয়াছিল, সে আমার বিবাহের পর। বিবাহের দিন স্থির হইয়া সকল উত্তোগও হইয়াছিল। কিন্তু আমি সেই সময়ে জ্বর করিয়া বসিলাম। পাত্র অল্পত্র বিবাহ করিল।

গি। ইচ্ছাপূর্ব্বক জ্বর করিয়াছিলে ?

মু। হাঁ, ইচ্ছাপূর্ব্বক। আমাদিগের উদ্যানে একটি কুয়া আছে, তাহার জল কেহ স্পর্শ করে না। তাহার পানে বা স্নানে নিশ্চিত জ্বর। আমি রাত্রিতে গোপনে সেই জলে স্নান করিয়াছিলাম।

গি। আবার সম্বন্ধ হইলে, সেইরূপ করিতে ?

মু। সন্দেহ কি ? নচেৎ হেমচন্দ্রের নিকট পলাইয়া যাইতাম।

গি। মথুরা হইতে মগধ এক মাসের পথ। জ্বীলোক হইয়া কাহার সহায়ে পলাইতে ?

মু। আমার সহিত সাক্ষাতের জন্ত হেমচন্দ্র মথুরায় এক দোকান করিয়া আপনি তথায় রত্নদাস বণিক বলিয়া পারচিত হইয়াছিলেন। বৎসরে একবার করিয়া তথায় বাণিজ্য করিতে আসিতেন। যখন তিনি

তথায় না থাকিতেন, তখন দিগ্বিজয় তথায় তাঁহার দোকান রাখিত ।
দিগ্বিজয়ের প্রতি আদেশ ছিল যে, যখন আমি যেরূপ আজ্ঞা করিব, সে
তখনই সেরূপ করিবে । সুতরাং আমি নিঃসহায় ছিলাম না ।

কথা সমাপ্ত হইলে গিরিজয়া বলিল, “ঠাকুরাণী ! আমি একটি
বড় গুরুতব অপবোধ করিয়াছি । আমাকে মার্জনা করিতে হইবে ।
আমি তাহার উপযুক্ত প্রায়শ্চিত্ত করিতে স্বীকৃত আছি ।”

মৃ । কি এমন গুরুতর কাজ করিলে ?

গি । দিগ্বিজয়টা তোমার হিতকারী, তাহা আমি জানিতাম না,
আমি জানতাম, এটা অতি অপদার্থ । এজন্য আমি প্রভাতে তাহাকে
ভালরূপে ঘা মেরে ছাড়া দিয়াছি । তা ভাল করি নাই ।

মৃগালিনী হাসিয়া বলিলেন, “তা কি প্রায়শ্চিত্ত করিবে ?”

গি । ভিখার মেয়ের কি বিবাহ হয় ?

মৃ । (হাসিয়া) করিলেই হয় ।

গি । তবে আমি সে অপদার্থটাকে বিবাহ করিব—আর কি করি ?
মৃগালিনী আবার হাসিয়া বলিলেন, “তবে আজি তোমার গায়ে
হলুদ দিব ।”

দ্বাদশ পরিচ্ছেদ : পরামর্শ

হেমচন্দ্র মাধবাচার্যের বসতিস্থলে উপস্থিত হইয়া দেখিলেন যে,
আচার্য্য জপে নিযুক্ত আছেন । হেমচন্দ্র প্রণাম করিয়া কহিলেন,
“আমাদিগের সকল যত্ন বিফল হইল । এখন ভূত্যের প্রতি আর কি
আদেশ করেন ? যখন গোড় অধিকার করিয়াছে । বুঝি, এ ভারতভূমি
অদৃষ্টে যবনের দাসত্ব বিধিলিপি ! নচেৎ বিনা বিবাদে যবনেরা গোড়জয়
করিল কি প্রকারে ? যদি এখন এই দেহ পতন করিলে, এক দিনের
তরেও জন্মভূমি দস্যুর হাত হইতে মুক্ত হয়, তবে এই ক্ষণে তাহা করিতে
প্রস্তুত আছি । সেই অভিপ্রায়ে রাত্রিতে যুদ্ধের আশায় নগরমধ্যে
অগ্রসর হইয়াছিলাম—কিন্তু যুদ্ধ শু দেখিলাম না । কেবল দেখিলাম
যে, এক পক্ষ আক্রমণ করিতেছে—অপর পক্ষ পলাইতেছে ”

মাধবাচার্য্য কহিলেন, “বৎস! চুঃখিত হইও না। দৈবনির্দেশ কখনও বিফল হইবার নহে। আমি যখন গণনা করিয়াছি যে, যবন পরাভূত হইবে, তখন নিশ্চয়ই জানিও, তাহারা পরাভূত হইবে। যবনেরা নবদ্বীপ অধিকার করিয়াছে বটে, কিন্তু নবদ্বীপ ত গোড় নহে। প্রধান রাজা সিংহাসন ত্যাগ করিয়া পলায়ন করিয়াছেন। কিন্তু এই গোড় রাজ্যে অনেক করপ্রদ রাজা আছেন ; তাঁহারা ত এখনও বিজিত হয়েন নাই। কে জানে যে, সকল রাজা এবত্র হইয়া প্রাণপণ করিলে, যবন বিজিত না হইবে ;”

হেমচন্দ্র কহিলেন, “তাহার অল্পই সম্ভাবনা।”

মাধবাচার্য্য কহিলেন, “জ্যোতিষী গণনা মিথ্যা হইবার নহে ; অবশ্য সফল হইবে। তবে আমার এক ভ্রম হইয়া থাকিবে। পূর্বদেশে যবন পরাভূত হইবে—ইহাতে আমরা নবদ্বীপেই যবন জয় করিবার প্রত্যাশা করিয়াছিলাম। কিন্তু গোড়রাজ্য ত প্রকৃত পূর্ব নহে—কামরূপই পূর্ব। বোধ হয়, তথায়ই আমাদের আশা ফলবতী হইবে।”

হে। কিন্তু এক্ষণে ত যবনের কামরূপ যাওয়ার কোন সম্ভাবনা দেখি না।

মা। এই যবনেরা ক্ষণকাল স্থির নহে। গোড়ে ইহারা স্তম্ভিত হইলেই কামরূপ আক্রমণ করিবে।

হে। তাহাও মানিলাম এবং ইহারা যে কামরূপ আক্রমণ করিলে পরাজিত হইবে, তাহাও মানিলাম। কিন্তু তাহা হইলে আমার পিতৃরাজ্য উদ্ধারের কি সত্বপায় হইল ?

মা। এই যবনেরা এ পর্য্যন্ত পুনঃপুনঃ জয়লাভ করিয়া অজেয় বলিয়া রাজগণমধ্যে প্রতিপন্ন হইয়াছে। ভয়ে কেহ তাহাদের বিরোধী হইতে চাহে না। তাহারা একবার মাত্র পরাজিত হইলে, তাহাদিগের সে মহিমা আর থাকিবে না। তখন ভারতবর্ষীয় তাবৎ আৰ্য্যবংশীয় রাজারা ধৃতান্ত হইয়া উঠিবেন। সকলে এক হইয়া অস্ত্রধারণ করিলে যবনেরা কত দিন তিষ্ঠিবে ?

হে। গুরুদেব ! আপনি আশামাত্রের আশ্রয় লইতেছেন ; আমিও।

তাহাই করিলাম । এক্ষণে আমি কি করিব—আজ্ঞা করুন ।

মা । আমিও তাহাই চিন্তা করিতেছিলাম । এ নগরমধ্যে তোমার আর অবস্থিতি করা অকর্তব্য ; কেন না, যবনেরা তোমার মৃত্যুসাধন সঙ্কল্প করিয়াছে । আমার আজ্ঞা—তুমি অত্ৰই এ নগর ত্যাগ করিবে ।

হে । কোথায় যাইব ?

মা । আমার সঙ্গে কামরূপ চল ।

হেমচন্দ্র অধোবদন হইয়া, অপ্রতিভ হইয়া, মূছ মূছ কহিলেন, “মৃগালিনীকে কোথায় রাখিয়া যাইবেন ?”

মাধবাচার্য্য বিস্মিত হইয়া কহিলেন, “সে কি ! আমি ভাবিতেছিলাম যে, তুমি কালিকার কথায় মৃগালিনীকে চিত্ত হইতে দূর করিয়াছিলে !”

হেমচন্দ্র পূর্বের গায় মূছভাবে বলিলেন, “মৃগালিনী অত্যাঙ্গ্যা । তিনি আমার পরিণীতা স্ত্রী ।”

মাধবাচার্য্য চমৎকৃত হইলেন । কষ্ট হইলেন । ক্ষোভ করিয়া কহিলেন, “আমি ইহার কিছু জ্ঞানিলাম না ?”

হেমচন্দ্র তখন আত্মোপাস্ত তাঁহার বিবাহের বৃত্তান্ত বিবৃত করিলেন । শুনিয়া মাধবাচার্য্য কিছুক্ষণ মৌন হইয়া রহিলেন । কহিলেন, “যে স্ত্রী অসদাচারিণী, সে ত শাস্ত্রানুসারে ত্যাঙ্গ্যা । মৃগালিনীর চরিত্রসম্বন্ধে যে সংশয়, তাহা কালি প্রকাশ করিয়াছি ।”

তখন হেমচন্দ্র ব্যোমকেশের বৃত্তান্ত সকল প্রকাশ করিয়া বলিলেন । শুনিয়া মাধবাচার্য্য আনন্দ প্রকাশ করিলেন । কহিলেন, “বৎস ! বড় প্রীত হইলাম । তোমার প্রিয়তমা এবং গুণবতী ভার্য্যাকে তোমার নিকট হইতে বিযুক্ত করিয়া তোমাকে অনেক ক্লেশ দিয়াছি । এক্ষণে আশীর্বাদ করিতেছি, তোমরা দীর্ঘজীবী হইয়া বহুকাল একত্র ধর্মাচরণ কর । যদি তুমি এক্ষণে সস্ত্রীক হইয়াছ, তবে তোমাকে আর আমি আমার সঙ্গে কামরূপ যাইতে অনুরোধ করি না । আমি অগ্রে যাইতেছি । যখন সময় বুঝিবেন, তখন তোমার নিকট কামরূপাধিপতি দূত প্রেরণ করিবেন । এক্ষণে তুমি বধুকে লইয়া মথুরায় গিয়া বাস কর—অথবা অত্র অভিপ্রেত স্থানে বাস করিও ।”

এইরূপ কথোপকথনের পর, হেমচন্দ্র মাধবাচার্যের নিকট বিদায় লইলেন। মাধবাচার্য আশীর্ব্বাদ, আলিঙ্গন করিয়া সাশ্রুলোচনে তাঁহাকে বিদায় করিলেন।

জঘোদশ পরিচ্ছেদ : মহম্মদ আলির প্রায়শ্চিত্ত

যে রাত্রে রাজধানী যবন-সেনা-বিপ্লবে পীড়িত হইতেছিল, সেই রাত্রে পশুপতি একাকী কারাগারে অবরুদ্ধ ছিলেন। নিশাবশেষে সেনা-বিপ্লব সমাপ্ত হইয়া গেল। মহম্মদ আলি তখন তাঁহার সম্ভাষণে আসিলেন। পশুপতি কহিলেন, “যবন!—প্রিয়-সম্ভাষণে আর আবশ্যকতা নাই। একবার তোমারই প্রিয়সম্ভাষণে বিশ্বাস করিয়া এই অবস্থাপন্ন হইয়াছি। বিধর্ম্মী যবনকে বিশ্বাস করিবার যে ফল, তাহা প্রাপ্ত হইয়াছি। এখন আমি মৃত্যু শ্রেয় বিবেচনা করিয়া অস্ত্র ভরসা ত্যাগ করিয়াছি। তোমাদিগের কোন প্রিয়সম্ভাষণ শুনিব না।”

মহম্মদ আলি কহিল, “আমি প্রভুর আজ্ঞা প্রতিপালন করি—প্রভুর আজ্ঞা প্রতিপালন করিতে আসিয়াছি। আপনাকে যবনবেশ পরিধান করিতে হইবে।”

পশুপতি কহিলেন, “সে বিষয়ে চিন্ত স্থির করুন। আমি এক্ষণে মৃত্যু স্থির করিয়াছি। প্রাণত্যাগ করিতে স্বীকৃত আছি—কিন্তু যবনধর্ম্ম অবলম্বন করিব না।”

ম। আপনাকে এক্ষণে যবনধর্ম্ম অবলম্বন করিতে বলিতেছি না। কেবল রাজপ্রতিনিধির তৃপ্তির জন্ত যবনের পোষাক পরিধান করিতে বলিতেছি।

প। ব্রাহ্মণ হইয়া কি জন্ত স্নেহের বেশ পরিব ?

ম। আপনি ইচ্ছাপূর্ব্বক না পরিলে, আপনাকে বলপূর্ব্বক পরাইব। অস্বীকারে লাভের ভাগ অপমান।

পশুপতি উত্তর করিলেন না। মহম্মদ আলি স্বহস্তে তাঁহাকে যবনবেশ পরাইলেন। কহিলেন, “আমার সঙ্গে আসুন।”

প। কোথায় যাইব ?

ম। আপনি বন্দী—জিজ্ঞাসার প্রয়োজন কি ?

মহম্মদ আলি তাঁহাকে সিংহদ্বারে লইয়া চলিলেন। যে ব্যক্তি পশুপতির রক্ষায় নিযুক্ত ছিল, সেও সঙ্গে সঙ্গে চলিল।

দ্বারে প্রহরিগণের জিজ্ঞাসামতে মহম্মদ আলি আপন পরিচয় দিলেন ; এক সঙ্কেত করিলেন। প্রহরিগণ তাঁহাদিগকে যাইতে দিল। সিংহদ্বার হইতে নিষ্ক্রান্ত হইয়া তিন জনে কিছু দূর রাজপথ অতিবাহিত করিলেন। তখন যবনসেনা নগরমস্থান সমাপন করিয়া বিশ্রাম কবিত্তেছিল ; সুতরাং রাজপথে আর উপদ্রব ছিল না। মহম্মদ আলি কহিলেন, “ধর্মাধিকার ! আপনি আমাকে বিনা দোষে তিরস্কার করিয়াছেন। বখ্তিয়ার খিলিজির এরূপ অভিপ্রায় আমি কিছুই অবগত ছিলাম না। তাহা হইলে আমি কদাচ প্রবঞ্চকের বার্তাবহ হইয়া আপনার নিকট যাইতাম না। যাহা হউক, আপনি আমাব কথায় প্রত্যয় করিয়া এরূপ দুর্দশাপন্ন হইয়াছেন, ইহার যথাসাধ্য প্রায়শ্চিত্ত করিলাম। গঙ্গাতীরে নৌকা প্রস্তুত আছে—আপনি যথেষ্ট স্থানে প্রস্থান করুন। আমি এইখান হইতে বিদায় হই।”

পশুপতি বিস্ময়াপন্ন হইয়া অবাক হইয়া রহিলেন। মহম্মদ আলি পুনরপি কহিতে লাগিলেন, “আপনি এই রাত্রিমধ্যে এ নগরী ত্যাগ করিবেন। নচেৎ কাল প্রাতে যবনের সহিত আপনার সাক্ষাৎ হইলে প্রমাদ ঘটবে। খিলিজির আজ্ঞার বিপরীত আচরণ করিলাম—ইহার সাক্ষী এই প্রহরী। সুতরাং আত্মরক্ষার জন্ত ইহাকেও দেশান্তরিত করিলাম। ইহাকেও আপনার নৌকায় লইয়া যাইবেন।”

এই বলিয়া মহম্মদ আলি বিদায় হইলেন। পশুপতি কিয়ৎকাল বিস্ময়াপন্ন হইয়া থাকিয়া গঙ্গাতীরে অভিমুখে চলিলেন।

চতুর্দশ পরিচ্ছেদ : ধাতুমুস্তির বিসর্জন

মহম্মদ আলির নিকট বিদায় হইয়া, রাজপথ অতিবাহিত করিয়া পশুপতি ধীরে ধীরে চলিলেন। ধীরে ধীরে চলিলেন—যবনের কারাগার হইতে বিমুক্ত হইয়াও দ্রুতপদক্ষেপে তাঁহার প্রবৃত্তি জম্মিল না।

রাজপথে যাহা দেখিলেন, তাহাতে আপনার মনোমধ্যে আপনি মরিলেন । তাঁহার প্রতি পদে মৃত নাগরিকের দেহ চরণে বাজিতে লাগিল ; প্রতি পদে শোণিতসিক্ত কর্দমে চরণ আর্দ্র হইতে লাগিল । পথের দুই পার্শ্বে গৃহাবলী জনশূন্য—বহুগৃহ ভস্মীভূত ; কোথাও বা তপ্ত অঙ্গার এখনও জ্বলিতেছিল । গৃহান্তরে দ্বার ভগ্ন—গবাক্ষ ভগ্ন—প্রকোষ্ঠ ভগ্ন—তছুপরি মৃতদেহ ! এখনও কোন হতভাগ্য মরণ-যজ্ঞণায় অমানুষিক কাতরস্বরে শব্দ করিতেছিল । এ সকলের মূল তিনিই । দারুণ লোভের বশবর্তী হইয়া তিনি এই রাজধানীকে শ্মশানভূমি করিয়াছেন । পশুপতি মনে মনে স্বীকার করিলেন যে, তিনি প্রাণদণ্ডের যোগ্য পাত্র বটে—কেন মহম্মদ আলিকে কলঙ্কিত করিয়া কারাগার হইতে পলায়ন করিলেন ? যবন তাঁহাকে ধৃত করুক—অভিপ্রেত শাস্তি প্রদান করুক—মনে করিলেন ফিরিয়া যাইবেন । মনে মনে তখন ইঈদেবীকে স্মরণ করিলেন—কিস্তি কি কামনা করিবেন ? কামনার বিষয় আর কিছুই নাই । আকাশ প্রতি চাহিলেন । গগনের নক্ষত্র-চন্দ্র-গ্রহমণ্ডলীবিভূষিত সহস্র পবিত্র শোভা তাঁহার চক্ষে সহিল না—তীব্র জ্যোতিঃসম্পীড়িতের ছায় চক্ষু মুদ্রিত করিলেন । সহসা অনৈসর্গিক ভয় আসিয়া তাঁহার হৃদয় আচ্ছন্ন করিল—অকারণ ভয়ে তিনি আর পদক্ষেপ করিতে পারিলেন না । সহসা বলহীন হইলেন । বিশ্রাম করিবার জন্ম পথিমধ্যে উপবেশন করিতে গিয়া দেখিলেন—এক শবাসনে উপবেশন করিতেছিলেন । শব-নিশ্চর রক্ত তাঁহার বসনে এবং অঙ্গে লাগিল । তিনি কণ্টকিতকলেবরে পুনরুত্থান করিলেন । আর দাঁড়াইলেন না—ঋতপদে চলিলেন । সহসা আর এক কথা মনে পড়িল—তাঁহার নিজবাটা ? তাহা কি যবনহস্তে রক্ষা পাইয়াছে ? আর সে বাটাতে যে কুসুমময়ী প্রাণ-পুত্তলিকে লুকাইয়া রাখিয়াছিলেন, তাহার কি হইয়াছে ? মনোরমার কি দশা হইয়াছে ? তাঁহার প্রাণাধিকা, তাঁহাকে পাপপথ হইতে পুনঃ পুনঃ নিবারণ করিয়াছিল, সেও বুঝি তাঁহার পাপসাগরের তরঙ্গে ডুবিয়াছে । এ যবনসেনাপ্রবাহে সে কুসুমকলিকা না জানি কোথায় ভাসিয়া গিয়াছে !

পশুপতি উদ্ভয়ের ছায় আপনি ভবনাভিমুখে ছুটিলেন । আপনার

ভবনসম্মুখে উপস্থিত হইলেন । দেখিলেন, যাহা ভাবিয়াছিলেন, তাহাই ঘটিয়াছে—জ্বলন্ত পর্বতের ন্যায় তাঁহার উচ্চচূড় অট্টালিকা অগ্নিময় হইয়া জ্বলিতেছে ।

দৃষ্টিমাত্র হতভাগ্য পশুপতির প্রতীতি হইল যে, যবনেরা তাঁহার পৌরজন সহ মনোরমাকে বধ করিয়া গৃহে অগ্নি দিয়া গিয়াছে । মনোরমা যে পলায়ন করিয়াছিল, তাহা তিনি কিছু জানিতে পারেন নাই

নিকটে কেহই ছিল না যে, তাঁহাকে এ সংবাদ প্রদান করে । আপন বিকল চিন্তের সিদ্ধান্তই তিনি গ্রহণ করিলেন । হলাহল-কলস পবিপূর্ণ হইল—হৃদয়ের শেষ তন্ত্রী ছিঁড়িল । তিনি কিয়ৎক্ষণ বিস্ফারিত নয়নে দহমান অট্টালিকাপ্রতি চাহিয়া রহিলেন—মরণোন্মুখ পতঙ্গবৎ অল্পক্ষণ বিকলশরীরে একস্থানে অবস্থিত করিলেন—শেষে মহাবেগে সেই অনল-তরঙ্গমধ্যে ঝাঁপ দিলেন । সঙ্গের প্রহরী চমকিত হইয়া রহিল ।

মহাবেগে পশুপতি জ্বলন্ত দ্বারপথে পুরমধ্যে প্রবেশ কবিলেন । চরণ দন্ধ হইল—অঙ্গ দন্ধ হইল—কিন্তু পশুপতি ফিরিলেন না । অগ্নিকুণ্ড অতিক্রম করিয়া আপন শয়নকক্ষে গমন করিলেন—কাহাকেও দেখিলেন না । দন্ধশরীরে কক্ষে কক্ষে ছুটিয়া বেড়াইতে লাগিলেন । তাঁহার অন্তরমধ্যে যে দুরন্ত অগ্নি জ্বলিতেছিল—তাহাতে তিনি বাহ্য দাহযন্ত্রণা অনুভূত করিতে পারিলেন না ।

ক্ষণে ক্ষণে গৃহের নূতন নূতন খণ্ডসকল অগ্নিকর্ভুক আক্রান্ত হইতেছিল আক্রান্ত প্রকোষ্ঠ বিষম শিখা আকাশপথে উত্থাপিত করিয়া ভয়ঙ্কর গর্জন করিতেছিল । ক্ষণে ক্ষণে তাঁহাব দন্ধ গৃহাংশসকল অশনিসম্পাতশব্দে ভূতলে পড়িয়া যাইতেছিল । ধূমে, ধূলিতে, তৎসঙ্গে লক্ষ লক্ষ অগ্নিস্ফুলিঙ্গে আকাশ অদৃশ্য হইতে লাগিল ।

দাবানলসংবেষ্টিত আরণ্য গজের ন্যায় পশুপতি অগ্নিমধ্যে ইতস্ততঃ দাসদাসী, স্বজন ও মনোরমার অন্বেষণ করিয়া বেড়াইতে লাগিলেন । কাহারও কোন চিহ্ন পাইলেন না—হতাশ হইলেন । তখন দেবীর মন্দিরপ্রতি তাঁহার দৃষ্টিপাত হইল । দেখিলেন, দেবী অষ্টভুজার মন্দির অগ্নিকর্ভুক আক্রান্ত হইয়া জ্বলিতেছে । পশুপতি পতঙ্গবৎ তন্মধ্যে

প্রবেশ করিলেন। দেখিলেন, অনলমণ্ডলমধ্যে অদৃশ্য স্বর্ণপ্রতিমা বিরাজ করিতেছে। পশুপতি উন্নতের শ্রায় কহিলেন, “মা! জগদশ্বে! আর তোমাকে জগদম্বা বলিব না। আর তোমায় পূজা করিব না। তোমাকে প্রণামও করিব না। আশৈশব আমি কায়মনোবাক্যে তোমার সেবা করিলাম—ঐ পদধ্যান ইহজন্মে সার করিয়াছিলাম—এখন, মা, এক দিনের পাপে সর্ব্বশ্ব হারাইলাম। তবে কি জন্ম তোমার পূজা করিয়াছিলাম? কেনই বা তুমি আমার পাপমতি অপনৌত না করিলে?”

মন্দিরদহন অগ্নি অধিকতর প্রবল হইয়া গর্জিয়া উঠিল। পশুপতি তথাপি প্রতিমা সম্বোধন করিয়া বলিতে লাগিলেন, “ঐ দেখ! ধাতুমূর্ত্তি!—তুমি ধাতুমূর্ত্তি মাত্র, দেবী নহ—ঐ দেখ অগ্নি গর্জিতেছে! যে পথে আমার প্রাণাধিকা গিয়াছে—সেই পথে অগ্নি তোমাকেও প্রেরণ করিবে। কিন্তু আমি অগ্নিকে এ কীর্ত্তি রাখিতে দিব না—আমি তোমাকে স্থাপনা করিয়াছিলাম—আমিই তোমাকে বিসর্জন করিব। চল! ইষ্টদেবি! তোমাকে গঙ্গার জলে বিসর্জন করিব।”

এই বলিয়া পশুপতি প্রতিমা উত্তোলন আকাঙ্ক্ষায় উভয় হস্তে তাহা ধারণ করিলেন। সেই সময়ে আবার অগ্নি গর্জিয়া উঠিল। তখনই পর্ব্বতবিদাম্বরূপ প্রবল শব্দ হইল,—দক্ষ মন্দির, আকাশপথে ধূলিধূমভস্ম সহিত অগ্নিস্ফুলিঙ্গরাশি প্রেরণ করিয়া, চূর্ণ হইয়া পড়িয়া গেল। তন্মধ্যে প্রতিমা সহিত পশুপতির সঞ্জীবন সমাধি হইল।

পঞ্চদশ পরিচ্ছেদ : অস্তিত্বকালে

পশুপতি স্বয়ং অষ্টভুজার অর্চনা করিতেন বটে—কিন্তু তথাপি তাঁহার নিত্যসেবার জন্ম দুর্গাদাস নামে একজন ব্রাহ্মণ নিযুক্ত ছিলেন। নগর-বিপ্লবের পরদিবস দুর্গাদাস শ্রুত হইলেন যে, পশুপতির গৃহ ভস্মীভূত হইয়া ভূমিসাৎ হইয়াছে। তখন ব্রাহ্মণ অষ্টভুজার মূর্ত্তি ভস্ম হইতে উদ্ধার করিয়া আপন গৃহে স্থাপন করিবার সঙ্কল্প করিলেন। যবনেরা নগর লুণ্ঠ করিয়া তৃপ্ত হইলে, বখ্‌তিয়ার খিলিজি অনর্থক নগরবাসীদিগের পীড়ন নিষেধ করিয়া দিয়াছিলেন। সুতরাং এক্ষণে সাহস করিয়া বাঙ্গালীরা

রাজপথে বাহির হইতেছিল। ইহা দেখিয়া ছুর্গাদাস অপরাহ্নে অষ্টভুজার উদ্ধারে পশুপতির ভবনাভিমুখে যাত্রা করিলেন। পশুপতির ভবনে গমন করিয়া, যথায় দেবীর মন্দির ছিল, সেই প্রদেশে গেলেন। দেখিলেন, অনেক ইষ্টকরাশি স্থানান্তরিত না করিলে, দেবীর প্রতিমা বহিষ্কৃত করিতে পারা যায় না। ইহা দেখিয়া ছুর্গাদাস আপন পুত্রকে ডাকিয়া আনিলেন। ইষ্টকসকল অর্ধ-জ্বীভূত হইয়া পরস্পর লিপ্ত হইয়াছিল—এবং এখন পর্য্যন্ত সম্ভ্রু ছিল। পিতাপুত্রে এক দীর্ঘিকা হইতে জল বহন করিয়া তপ্ত ইষ্টক সকল শীতল করিলেন এবং বহুকষ্টে তন্মধ্য হইতে অষ্টভুজার অল্পসন্ধান করিতে লাগিলেন। ইষ্টকরাশি স্থানান্তরিত হইলে তন্মধ্য হইতে দেবীর প্রতিমা আবিষ্কৃত হইল। কিন্তু প্রতিমার পাদমূলে—এ কি ? সভয়ে পিতাপুত্র নিরীক্ষণ করিলেন যে, মনুষ্যের মৃতদেহ রহিয়াছে। তখন উভয়ে মৃতদেহ উদ্ভোলন করিয়া দেখিলেন যে, পশুপতির দেহ।

বিস্ময়মূচক বাক্যের পর ছুর্গাদাস কহিলেন, “যে প্রকারেই প্রভুর এ দশা হইয়া থাকুক, ব্রাহ্মণের এতদঞ্চ প্রতিপালিতের কার্য্য আমাদিগের অবশ্য কর্তব্য। গঙ্গাতীরে এই দেহ লইয়া আমরা প্রভুর সৎকার করি চল।”

এই বলিয়া দুই জনে প্রভুর দেহ বহন করিয়া গঙ্গাতীরে লইয়া গেলেন। তথায় পুত্রকে শবরক্ষায় নিযুক্ত করিয়া ছুর্গাদাস নগরে কাষ্ঠাদি সৎকারের উপযোগী সামগ্রীর অল্পসন্ধান গমন করিলেন এবং যথাসাধ্য সুগন্ধি কাষ্ঠ ও অগ্ন্যাদি সামগ্রী সংগ্রহ করিয়া গঙ্গাতীরে প্রত্যাগমন করিলেন।

তখন ছুর্গাদাস পুত্রের আনুকূলে যথাশাস্ত্র দাহের পূর্বগামী ক্রিয়া সকল সমাপন করিয়া সুগন্ধি কাষ্ঠে চিতা রচনা করিলেন এবং তদুপরি পশুপতির মৃতদেহ স্থাপন করিয়া অগ্নিপ্রদান করিতে গেলেন।

কিন্তু অকস্মাৎ শ্মশানভূমিতে এ কাহার আবির্ভাব হইল ? ব্রাহ্মণদ্বয় বিস্মিতলোচনে দেখিলেন যে, এক মলিনবসনা, ক্রঙ্ককেশী, আলুলায়িত-কুম্ভলা, ভস্মধূলিসংসর্গে বিবর্ণা, উন্মাদিনী আসিয়া শ্মশানভূমিতে অবতরণ করিতেছে। রমণী ব্রাহ্মণদিগের নিকটবর্তিনী হইলেন।

হুর্গাদাস সভয়চিত্তে জিজ্ঞাসা করিলেন, “আপনি কে ?”

রমণী কহিলেন, “তোমরা কাহার সংকার করিতেছ ?”

হুর্গাদাস কহিলেন, “মৃত ধর্মাধিকার পশুপতির ।”

রমণী কহিলেন, “পশুপতির কি প্রকারে মৃত্যু হইল ?”

হুর্গাদাস কহিলেন, “প্রাতে নগরে জনরব শুনিয়াছিলাম যে, তিনি যবনকর্তৃক কারাবদ্ধ হইয়া কোন সুযোগে রাত্রিকালে পলায়ন করিয়াছিলেন । অতঃ তাঁহার অট্টালিকা ভস্মসাৎ হইয়াছে দেখিয়া, ভস্মমধ্য হইতে অষ্টভুজার প্রতিমা উদ্ধারমানসে গিয়াছিলাম । তথায় গিয়া প্রভুর মৃতদেহ পাইলাম ।”

রমণী কোন উত্তর করিলেন না । গঙ্গাতীরে, সৈকতের উপর উপবেশন করিলেন । বহুক্ষণ নীববে থাকিয়া জিজ্ঞাসা করিলেন, “তোমরা কে ?” হুর্গাদাস কহিলেন, “আমরা ব্রাহ্মণ ; ধর্মাধিকারের অগ্নে প্রতিপালিত হইয়াছিলাম । আপনি কে ?”

তরুণী কহিলেন, “আমি তাঁহার পত্নী ।”

হুর্গাদাস কহিলেন, “তাঁহার পত্নী বহুকাল নিরুদ্दिষ্টা । আপনি কি প্রকারে তাঁহার পত্নী ?”

যুবতী কহিলেন, “আমি সেই নিরুদ্दिষ্টা কেশবকণ্ঠা । অল্পমরণভয়ে পিতা আমাকে এতকাল লুকায়িত রাখিয়াছিলেন । আমি আজ কালপূর্ণে বিধিলিপি পূরাইবার জন্ত আসিয়াছি ।”

শুনিয়া পিতাপুত্রে শিহরিয়া উঠিলেন । তাঁহাদিগকে নিরুদ্দিষ্টর দেখিয়া বিধবা বলিতে লাগিলেন, “এখন স্ত্রীজাতির কর্তব্য কাজ করিব । তোমরা উদ্যোগ কর ।”

হুর্গাদাস তরুণীর অভিপ্রায় বুঝিলেন ; পুত্রের মুখ চাহিয়া জিজ্ঞাসা করিলেন, “কি বল ?”

পুত্র কিছু উত্তর করিল না । হুর্গাদাস তখন তরুণীকে কহিলেন, “মা, তুমি বালিকা—এ কঠিন কার্যে কেন প্রস্তুত হইতেছে ?”

তরুণী ক্রভঙ্গী করিয়া কহিলেন, “ব্রাহ্মণ হইয়া অধর্মে প্রবৃত্তি দিতেছ কেন ?—ইহার উদ্যোগ কর ।”

তখন ব্রাহ্মণ আয়োজনের জন্তু নগরে পুনর্ব্বার চলিলেন। গমনকালে বিধবা ছুর্গাদাসকে কহিলেন, “তুমি নগরে যাইতেছ। নগরপ্রান্তে রাজার উপবনবাটিকায় হেমচন্দ্র নামে বিদেশী রাজপুত্র বাস করেন। তাঁহাকে বলিও, মনোরমা গঙ্গাতীরে চিতারোহণ করিতেছে—তিনি আসিয়া একবার তাহার সহিত সাক্ষাৎ করিয়া যাউন, তাঁহার নিকটে ইহলোকে মনোরমার এই মাত্র ভিক্ষা।”

হেমচন্দ্র যখন ব্রাহ্মণমুখে শুনিলেন যে, মনোরমা পশুপতির পত্নী-পরিচয়ে তাঁহার অনুমৃত হইতেছেন, তখন তিনি কিছুই বুঝিতে পারিলেন না। ছুর্গাদাসের সমভিষাহারে গঙ্গাতীরে আসিলেন। তথায় মনোরমার অতি মলিনা, উন্মাদিনী মূর্ত্তি, তাঁহার স্থিরগম্ভীর, এখনও অনিন্দ্যসুন্দর মুখকান্তি দেখিয়া তাঁহার চক্ষুর জল আপনি বহিতে লাগিল। তিনি বলিলেন, “মনোরমা! ভগিনী! এ কি এ?”

তখন মনোরমা, জ্যোৎস্নাপ্রদীপ্ত সরোবরতুল্য স্থির মূর্ত্তিতে মৃত্যুগম্ভীরস্বরে কহিলেন, “ভাই, যে জন্তু আমার জীবন, তাহা আজি চরম সীমা প্রাপ্ত হইয়াছে। আজ আমি আমার স্বামীর সঙ্গে গমন করিব।”

মনোরমা সংক্ষেপে অশ্রুর শ্রবণাতীত স্বরে হেমচন্দ্রের নিকট পূর্ব্ব-কথার পরিচয় দিয়া বলিলেন, “আমার স্বামী অপরিমিত ধন সঞ্চয় করিয়া রাখিয়া গিয়াছেন। আমি এক্ষণে সে ধনের অধিকারিণী। আমি তাহা তোমাকে দান করিতেছি। তুমি তাহা গ্রহণ করিও। নচেৎ পাপিষ্ঠ যবনে তাহা ভোগ করিবে। তাহার অল্পভাগ ব্যয় করিয়া জনার্দন শর্ম্মাকে কাশীধামে স্থাপন করিবে। জনার্দনকে অধিক ধন দিও না। তাহা হইলে যবমে কাড়িয়া লইবে। আমার দাহের পর, তুমি আমার স্বামীর গৃহে গিয়া অর্থের সন্ধান করিও। আমি যে স্থান বলিয়া দিতেছি, সেই স্থান খুঁড়িলেই তাহা পাইবে। আমি ভিন্ন সে স্থান আর কেহই জানে না।” এই বলিয়া মনোরমা যথা অর্থ আছে, তাহা বলিয়া দিলেন।

তখন মনোরমা আবার হেমচন্দ্রের নিকট বিদায় হইলেন। জনার্দনকে ও তাঁহার পত্নীকে উদ্দেশে প্রণাম করিয়া হেমচন্দ্রের দ্বারা তাঁহাদিগের নিকট কত স্নেহসূচক কথা বলিয়া পাঠাইলেন।

পরে ব্রাহ্মণেরা মনোরমাকে যথাশাস্ত্র এই ভীষণ ব্রতে ব্রতী করাঠিলেন এবং শাস্ত্রীয় আচারান্তে, মনোরমা ব্রাহ্মণের আনীত নূতন বস্ত্র পরিধান করিলেন। নব বস্ত্র পরিধান করিয়া, দিব্য পুষ্পমালা কণ্ঠে পরিয়া, পশুপতির প্রজ্জ্বলিত চিতা .প্রদক্ষিণপূর্ব্বক, তত্বপরি আরোহণ করিলেন এবং সহস্র আননে সেই প্রজ্জ্বলিত হতাশনরাশির মধ্যে উপবেশন করিয়া, নিদাঘসন্তপ্ত কুম্মকলিকার ত্রায় অনলতাপে প্রাণত্যাগ করিলেন।

পরিশিষ্ট

হেমচন্দ্র মনোরমার দত্ত ধন উদ্ধার করিয়া তাহার কিয়দংশ জনর্দনকে দিয়া তাঁহাকে কাশী প্রেরণ করিলেন। অবশিষ্ট ধন গ্রহণ করা কর্তব্য কি না, তাহা মাধবাচার্য্যকে জিজ্ঞাসা করিলেন। মাধবাচার্য্য বলিলেন, “এই ধনের বলে পশুপতির বিনাশকারী বখ্‌তিয়ার খিলিজিকে প্রতিফল দেওয়া কর্তব্য এবং তদভিপ্রায়ে ইহা গ্রহণও উচিত। দক্ষিণে, সমুদ্রের উপকূলে অনেক প্রদেশ জনহীন হইয়া পড়িয়া আছে। আমার পরামর্শ যে, তুমি এই ধনের দ্বারা তথায় নূতন রাজ্য সংস্থাপন কর এবং তথায় যবনদমনোপযোগী সেনা সৃজন কর। তৎসাহায্যে পশুপতির শত্রুর নিপাত সিদ্ধ করিও।”

এই পরামর্শ করিয়া মাধবাচার্য্য সেই রাত্রিতেই হেমচন্দ্রকে নবদ্বীপ হইতে দক্ষিণাভিমুখে যাত্রা করাইলেন। পশুপতির ধনরাশি তিনি গোপনে সঙ্গে লইলেন। মৃগালিনী, গিরিজায়া এবং দিগ্বিজয় তাঁহার সঙ্গে গেলেন। মাধবাচার্য্যও হেমচন্দ্রকে নূতন রাজ্যে স্থাপিত করিবার জন্ত তাঁহার সঙ্গে গেলেন। রাজ্যসংস্থাপন অতি সহজ কাজ হইয়া উঠিল; কেন না, যবনদিগের ধর্ম্মদ্বেষ্টায় পীড়িত এবং তাঁহাদিগের ভয়ে ভীত হইয়া অনেকেই তাঁহাদিগের অধিকৃত রাজ্য ত্যাগ করিয়া হেমচন্দ্রের নবস্থাপিত রাজ্যে বাস করিতে লাগিল।

মাধবাচার্য্যের পরামর্শেও অনেক প্রধান ধনী ব্যক্তি তথায় আশ্রয় লইল। এই রূপে অতি শীঘ্র ক্ষুদ্র রাজ্যটি সৌষ্ঠবান্বিত হইয়া উঠিল। ক্রমে ক্রমে সেনা সংগ্রহ হইতে লাগিল। অচিরেই রমণীয় রাজপুরী

নির্মিত হইল। মৃগালিনী তন্মধ্যে মহিষী হইয়া সে পুরী আলো করিলেন।

গিরিজায়ার সহিত দিগ্বিজয়ের পরিণয় হইল। গিরিজায়া মৃগালিনীর পরিচর্যায় নিযুক্তা রহিলেন, দিগ্বিজয় হেমচন্দ্রের কার্য্য পূর্ববৎ নির্বাহ করিতে লাগিলেন। কথিত আছে যে, বিবাহ অবধি এমন দিনই ছিল না, যে দিন গিরিজায়া এক আধ ঘা ঝাঁটার আঘাতে দিগ্বিজয়ের শরীর পবিত্র করিয়া না দিত। ইহাতে যে দিগ্বিজয় বড়ই দুঃখিত ছিলেন, এমন নহে। বরং একদিন কোন দৈবকারণবশতঃ গিরিজায়া ঝাঁটা মারিতে ভুলিয়াছিলেন, ইহাতে দিগ্বিজয় বিষণ্ণ বদনে গিরিজায়াকে গিয়া জিজ্ঞাসা করিল, “গিরি, আজ তুমি আমার উপব রাগ করিয়াছ না কি?” বস্তুতঃ ইহারা যাবজ্জীবন পরমস্বখে কালাতিপাত করিয়াছিল।

হেমচন্দ্রকে নূতন রাজ্যে স্থাপন করিয়া মাধবাচার্য্য কামরূপে গমন করিলেন। সেই সময়ে হেমচন্দ্র দক্ষিণ হইতে মুসলমানের প্রতিকূলতা করিতে লাগিলেন। বখতিয়ার খিলিজি পরাভূত হইয়া কামরূপ হইতে দূরীকৃত হইলেন এবং প্রত্যাগমনকালে অপমানে ও কষ্টে তাঁহার প্রাণবিলোক হইল। কিন্তু সে সকল ঘটনার বর্ণনা করা এ গ্রন্থের উদ্দেশ্য নহে।

রত্নময়ী এক সম্পন্ন পাটনীকে বিবাহ করিয়া হেমচন্দ্রের নূতন রাজ্যে গিয়া বাস করিল। তথায় মৃগালিনীর অনুগ্রহে তাহার স্বামীর বিশেষ সৌষ্ঠব হইল। গিরিজায়া ও রত্নময়ী চিরকাল “সই” “সই” রহিল।

মৃগালিনী মাধবাচার্য্যের দ্বারা জ্ববীকেশকে অনুরোধ করাইয়া মণিমালিনীকে আপন রাজধানীতে আনাইলেন। মণিমালিনী রাজপুত্রী-মধ্যে মৃগালিনীর সখীর স্বরূপ বাস করিতে লাগিলেন। তাঁহার স্বামী রাজবাটীর পৌরহিত্যে নিযুক্ত হইলেন।

শান্তশীল যখন দেখিল যে, হিন্দুর আর রাজ্য পাইবার সম্ভাবনা নাই, তখন সে আপন চতুরতা ও কৰ্ম্মদক্ষতা দেখাইয়া যবনদিগের প্রিয়পাত্র হইবার চেষ্টা করিতে লাগিল। হিন্দুদিগের প্রতি অত্যাচার ও বিশ্বাসঘাতকতার দ্বারা শীঘ্র সে মনস্কাম সিদ্ধ করিয়া অভীষ্ট রাজকার্য্যে নিযুক্ত হইল।